

سرى للغاية

محضر اجتماع اللجنة التنفيذية العليا للاتحاد الاشتراكي العربي

برئاسة الرئيس جمال عبد الناصر

القاهرة - مقر الاتحاد الاشتراكي في ١٠ يناير ١٩٦٨

من سعت ١٨٤٥ الى سعت ٢٢١٠.

الحاضرون

الرئيس جمال عبد الناصر، زكريا محي الدين.. نائب
الرئيس، أنور السادات.. رئيس مجلس الأمة، حسين
الشافعي.. نائب الرئيس، صدقي سليمان.. نائب الرئيس،
على صبرى.. نائب الرئيس، كمال رفعت.. وزير العمل،
محمود يونس.. وزير البترول، لبيب شقير.. وزير التعليم
العالي، عبد الوهاب البشري.. وزير الانتاج الحربي، سيد
مرعى.. وزير الزراعة، عبد المحسن أبو النور.. الأمين
العام المساعد للاتحاد الاشتراكي.

المحتويات

الصفحة	الموضوع
١	١- الميزانية النقدية.. حسن عباس زكي
٢٧	عبد الناصر.. العجز في الميزانية النقدية ليس نتيجة ٥ يونيه، ولكنه كان مستمرا من قبل ١٩٥٨ (الصناعة - الزراعة)
٣٤	٢- عبد المنعم القيسوني.. تحليل للميزانية
٤٦	٣- عبد الناصر.. أهمية الدروس المستفادة من الماضي؛ في الخطة لم تكن معتمدين على المعونة الأمريكية، ولكن زيادة مصروفات القوات المسلحة ٦٠ مليون جنيه سنويا في اليمن من سنة ١٩٦٤
٥١	مناقشة مع عبد المنعم القيسوني
٦٤	٤- سيد مرعى.. يناقش الخطة
٦٧	٥- صدقي سليمان.. الوضع الاقتصادي
٧٠	٦- كمال رفعت.. أسباب المشاكل الاقتصادية
٧٤ - ٧٩	٧- لبيب شقير.. أخطاء الخطة الخمسية الأولى التي يجب تلافيها

سرى للغاية

سرى للغاية

محضر اجتماع اللجنة التنفيذية العليا للاتحاد الاشتراكي العربي

برئاسة الرئيس جمال عبد الناصر

القاهرة - مقر الاتحاد الاشتراكي في ١٠ يناير ١٩٦٨

من سعت ١٨٤٥ الى سعت ٢٢١٠.

محي الدين: الأخ حسن يتكلم في الميزانية النقدية بتاع السنة دي، وبعدين عبد المنعم يتكلم بعد كده في المذكرة الخاصة بتاعة الخطة الاقتصادية.

زكى: كنا سبق عرضنا في مجلس الوزراء الميزانية النقدية، وكان فيها عجز حوالي ٥٨ مليون جنية، ولما أثيرت وسائل تدبير هذا العجز كان فيه من بينها وسائل سعرية وبعض وسائل أخرى. فأنا بقول: نتجاوز حاليا عن المشاكل الخاصة برفع الأسعار؛ باعتبار إنها داخلة في الإطار العام للسياسة التي ستتخذ، ونقصر البحث فيما يختص بالوسائل التي تمكننا من إننا نجابه الـ ٥٨ مليون جنية.

هو فيه إجراء أول: وهو إننا بنعمل على تأجيل الالتزامات.. ودي حوالي ٣٠ مليون جنية. طبعا هذا الموضوع لسه مانتهاش، وإحنا في مفاوضات مع الدول ودي أكثرها دول شرقية، وفي الغالب الوضع سينتهي الى إن يعنى الأمر الواقع هو أننا مش حاندفع التزامات. لكن طبعا يحسن إننا ماندفعهاش بالاتفاق معهم.. يعنى هي عمليا مش حاتبقى عبء لأنه مش هنقدر ندفعها، الإشكال بييجي في الجزء الآخر اللي هو مفروض إنه سلع أدفع قيمتها.

فإحنا بحثنا موضوع الميزانية وبحثنا وارداتنا، واقترحنا على القطاعات تخفيضات معينة، وأخذنا في الاعتبار أن التخفيضات لا تمس السلع الضرورية أو السلع التي تدخل في انتاج سلع تصدر أو سلع - إذا ماكنتش حاستوردها وحانتجها - حاضتر أستوردها مصنوعة لأنها لازمة للتموين.. ده من ناحية.

من ناحية ثانية: اقترحنا إننا نعمل على أن نستنفذ جانب من المخزون من بعض السلع، اللي برضه من المصلحة أيضا إننا نأخذ من هذا المخزون - زي التبغ مثلا - باعتبار إنه مايفرقش كثير؛ كون هو بييجي ويتحط في الجمارك ويقعد بييجي ٧ أو ٨ أو ١٠ سنين، لما نأخذه قبل شغلته بسنة مش حاتفرق كثير قوى، بدل ماأستورد ومعديش أموال كافية لتمويل هذه العملية.. فإحنا اقترحنا اقتراحات وبعنتاها للقطاعات.

سرى للغاية

فيه بعض قطاعات أمكن إنها توافق الى حد ما بالنسبة للاقتراحات اللي احنا قلناها لها، مع بعض تعديلات بسيطة.

وأهم قطاع مثلا كان التموين؛ لأن ده اللي يهمننا إن منعملش حاجة تضايقه؛ فالتخفيضات كنا اقترحنا له ٥,٥ مليون، وافق على ٣,٥ مليون من غير ما يتعب حد؛ فدى ماشية ونقدر نشوف الـ ٢ مليون ندبرها من جهة أخرى.

قطاع الانتاج الحرى، كنا اقترحنا مليون جنيه؛ فيه موافقة عليها معه.

الإصلاح الزراعى والأسمدة والمبيدات، كان فيه خلاف بينا وبينهم فى المبيدات وأظن حانلقى لها تصريف وتسوية؛ لأنه من رأينا إن مافيش داعى إننا نزود استيراد المبيدات. كانوا عاوزين حوالى ٨ مليون جنيه، بنقول: عندنا مخزون السنة اللي فاتت، كانوا طلبوا ١٣ مليون قلنا: لأ.. قالوا: ١٠ مليون، قلنا: لأ.. واللى قلناه مشى ومكانش فيه متاعب ولايزال فيه مخزون؛ فمافيش داعى نزود المخزون وممكن ناخذ من المخزون. ونجحت تجربة أن اليد العاملة تبقى أولا وبعدين المبيدات بتيجى بعدين، مع مراعاة إن احنا ما بننقصش يعنى عما إعتدنا إننا نستورده.

هو بس كان فيه قطاعين.. قطاع الصناعة لسه مانتهاش، وقطاع الإسكان علشان مشكلة حديد التسليح اللي احنا كنا بنقترح ٢,٥ مليون ينقص، هم لسه ما وافقوش عليه.

قطاع الصناعة، إحنا كنا مقترحين حوالى ٧ مليون جنيه يتخفضوا أكثرها اتفاقيات؛ لأن كل العملية بره اللي بنخفضهم ١,٥ مليون والباقي ٥ مليون.

صبرى: فيها اتفاقيات أد إيه؟

زكى: ثلاث اتفاقيات من خمسة والحررة، هو بقى يعنى يبقى فيه فرق أربعة، ولو مشينا على ٣ مليون فى الصناعة يبقى عندنا فرق لسه مازال فيه عجز حوالى ١٠ أو ١٢ مليون جنيه. ده مع الأخذ فى الاعتبار إن علشان نسد هذا العجز حانزود صادراتنا من الغزل والمنسوجات بعشرة مليون جنيه، ولازم تتصدر ويبجى قيمتها فى خلال هذه الميزانية؛ فإذا كان حانعمل كده يبقى لا بد من إننا نربط بين الزيادة فى صادرات الغزل وبين الواردات المطلوبة.

عبد الناصر: دى ميزانية كام دى؟

سرى للغاية

زكى: اللى احنا فيها.

صدقى: عشرة مليون؟

زكى: عشرة مليون.

صدقى: يعنى نصل لرقم إيه؟

زكى: إحنا عندنا فى التصدير حاطين ٥٤ مليون.. يبقى ٦٤ مليون.

صدقى: يعنى مش ممكن إن احنا نصدره بحيث تتم الحصيله قبل آخر يونيه، وأنا دخلت ده فى لجنة الخطة؛ إن احنا ممكن نزود الصادرات لأجل التعهدات يبقى العائد بتاعها.. يعنى عملية التصدير الفعلية تتم الى مابعد يونيه؛ وبالتالي تبقى الحصيله لن تأتى فى الميزانية المالية الحالية.

زكى: وأنا أبرزت دى فى مجلس الوزراء، أنا خشيت من إننا نضع الرقم ولا يتحقق، وبعدين إحنا عاوزين cash نستورد به، فإذا كان مش حايمن ١٠ مليون يبقى لازم ننقص تانى كمان ١٠ مليون من الوردات، غير تنقيص الـ ٢٤ مليون اللى احنا مقترحينه اللى مش قادرين نغطيه. فأنا بقول: إن احنا أمام أمر واقع يعنى مافيش مفر من إننا ننقص؛ فبدلاً من إننا ننقص القطاع اللى بنقول له مثلاً - بنقول مثلاً قطاع الصناعة ٧ مليون وهو استطاع يدبر ٣ مليون - بنقول له: طيب الـ ٤ مليون نقص بيها انتاج وينزل انتاج بعض المصانع؛ ولتكن سلع هندسية.. سلع معينة، يعنى سلع مش حاتتصدر أو مخزون منها، ويبقى مفهوم أثر هذا النقص وده مش حياثر فى حاجة لأن العمال حاياخذوا أجورهم.. مافيش إشكال يعنى اجتماعى.

صدقى: الموضوع ده يافندم معناه، أنا طلبت فعلاً إن احنا نترجم النقص فى المواد التى ذكرتها وزارة الاقتصاد الى ما تعنيه من سلع بنتجها، وعلى أساس إنه يبقى مفهوم الوضع. مثلاً من الحاجات المقترحة نقص الصوف، حالياً فيه نقص شديد جداً فى منتجات الصوف لأن الحصه الموضوعه فى الميزانية النقدية الأصلية تلت الاحتياجات الفعلية لقطاع الصوف! ولذلك مصانع الصوف بتشتغل بطاقة

سرى للغاية

حوالى ٣٠٪ - ٣٥٪، وأنا عامل حسابى على نقص شديد فى منتجات الأصواف فى السوق.. فيعنى برضه مانقدر أن نستمر؛ لأن زى ما ذكرت قبل كده فى مجلس الوزراء، من أن الحصة النقدية غير كافية أصلا لتشغيل قطاع الصناعة، وأنا كنت حانقدم بزيادة الحصة النقدية.

النقطة الثانية: المشكلة اللي جابيتها إن فى وضع الميزانية النقدية اتقسمت الى جزئين؛ جزء بالعملات الحرة وجزء لحساب الاتفاقيات. لما جينا ننفذ حتى عن طريق شركات التجارة نفسها، ثبت أن كثير من المواد - اللي وزارة الاقتصاد وقالت تيجى من حساب الاتفاقيات - لم يمكن الحصول عليها إلا بالعملات الحرة؛ وبالتالي رقم حساب الاتفاقيات بقى معطل غير مستخدم، بينما حصة النقد الحر بقيت كما هى وأصبحت طبعا غير كافية لاستيراد الجزء الذى مقررا لها أيضا إنها تجيبه، بالإضافة اللي يجب إنها تحوله من اتفاقيات الى حرة. وأنا بعثت الى السيد وزير الاقتصاد ببيان بهذه الأشياء، وافق على جزء منها لكن دى تقل ٢ - ٣ مليون عن اللي احنا طالبينه! فالموقف اللي أنا بقوله: إنه بالنسبة للاتفاقيات ممكن، لكن بالنسبة للنقد الحر مستحيل إلا بقى نبقى نعرض النقص فى المواد، وأنا باعتبار إحنا وصلنا الى حد أدنى للنقص فى الانتاج بالنسبة للسلع الأساسية.

زكى: هو الواقع الخلاف الكبير اللي بينا وبين الصناعة، هو مثلا إحنا بنقترح إن التبغ ينقص ٢ مليون.. ده ماأطنش فيها إشكال لأن ده موجود فى الجمارك.

صدقى: إحنا وافقنا إن ١,٦٠٠,٠٠٠ من هذا بنحسبهم اتفاقيات.. موافقين.

زكى: يعنى مافيش فى دى إشكال؛ هو الإشكال بس جاى فى السلع الهندسية والمعدنية، إحنا بنقترح ٣ مليون..

صدقى: إيه هى السلع الهندسية والمعدنية؟!

زكى: ما هو أنا بقول: تحولوها إنتم لمصنع مصنع، ونقول إيه اللي حايؤثر أثر واضح.

سرى للغااية

صدقى: يعنى حاضرب مثال يعنى، إذا كنت أنا باستورد مثلا صاج علشان أعمل لوريات واللوريات فعلا بتنتج وتنزل فى السوق يعنى حانقصها؛ يعنى معناها أننى حانقص لوريات ونرجع نستورد لوريات زى ما كنا! أو مثلا مواد أخرى لازمة زى النحاس مثلا.. النحاس علشان أعمل كابلات، ويعدين لما بتنقص الكابلات الدولة كلها بتشتكى إن محتاجين نستورد كابلات جاهزة. فأنا بقول: إن بيبقى الحقيقة هو وفر ظاهرى ونرجع ندفع ثمنه أضعاف مضاعفة؛ لأن احنا بنضطر إن احنا نستورده! ولذلك إيه هى السلع اللى يمكن ننقصها من السوق؟ ده هو الفيصل!

زكى: بقول: مثلا الغسالات والثلاجات والدراجات والآلات؛ دى مجموعة عندنا فيها مخزون فوق ٧-٨ مليون جنيه.

صدقى: كل النقد اللى أخذته مؤسسة الصناعات الهندسية هذا العام ٦٠٠ ألف جنيه حر لغاية الدقيقة دى.

زكى: والاتفاقيات؟

سليمان: والاتفاقيات يمكن مازادتش عن مليون، والانتاج واقف كله فى المصانع دى!

زكى: لأ.. ماشى يعنى لها بقية الشكل..

صدقى: وأنا لى نظرية فى هذا، كان غلط إن احنا نقف لأن أنا عندى عقود تصدير ثلاجات بـ ٧٢ ألف ثلاجة، الثلاجة نفرض إن متوسط التصدير بـ ٤٠ جنيه أو ٤٥ جنيه، foreign component اللى احنا لازلنا نستورده حوالى ١٦ جنيه؛ يبقى بالنسبة لميزان المدفوعات باحقوق ٣ أضعاف للتصدير.. دى واحدة.

انتين: إن فى السنة دى بيدأ انتاج الـ compressor وفى أكتوبر بيدأ انتاج الصاج أيضا؛ يعنى الـ foreign component - اللى هو ١٦ جنيه - حاينزل الى حوالى ٣ جنيه للثلاجة. علشان أنا أقدر أستمر فى إن أنا أتعاقد على ٧٠-٨٠ ألف ثلاجة فى التصدير، لازم الأسواق دى أكون فيها.

سرى للغاية

إحنا بعد ما عملنا هذه العقود وابتدينا نورد جينا وقفنا ليه؟ لأن قلنا: إن لا نصدر لدول شرقية سلعة فيها جزء مستورد بالعملة الحرة.. يعنى برضه قطاع الصناعة لازم برضه يجد مرونة؛ لأن أنا حاصد ثلاجة لمين! لأمریکا ولا لإنجلترا؟! ما أنا مجالى للتصدير هو فى هذه الدول زائد بعض الدول الأخرى اللى هى مثلا دول إفريقية أو دول عربية، لكن الرقم الكبير اللى يوصلنى الى ٧٠-٨٠ ألف ثلاجة هو الدول الشرقية. وعلشان أنا يوم ما يبقى عندى foreign component minimum فى آخر السنة دى؛ كان لازم أبدأ التصدير من قبلها بستنتين ثلاثة علشان أوصل لرقم ٧٠ و ٨٠ ألف ثلاجة.

ولذلك أنا بقول: حتى فى مثل هذه السلع من الخطأ إن احنا نوقف الانتاج؛ لأن برضه طيب أنا حاوازن لغاية يونيه والسنة الجاية حاوازنها إزاي؟! ما هو لازم أوازنها بإنى أزود صادراتى من مثل هذه السلع.

زكى: هو فيما يختص بالثلاجات والغسالات، إحنا عندنا مخزون بسبعة مليون، وإحنا ما اعتراضناش - واتعرض هنا أظن تذكر سيادتك فى مجلس الوزراء - وقلنا حتى كقاعدة: المخزون نصدره كمخزون وسهلنا شوية البيع المحلى وما بيتباعش، قلنا: يصدر لأى جهة، وأنا حتى قلت: ده بدل القطن اللى حأصدره أو بدل الأرز أو بدل أى سلعة أخرى، والمقصود مادام موجود يعنى إحنا..

صدقى: بس ده ماتنفذش لأن حوالى ١٢ ألف أو ١١ ألف ثلاجة ناقصها جزء؛ يعنى وردت أجزاء وفاضل لها جزء ناقص حاجة..

البشرى: عاوزة ٢٢ ألف جنيه بس.

صدقى: آه.. وبعدين قال: بلاش وقف هذا الانتاج!

زكى: المخزون بتاع كذا مليون.

صدقى: هذه الثلاجات عقود ممضية وجاهزة للتصدير، آهو الأخ عبد الوهاب كان تبعه المؤسسة الهندسية ويعلم هذه المسائل.

سرى للغاية

البشرى: ال ١١ ألف ثلاجة دول كان ناقصهم ٢٢ ألف جنيه نقد! وأظن جه دلوقتى.

صدقى: لا.. ما أنا بس باعطى صورة للأخ حسن؛ إن المخزون فى السوق كله مخزون كان له برضه صعابه.

البشرى: لأ.. هو مخزون مستجد، يعنى هى نزلت يافندم بعد التصدير.. نزلت أظن عندهم أربعة آلاف ثلاجة بس.

زكى: لأ.. كان فيه مخزون نهائى قابل للتصدير مش ناقصه حاجة بسبعة مليون جنيه!

صدقى: لا.. لأ.. كان ناقص بعد التصدير، لأ.. لأ.. هم كده.

البشرى: الثلاثجات بعد التصدير، أظن عندهم حوالى ٤ آلاف ثلاجة بس يعنى حاجة بسيطة بالنسبة للانتاج.

صدقى: لأ.. إحنا بنتكلم ك example للى أنت ذكرتته، إن أنا برضه حتى هذه السلع مش من مصلحتى إننى أوقفها يا حسن؛ لأنه برضه لازم أستمر فى انتاجها طالما إنها للتصدير.. يعنى أوقف الثلاثجات ليه إذا كان عندى عقود تصدير مش قادر أوفيهما النهارده؟! بالعكس أنا عايز أضع فى ميزانية السنة دى المبلغ اللازم لتشغيل مصنع الثلاثجات بطاقته الكاملة، علشان ألبى هذه الصادرات عايزين كمان نبيت فى موضوع الحر والاتفاقيات، طيب والنهارده الأرقام الللى بيعطيها السيد وزير الاقتصاد ماهى كلها بيقول: ميزان المدفوعات علينا نقص ٥٨ مليون جنيه، مافرتش بين اتفاقيات وبين حر لأن المديونية هى..

زكى: لأ.. مفرق ومعروف تفصيله.

صدقى: مفهوم.. مفهوم، لكن حاتلاقى الجزء الأكبر منها أيضا اتفاقيات، طيب حاسد المديونية دى إزاي إلا إذا كنت حأصدر؟! معلش أه.. نحاول أيضا نصدر بالعملة الحرة، لكن كمان إذا كان هناك سبيل الى تصدير لحساب الاتفاقيات لازم نصدر، وبعدين إحنا فرصتنا بالنسبة للانتاج الصناعى فى

سرى للغاية

التصدير من المنتجات الصناعية الى دول الاتفاقيات أكثر من دول العملة الحرة، وبعدين ينقال: لأ.. مادام دى فيها foreign component حر مانصدروش لدول الاتفاقيات؛ طيب إشمعنى الأرز بأصدره لدول الاتفاقيات؟! ما هو صالح للتصدير بالعملة الصعبة.. ماهى نفس القصة!

زكى: ماحدث منع تصدير الثلجات للدول الشرقية.

صدقى: ده أوقف الانتاج لهذا السبب ياحسن!؟

زكى: لأ.. ده أوقف الانتاج مش لكده؛ لأن فيه عجز. ده إحنا أمامنا أمر واقع، يعنى فيه عجز ما هو يأنقصه من هنا يأنقصه من القمح يامن الذرة مثلا، ماهو لازم ينقص هذا العجز!

صدقى: إذا كان بنستورد بـ ١٦ جنيه وأصدر بأربعين جنيه يبقى مثل هذا الانتاج لازم يستمر بطاقته الكاملة؛ لأن ده بجيب لى عائد مايجملنيش عبء؛ الحاجة اللى أنقص منها اللى هى حادفع ومالهاش مقابل، لكن ده أنا بقول: هذا المصنع بتعطينى ١٦ جنيه بأعطيك ٤٠ جنيه. صحيح السنة دى بتبقى ١٦ جنيه حرة بتأخذها ٤٠ حساب اتفاقيات، بقول: إن السنة الجاية هاتبقى الأربعين كلها جاية والمستورد أربعة بس؛ لازم نمشى بهذا الاتجاه أمال حانزود صادراتنا إزاي!؟

زكى: إسمح لى سيادتك.. أنا باتكلم فى مسألة بديهية خالص، إن فيه أصلا عجز، أنا لا أناقش فكرة التصدير.. ماحدث ضد التصدير وماحدث ضد أن التصدير يزداد!

صدقى: لأ.. أنا بأرد، إنت بتقول السلع الهندسية.. أصلك بتقول السلع الهندسية!

زكى: أنا بقول: إن عندى عجز فى الميزانية، ده أمر واقع يعنى عملية حسابية لامفر منها، بنقول: هذا العجز حانقصه من حاجة من الوردات، إيه هى الوردات دى؟! ماقدرش أنقصه من القمح، ماقدرش أنقصه من الذرة، إيه اللى أقدر أنقصه منه؟! بقول: آدى القطاعات المختلفة كل قطاع قدر ينقص شئ.

سرى للغاية

وبعدين إحنا كنا مقترحين إن مثلا لقطاع الصناعة ٧ مليون قدر ينقص ثلاثة مليون، إذا كان مافيش غير الثلاثة مليون يبقى لازم أدور على ٤ مليون أنقصها تانى من القطاعات الأخرى أو يتقال: إن الأربعة مليون تنقص ونبقى عارفين ثمنها؛ باعتبار إن احنا فى ظروف طارئة غير عادية.. يعنى علينا التزامات النهارده بالذات كثيرة قوى بتتطلب اليومين دول.. يعنى خصوصا الطوارئ بسرعة ببطلوا الزيادة بتاعتهم، فمش قادر أواجهها؛ الطوارئ والبتترول أرقامهم كبيرة قوى ودول ماأقدرش البترول أوقفه. فأنا خايف إن آجى أمر فى شهرين وأبص آلاقى العجز بيان بقى أمامى؛ بإنه مافيش موارد وفيه مطالب لاستيراد أو لدفع حاجات لازم تيجى.

محق الدين: إحنا طبعا متأسفين يعنى الموضوع بييجى ماتصفاش قبل ما نيجى هنا فى اللجنة، ولكن هو الواقع إن كان فيه إصرار من جانب القطاعات على استمرار الجدل فى هذا الموضوع، رغم إنه - زى مايقول حسن - مسألة بديهية. يعنى إحنا عندنا النهارده ثغرة موجودة ٥٩ لازم نغطيها حانغطيها بايه؟ بيعطى أسبقيات؛ فيه مجهود حرقى بأعطى له أسبقيات عن أى ناحية تانية، وبعدين القطاعات نبهت على إنه لو إحنا نقصنا بنسب معينة حايترتب على هذا إنه حايحصل drop فى الانتاج فى بعض النواحي.

فإحنا كلامنا قلنا: إحنا نسلم بهذا، بس قولوا لنا مدى الـ drop فى الانتاج حايكون قد إيه؟ وحايثأثر بالصادر بأد إيه؟ حايثأثر الاستهلاك بأد إيه؟ يقولوا لنا هذا الكلام، يعنى لغاية النهارده مكانش عندنا الحقيقة بيانات بهذا الموضوع! وأنا طبعا نبهت حسن لهذه النقطة بالذات وقلت له: إنها حاتكون مثار مناقشة برضه تانى. فإحنا لازم يكون عندنا بيانات كاملة عن إيه الأثر الناتج من اقتراحات الاقتصاد بتخفيض هذه المبالغ.

يعنى إنت لما بتقول ٧ مليون جنييه أو ٥ من الصناعة، مفروض إن عزيز بيجاوب يقول حايحصل كذا كذا بالأرقام، كان النهارده ده الشئ الللى يكون واضح أمامنا علشان نقدر نشوف إيه الأثر المترتب على هذا.

صدقى: البيان جاي دلوقتى - سيادتك قلت لى الظهر - البيان حاييجى لى دلوقتى.

سرى للغاية

محي الدين: ده أنا متصور إن الكلام عندك قبل كده ياعزيز الحقيقة يعنى.

صدقى: لأ.. هو اللي احنا فهمناه، إنه مطلوب هل ممكن خفض رقم الاستيراد بهذا الرقم بس؟ إنما ترجمته..

محي الدين: والأثر المترتب على هذا؟

صدقى: نجيبه أيضا.

محي الدين: لأنه لامفر من إن احنا حانزل قطاعات.. حانزل من أين؟ مطلوب مننا مبالغ معينة للمجهود الحربي.. فيه الزيادة اللي هي الـ ٢٤ مليون جنيه بتوع المجهود الحربي.. أفكر ياحسن مش كده!

زكى: أيوه.. والبترول.

محي الدين: والبترول لابد من هذا، فأجى على حساب مين؟!

سليمان: هو فيه باب إضافي، إن احنا نشغل.. بأشغل للتصدير يعنى باستورد وياصدر بدل ماآجى أقول فى ميزانية الاستيراد: أحكم إنى ما أقدرش أعطى إذن استيراد إلا فى حدود رقم كذا. بقول: أزود هذا الرقم بقدر، على أنه يكون مقابل هذه الزيادة كل هذه الخامة اللي جاية مخصصة للزيادة فى التصدير عن الهدف المحقق.

محي الدين: فى خلال هذا العام؟

صدقى: فى خلال نصف العام.

محي الدين: لغاية شهر ستة يعنى؟

سرى للغاية

صدقى: يعنى لو أنا بيعطينى ٣ مليون جنيه زيادة وأقدر أصدر مقابلهم بما يعادل ٣ مليون أو أكثر؛ يبقى لازم أمشى فى هذا الاتجاه.. بنحسب هذا ده اللى أنا أقصده. يعنى مثلا موضوع الثلجات، أنا لقيت إنه بإضافات بسيطة يعنى هى الثلجة جاهزة ٩٠٪ فاضل لها شوية تشطيبات، الحاجات دى بتيجى فى ثلاثة أيام بتبقى الثلجة جاهزة للتصدير وعندى العقود جاهزة، فأنا بقول: مثل هذا الاستيراد لا يعتبر عبء على ميزان المدفوعات، بس عايزين نراجع الموقف بالنسبة..

معى الدين: هو طالب منك زيادة التصدير بعشرة مليون جنيه، وإنت بتقول: لا يمكن تحقيقها لغاية شهر ٦، ممكن تتحقق بعد كده.. معنى هذا الكلام إنه مطلوب تصدير فى حدود ١٧ مليون جنيه؛ مثلا اقتراح الاقتصاد يعنى ١٠ + ٧ اللى هو عايز يخفضها من الاستيراد. وإنت بتقول: لأ.. أزود بها الصادر أحسن يبقى معناها حصيلة، طيب ياريت تقدر نحقق هذا؛ تتفق معايا فى رأى.. حسن؟

صدقى: لا.. لأ.. بس أوضح كلمة، أنا بدى أفرق، بس هو بيقول: طالب ١٠ أنا بقول: له مستحيل! لما بيجى يقول لى: مثلا إحنا مطلوب إن الصناعة علشان نوازن نجيب ٥٨ مليون زيادة بتوع صادرات الصناعة، بقول له: لأ.. هو طالب ١٠ مليون، الرقم الحقيقى إن احنا هنقدر حانحاول يمكن نتعاقد على حاجات بعشرة مليون حصيلة الانتاج خلال الفترة لغاية يونيه، مش حانتبقى العشرة مليون جنيه دى حانشوفها طبقا للتعاقدات. إنما أنا باتكلم على الجزء الثانى اللى هو سبعة مليون، معنى الخفض إيقاف انتاج؛ إذا كانت الخامة دى جاية للتشغيل فى مصنع وماجاتش.. يبقى إيقاف انتاج! أنا بقول: بدل ما أوقف انتاج، إذا كان أنا باجيب الخامة وبارجع تانى أصدرها يبقى هنا ما حملتش ميزان المدفوعات شئ.

يتبقى النقطة الأخيرة.. هل هاتيجى الخامة قبل يونيه وحارجع أصدرها قبل يونيه؟ يعنى هو ميزان المدفوعات يوم ٣٠ يونيه - ده إحنا اللى محددينه يعنى - لو كانت العملية دى شايفينها إنها مفيدة، وليكن إن أنا بتجلى الحصاة فى يونيه وبعدين التصدير بيتم فى يوليو مايجراش حاجة.. يعنى أنا عايز بس المرونه إن احنا نشتغل؛ لأن أنا عاوز أوصل فى النهاية الى الآتى: الى متى حانفضل نقول نخفض؟! طيب خفضنا وأوقفنا الانتاج طيب والسنة الجاية حانعمل إيه؟!

مرعى: طيب ماتاخذ ال reforming capital؟

سرى للغاية

صدقى: ماهو ده اللى أنا طالبت به بالضبط، معنى اللى أنا بقوله هو هذا: إن أنا بالنسبة لتشغيل إضافى للتصدير هو ال reforming capital بأخذ الاستيراد.

مرعى: يعنى تاخذ بس مليون جنيه بدل ٣ مليون جنيه وتوضب نفسك بيهم، على أن الحصيلة بتاعتهم حتاخذها عندك أنت فى القطاع للعملية نفسها.

صدقى: مش حاتيجى فى نفس السنة، أصل لما بنيجى نستورد بتيجى الخامة بنفتح الاعتماد.

مرعى: ده بالنسبة للثلاجات مثلا؟

صدقى: الثلاثة مليون جنيه ماهياش كلها ثلاجات، أنا باتكلم كوضع عام.. كوضع عام للدولة فى تشغيل الدولة كلها. يعنى يافندم، إذا كنا عايزين نشتغل أنا ماأقدرش أشتغل بحيث إن لو ماجاتش قبل يونيه طيب خلاص مافيش! لأ إذا شايفين إنها فيه فائدة حتى لو كان التصدير حايتم فى يوليو أو فى أغسطس، يبقى نشوف ندبرها إزاي فى الميزانية اللى قبل يونيه، ليه؟ لأن بهذا الأسلوب بأحل ما بعد يونيه، وإلا طيب مافيش وحاندخل على السنة الجاية ونرجع تانى لنفس الإشكال؛ حانمى صادراتنا إزاي؟!

ماهو الحقيقة إحنا مكتفين نفسنا وفضلنا نكتف فى نفسنا، والأسلوب negative باستمرار نقص.. نقص لغاية ماأبتدينا نأكل من اللحم، مش هانقدر ننقص علشان نصدر؛ لازم نشتغل.. خامة التشغيل مابتجيش طيب وبعدين!

قطاع الغزل اللى عايزين نصدرة زيادة ١٠ مليون جنيه، كان ممكن نزود لو إن أخذنا مكن توريد ب ٦٠٠ ألف جنيه، مأخذناش! ليه؟! ماهو بنيجى نقول: ميزانية المدفوعات آهى ومافيش نقد يبقى بلاش نقد للآلات! يعنى أنا بأوسع أفق النظرة شوية بأنى أقول: والله إذا كان ال ٦٠٠ ألف السنة دى هاتحل لى جزئيا، والسنة الجاية هاتجيب لى كل سنة زيادة بدل ٦٠٠ بيبقى مليون واتنين؛ باضغط على نفسى بأى أسلوب وأمشى ال ٦٠٠ ألف. هو ده المخرج الوحيد، أما إن احنا نيجى نحط أرقام وبعدين يعنى أى رقم حايتقرر هنا ما إحنا حانقول حاضر ننقص، مافيش أصواف فى السوق مش ضرورى! هو إحنا اللى بنشتكى لكن هل ده بيووجد حل؟!

سرى للغاية

زكى: متهيألى الموضوع يعنى بس إذا سمحت لى، هو المسألة إحنا بنقول: فيه اقتصاد حرب واقتصاد حرب اقتضى إن احنا نعطى للمجهود الحربى وللظروف التى حصلت للبترول أكثر من اللى بياخده العادى؛ فهذا الظرف الاستثنائى فكنا أضطررنا إننا نضغط وارادتنا علشان نقدر نمول هذين البندين، أما من الناحية العامة مافيش انكماش مافيش نقص وفيه زيادة فى الصادرات وفيه حركة وفيه كل حاجة.. يعنى مافيش هزة.

هو جت للظروف الطارئة اللى حصلت، وبعدين بعد المبالغ اللى أخذناها من الخرطوم جدت أمور خلت إن مازال فيه عجز، ومواجهة هذا العجز أمر ضرورى. هنا الإجراءات اللى عملناها كان الغرض منها إنها تزود الصادرات.. تزود الصادرات نتيجة أن يبقى فيه الاستهلاك قل عندى مثل المنسوجات، وفيه مخزن فى المنسوجات مافيش شك فى ذلك، فلما حصرنا هذا قلنا: إن فيه مخزون مش أقل من عشرة مليون جنيه.

عبد الناصر: بس هو له رأى وجيه، فى إنه ممكن يصدر بعشرة مليون بس مايجيش قبل يونيه.

زكى: ما أنا قلت هذا من الأول.

عبد الناصر: يعنى ممكن ييجى يوليو وأغسطس وسبتمبر وأكتوبر وينفكك للسنة الجاية، ونقول: لأ.. إذا كان مش ممكن يبقى.. لأ.

زكى: ما أنا عايز أرد على أن نقول له: لأ.. لأن ماحدث قال: لأ.. مافيش حد، هو لو أى حاجة تتصدر وتيجى بعد كده تساندنى.

محي الدين: هو قال الكلام ده قبل كده.

زكى: مش بقول: لأ.. أنا قلت الكلام ده بنفسى.

سرى للغاية

محي الدين: يعنى أنا باقتراح على السيد الرئيس إن احنا نؤجل هذا الموضوع للجلسة القادمة، على إن عزيز يتقدم للاقتصاد بحاجات concrete محددة؛ بالذات باقتراحات بديلة لاقتراحات الاقتصاد بالأرقام. هو ده الشئ اللى يحل، وإذا ماتحلش بالطريقة دى يبقى حل الاقتصاد هو اللى يمشى.

صدقى: هو نتيجة الخفض على أنواع المنتجات جه الآن، بس كنت عايز أقرأه بس قبل ما أعرض، حللناها الى يعنى كام متر صوف حاينقص؟ كام فانلة حانتقص؟ كام بطانية حانتقص؟ خامات السجاير حانتقص؛ علشان يبقى أمام الدولة إذا رأت إن الحاجات دى تنقص من السوق مافيش مانع.

زكى: إحنا لما قلنا إن فيه فائض فى المنسوجات..

عبد الناصر: ماخلصنا، قلنا حاتبحثوا الموضوع ده!

زكى: لكن ماقلناش إن لازم بييجى فى نفس السنة. أنا باتكلم على ميزانية مطلوب منى أدفع النهارده قمح، أدفعه النهارده مش حأقول له استنى لما تيجيلى فلوس المنسوجات بعد ٨ أشهر. فالتمويل إحنا مزنوقين فيه.. يعنى يصح أنا كنت أقدر آخذ تسهيلات أكثر من بعض البنوك علشان أمول.. وماشييين إحنا كده.

عبد الناصر: طيب مايعطيك المنسوجات وإننت بيعها وهاتها دلوقتى قبل يوليو.. إعطى له المنسوجات ياعزيز علشان تدفع يعنى.

صدقى: ما هم اللى بيصدروا يافندم.

زكى: لأ.. المنسوجات والغزل إنتم اللى بتصدروها.

سليمان: يعنى ماهو عن طريق شركات التجارة.

سرى للغاية

زكى: لأ.. الغزل والمنسوجات هو إنتم اللي بتصدروه، أما مابقولش إحنا نحاول أى حاجة قابلة للتصدير ناخده، أنا يوم ماخاذه حاعمل به مبادلة ماأقدرش أسويه يستنى؛ لأن لازم أعمل به مبادلة وأجيب سلع قصاده. ماأقدرش، لازم أربط العمليتين ببعض علشان أجيب سلع؛ آخذ الغزل والمنسوجات لسلع لازمة للصناعة المطلوبة.. دى أقوم أقدر أغطى العملية.

عبد الناصر: طيب إذا كان عنده غزل منسوج ماناخذة نعمل به مبادلة!

زكى: آه.. طيب ماهو أنا بأخده باشتغل.

عبد الناصر: عندكم غزل منسوج؟

صدقى: أيوه يافندم، إحنا بنصدر حصتنا المقررة وبنحاول إن احنا نتجاوزها وتعاقدنا فعلا على كميات تتجاوزها، مواعيد التسليم بتبقى مرتبطة بالعقد اللي أنا باتعاقد عليه النهارده، بيبقى ميعاد التوريد لأغسطس وسبتمبر. ده بقول: الحصيلة بقى النقد الكامل الذى سيتم تحصيله مش حايلحق قبل يونيه.. ماشيين فى هذا.

أنا باذهب الى الناحية الثانية اللي الأخ حسن بيقلها، هو عايز يقطع عنى ٧ مليون جنيه استيراد.. بينقص الاستيراد بتاعى ٧ مليون جنيه من هنا ليونيه! أنا بقول: نقص هذا الاستيراد حاينعكس على إن أنا حأضطر أنقص حاجة محددة هو ذكرها.. اللي هى السلع الهندسية. أنا بقول: السلع الهندسية أنا مش عاوز أنقص من الخامات اللازمة لها لسبب؛ لأن أنا عندى عقود تصدير لهذه المنتجات إذا كان ماخا نمشيش فى هذا الاتجاه.

أنا فى الحقيقة بأناقش الموضوع من أساسه يافندم. سيادتك.. الموضوع ده بالذات للمرة الكام بنناقشه؟! وبعدين ميزان المدفوعات كل سنة بيسوء عن السنة اللي قبلها، ليه؟! لأن بنمشى بحل سلبى، كل الحل والله عندنا نقص كذا نمنع الاستيراد. أنا بقول العكس: الحل إن احنا نوجد موارد للتصدير متزايدة، وهذا لا يتأتى إلا بتوفير الإنتاج.. توفير الإنتاج يتطلب توفير مستلزمات الإنتاج؛ عملية تمشى مع بعضها. إنما كوننا كل مرة نقعد ونجيب أرقام ونقول على آخر يونيه حايبقى مستحقات على كذا، طيب أنا أقدر أسأل السيد وزير الاقتصاد.. يقول: نقدر نؤجل ٣٠ مليون، طيب ليه مانقدرش نؤجل ٥٨ بجهود معينة؟!

سرى للغاية

زكى: الـ ٣٠ مليون دى نقدا التزامات.

صدقى: لا.. لأ.. سيادتك بتقول: إنا حاناول نؤجل.

زكى: دى التزام دين مش ثمن بضائع.

صدقى: ما أنا فاهم.. أنا فاهم يعنى الدين حاناول نؤجل الأقساط والسداد؛ بحيث إنك ترحله الى ما بعد يونيه فحليت ٣٠ مليون من ٥٨ مليون.. ده اللي ذكرته دلوقتى. يمكن بمجهود أكثر بنقدر نخليهم ٤٠، زى مايتطلب من القطاعات إنها هى بتبذل مجهود أكثر، برضه نطلب من القطاع الاقتصادى يبذل مجهود أكثر ويوفر ١٠ مليون جنيه.. العشرة مليون جنيه دى مش حاناخذها نستهلكها، بقول: نشغلها علشان نوجد حل.

أنا شايف إن احنا الاقتراحات دى باستمرار لا توجد حل! طيب إحنا لو مشينا الكلام ده يأخ حسن، السنة دى هنعمل إيه؟ عدينا ٣٠ يونيه، ٥ يوليو حاعمل إيه؟! حانطلب ميزانية نقدية حاتجيب برضه أرقام العجز؛ ويبقى معناها إن احنا نوقف الانتاج فى كذا.. ونوقف الانتاج فى كذا مابنحلش، حانروح فين بس!؟

زكى: بس إحنا صادراتنا الصناعية كلها الغزل والمنسوجات هو الأساس فيها مافيش حاجة تانية تصمد، الغزل والمنسوجات قعد يتزايد وصل الى ٥٥ مليون، مستلزمات الانتاج للغزل والمنسوجات كلها محلى الكيماويات بتصنع هنا، وإذا كان حاجات باقية بسيطة. فالقول: بإن فيه إنكماش فى العملية.. مافيش.

صدقى: هل هنقف بس على إنه غزل ونسيج؟

زكى: دى حاجة، الحاجة التانية..

سرى للغاية

صدقى: أنا يافندم عندى عقود مضيها بأكثر من ١٠ مليون جنييه، كمان عندى عقود أحدىة أحزمة بلاطى براندى بيره.. للتصدير. علشان أصدر دى عايز أستورد، وحصه الحاجات اللازمة لهذا الانتاج فى الميزانية النقدية غير موجودة! يعنى أعطى مثل: علشان أصدر البيرة حأشغل مصنع ياسين يعمل زجاجات عايز ٦ مليون زجاجة.. مصنع ياسين يستطيع ينتج ٣ مليون، حأستورد ٣ مليون زجاجة.. حاستوردهم على السماح المؤقت وأعيد تصديرها.

هذا الانتاج الكبير للتصدير، محتاج لحصه نقدية مكانتش واردة فى ميزانية المدفوعات. لو كنت آجى أقول: لأ.. الصناعة ماتأخدش أكثر من اللى كان مقرر لها، يبقى كأنك بتمنعنى من أن أحدث هذا الانتاج الذى سيحدث تصدير؛ وهذا التصدير حايجل المشكله سنة بعد سنة. فأنا بقول: إن الأساس إن احنا نخلق فرص للتصدير إضافية، أنا بقول: ١٠ مليون؛ هذه الأنواع الجيدة غير التقليدية ممكن أن تصل الى أرقام كبيرة.

الصناعة يافندم السنة دى بتغذى ميزان المدفوعات، وأنا لما بقول: صناعة.. يعنى بادخل فيها البترول على أساس إنه كان قطاع على بعضه. هل إحنا كنا كده من زمان؟! كنا مستوردين، وكان باستمرار يقال: إن احنا الصناعة محتاجة لكذا. ده جاء إزاي؟ بإنك تزود الانتاج.. لازم الانتاج يحدث أولاً وبعدين يبقى فيه فائض فى التصدير؛ لأن احنا ميزانيتنا النقدية السنة دى كانت ٧٠ مليون والتصدير ٦٠، لما ندخل البترول فيها - إذا كان فيه فائض ١٠ مليون فى البترول - يبقى وازنا نفسنا، وأنا أعتقد إن المفروض يبقى فيه فائض أكثر من كده فى البترول.. وده الأمل الوحيد.

المذكرة اللى مقدمها الدكتور القيسونى النهارده بتاعت الزيادات، مش الجزء الأكبر جاى من الصناعة؟ الصادرات الصناعية بنسبة ٧٪ ثم ١٠٪ سنويا، والدكتور القيسونى كاتب إن ده بيان أنه أمل كبير يعنى يمكن يصعب تحقيقه. أنا بقول له: لأ.. مش كبير بس لازم نوجد له الإمكانيات إنه يحدث.

الزراعة محطوط لها ٢,٥٪ ولا ١,٥٪، فليس لنا أمل إلا أن نوفر إمكانيات الانتاج الصناعى.

زكى: مابناقش الموضوع ده يعنى مأثرتوش، أنا مش باختلف فى الكلام ده أنا باتكلم على إن احنا فى حرب.

سرى للغاية

صدقى: ما إحنا نبدأ من هنا.. نبدأ من هذا يا حسن دلوقتى.

زكى: أنا واحد يعنى عندى عجز حصل نتيجة إجراءات معينة، كون الإجراءات كلها اللي بتتقال دى ماحدش ضد زيادة التصدير ولا تشجيعه، وكل العقود دى ما إحنا مشتركين فيها وعاملينها وحانطى الأموال وعارفين البنود دى عايزة إيه، وكل ده وإحنا عارفين البنود ماشية إزاي وحانطى وفيه الصادرات غير التقليدية وروسيا لوحدها هتاخذ بسبعة مليون جنيه.. مابقولش لأ.. وحانطى أكثر بعدين.

لكن أنا باتكلم على ظرف طارئ الآن، وهو إن احنا عندنا حساب المالى.. اللي جه أد كده واللى طالع أد كده وفيه عجز! بدنا ندبر هذا العجز، مابقولش ده إحنا حاطين أهداف نزود الصادرات ونزود كذا ونقل المصروفات غير المنظورة وكلها حاجات كثيرة داخلية فى الاعتبار، وبعدين برضه لم ننقص كل السلع.. ده كل اللي فى الصناعة كل اللي بنقول نقصه من السبعة ده كله موجود هنا. يعنى بس إحنا بدل ما نجيبه من الخارج وأضعه فى المخزن حناخذ من المخزن.

صدقى: لا.. لا.

زكى: مثلا وبعدين تتبقى الـ ٣ مليون، هو ده الرقم الأساسى اللي هو بتاع السلع الهندسية الثلاثة مليون ده؛ يعنى بنشوف مش ده اللي أثر على ميزانية الدولة أو غير سياسة الدولة فى الصناعة أو فى التصدير.. مافيهش حاجة من دى أبدا.

وأنا بقول: إذا كان فيه صادرات إحنا مابنعطلهاش؛ لأن فيه عجز مخزون فعلا موجود بأد المبلغ ده مرتين ثلاثة، إذا نقص نص مليون.. مليون يأخذ هذا المبلغ ويصدر كل المخزون. وبعدين فى خلال شهرين ثلاثة طبعاً ماحدش قال الميزانية القادمة هى كده؛ لازم الظروف تتغير، وإن شاء الله الجو يأخذ شكل تانى ونرجع لميزانية عادية مثلا اللي بيها مش بنفس الظروف الطارئ الآن اللي احنا بنواجهه.

مسألة تأجيل الالتزامات، ده التزام على ولازم أسدده وحانقاوض فى تأجيله، الباقي مش التزام ده ثمن بضاعة؛ يعنى معنى هذا لازم أجيب حد يعطينى قمح ويقبل سداده بعد سنتين، مين حايبرى ده كده!؟

سرى للغاية

إحنا بنحاول طبعاً وجبنا عقود كده ومازال عندنا بعض عقود بهذا الشكل، لكن بعد كل هذا أيضاً فيه هذا العجز. ده اللي أنا بقوله ده إجراء استثنائي بمناسبة الظروف الاستثنائية اللي إحنا فيها، فلا بد إن كل قطاع يقبل وضع معين للغاية ما نمر من هذه المرحلة لأن إحنا عندنا عبء إضافي؛ سواء كان ٢٤ مليون جنيه لوحدهم بتوع الطوارئ أو أد هذا المبلغ وزيادة، مثلاً للبتترول مكانش فى الحساب دول ولازم أوفيهم.

محي الدين: دلوقتي هو اقتراح عزيز المقابل، أنه هو بدل ما تستقطع منه فى الخامات ومستلزمات الإنتاج ٧ مليون جنيه، هو يزود أهداف الصادر بتاعته بسبعة مليون أخرى. طبعاً إنت حاتيجي تقول: أنا إيش ضمنى هو حايصدر دى ولاّ لأ وإمتى؟! فيصح إنه هو يضع برنامج زمنى يعنى فى خلال مثلاً مدة معينة، ونقبل أن هذه المدة تتجاوز شهر يوينو أو يوليو، ولكن يبقى فيه توقيت زمنى إنه فى فترات معينة بييجيك إيراد نتيجة تصدير بدل ماتستقطع من المستلزمات.

ده هو الاقتراح المحدد اللي أتصور أنه خلاصة كلامه، فدى النقطة اللي محتاجة الى بحث بين وزارتي الصناعة وبين الاقتصاد علشان نصل الى رأس محدد بالنسبة لهذا الموضوع. معنى هذا إن البضاعة اللي حاتيجي ممكن ناخذ عليها تسهيلات.. نشترها مثلاً بتسهيلات فى حدود ٦ أشهر ٧ أشهر ٨ أشهر.

زكى: إحنا واخدين دلوقتي كميات كبيرة من التسهيلات وهتبتدى تزيد.

محي الدين: لأ.. يعنى إحنا مش هناخد تسهيلات فى حدود سنتين. إحنا نأخذ تسهيلات مثلاً فى حدود أقل من سنة؛ يعنى ده المفروض إذا كان الكلام ده يتحقق يبقى أنا موازن نفسى وماقدرش الحقيقة أقول إن الميزانية للغاية شهر يونيه.. فيه تداخل فى الميزانيتين طبعاً. أنا مقدر وجهة نظر الاقتصاد بأنه يعنى قلق على أن هو مطلوب منه دفع ومش ضامن أن الشئ ده حايتصدر فعلاً، لكن إحنا نلزم القطاع الآخر ببرنامج معين.. برنامج قريب مش بعيد يعنى مش لسنتين مقبلة أنا باتكلم لشهور مقبلة مش لسنتين مقبلة. معرفش رأيك إيه فى هذا الموضوع؟

الشافعى: يعنى فى خلال السنة المالية يعنى؟

سرى للغاية

محي الدين: لأ.. نتجاوز السنة المالية شوية يعنى.

صدقى: تمتد لديسمبر مثلا بحيث نرجع المبلغ.

زكى: هى المسألة مش مسائل يعنى إحنا بدنا نوفر للبلاد سلع لازم تتوفر.. قمح ودقيق وذرة وحاجات من دى.

الحاجات الثانية، أنا بقول: لما بيبقى فيها مشكلة مش حاتعمل لى إشكال اجتماعى - أنا باتكلم على السياسة العامة - فمن هنا ما احناش مستعدين نأخذ مخاطرة أبدا فى السلع التموينية، أنا عامل حسابى لازم السلع دى تيجى لآخر يونيه ويكون فيه فى يونيه ويكون فيه مخزون شهرين ثلاثة، فيما عدا ذلك بيقى غلط.

فبقول عشان أقدر أمشى فى السياسة دى كده: لازم بعض القطاعات مش بقول تتعب يعنى تدوس شوية لفترة؛ فالقطاع ده بثلاثة مليون وده اتتين مليون وده أربعة مليون وخمسة مليون، وإحنا أخذنا على عاتقنا كمية كبيرة حانحاول نجيبها بائتمان ومش عارف إيه، ولسه إشكال هنواجهه السنة الجاية نبقى نشوف له حل.

لكن بقول: لهذا السبب هى المسألة مش مسألة التصدير، كل الكلام ده ماهو طبيعى وبديهى ومفروض إنه حايمشى وإلا هى الخطة كلها علشان إيه! ولكن أنا بقول: فى الفترة الحرجة اللى بنمر فيها، يعنى ببقى كل قطاع يقبل بشئ صغير من أنه يعنى انتاجه يقل بقدر ما. أنا مابقولش للقطاع إيه اللى تقلله؛ لأنه هو أقدر منى، وأنا بقول: بدل ما ببقى أنا مضطر لما مش ده هيتم.. ماهو أنا مضطر هعمل كده لأن أنا عندى خزنه وبأدفع؛ بيحى يقول لى قمح أعطيله بيحى يقول ما عنديش إلا أد القمح حأعطى القمح وما أعطيش لغيره، مش عاوز أوصل لهذا طبعا وإلا ببقى ما فيش تخطيط.

فعلشان ما أوصلش لكده بقول: الحسبة بنقتضينى من الآن إن القطاعات تقوم تنزل، فأنا طلبت ٢٤ مليون فماوصلوش إلا لعشرة مليون، علينا ندبر ١٤ معاهم تانى أو نشوف لها حل. فأنا كل اللى كنت برجوه إنه السبعة مليون كلها اللى على الصناعة إذا قبل ٥، ٥، ٥، ٦ وبقى نشوف الفرق الباقى، بدل مانخش فى عملية الأهداف والأهداف الثانية للتصدير بيقى نشوف لها علاج تانى؛ لأن هى عملية أخرى جانبية، بس أنا بدى أحل مشكله عاجلة وهى أن ببقى فيه نوع من التوازن فى السيولة بتاعت توفير النقد اللازم للتمويل المحلى.

سرى للغاية

البشرى: هو فى الواقع الموضوع يمثل مشكل فعلا، ولذلك بيقبل وجهتين نظر متعادلين معقولين خالص وجهة

نظر اقتصاد ووجهة نظر صناعة. إنما أنا متهيألى الموضوع لازم نقسمه الى مرحلتين:

مرحلة المشكلة الحالية وعلاجها ودى يمكن عايزة إجراء معين، ومرحلة طويلة الأمد الللى

هى إجراء كسياسة مستقبلية وإيه الللى حانعمله ابتداء من الميزانية القادمة والميزانيات الأخرى.

أنا بقول: فى علاج السياسة المستقبلية، يجب أن يكون متمشى لحد كبير مع الاقتراح الذى

أشار إليه الأخ الدكتور عزيز صدقى؛ إن احنا السياسة الللى تخلينا ننكمش فترة بعد أخرى فعلا

بتخلينا نتقلص فى الإمكانيات، ودى برضه يخشى عليها إنها حتى تضعف العود الانتاجى أو القدرة

الانتاجية الموجودة. فإحنا فيما يختص بالميزانيات القادمة، يجب أن نهدف الى التوسع باستمرار

وزيادة الانتاج باستمرار، ولو أدى هذا الى إننا هيبقى فيه عبء شوية على المستلزمات، وتبقى دى

برضه مشكله إخواننا الإقتصاديين يعاونونا فيها إن احنا نجتاز هذه المرحلة ونتعاون سويا كمشكلة

مشتركة.

إنما الموضوع الللى أمامنا فعلا دلوقتى، برضه أنا مقدر وجهة نظر الأخ حسن عباس زكى؛

إن فيه مشكل قائم فعلا وإن فيه مواد تموينية رئيسية، ومش عاوز يعمل موازنة على الورق هو عاوز

مبلغ نقدى علشان يقدر لما يقول هوفر زيت أو شحم أو سمسم أو شاي أو بتاع بكميات معينة، ببقى

بيقول هذا الكلام عن يقين ماهواش عن احتمالات معينة.

برضه مقدر وجهة النظر بتاعة الأخ الدكتور عزيز ووجهة النظر بتاع السلع الصناعية، إن

من الصعب برضه فى الفترة القصيرة المتبقية إن احنا نحمل قطاع الصناعة فوق الصادرات

الموجودة دى؛ بأنه صادرات أخرى يلتزم بها قبل يونيه أو حتى زى سيادتكم ماتفضلت وأشرت يعنى

الأشهر المتابعة ليوليو.

لذلك بقول: إن المخرج من هذه العملية، ببيكون بالاقتراح الذى أشار اليه السيد نائب الرئيس؛

الللى هو الدراسة التحليلية، نمسك العملية على سلعة.. سلعة وبعدين لما نشوف الأثر الذى سيحدث

من التخفيض على سلعة معينة، يمكن لما تبرز السلعة الفلانية حانتقص بالشكل الفلانى يمكن

تعطينا impression معين، والسلعة الثانية لما تنقص بالقدر الفلانى يمكن تدينا impression

آخر. فأنا متهيألى وسيلة الخروج من المرحلة الوقتية دى، لازم نخلص منها بأننا نعملها على مستوى

السلع، ونقبل بعض التضحيات فى هذه الفترة من هنا الى يونيه فى سبيل أننا بنعبر جسر وبنعبر

المشكلة إن احنا بنوفر السلع التموينية الرئيسية.

سرى للغاية

إنما فى نفس الوقت، يجب برضه وإحنا بنبحث هذا الموضوع أن يمتد بصرنا الى السنوات القادمة؛ لأن الحقيقة مانقدرش نقول إن فى السنوات القادمة هنقدر نمشى بهذا الأسلوب اللى فعلا اتبعناه فى اقتصاديات الحرب واتبعناه بعد العدوان واتبعناه فى السنة الماضية اللى هى سنة الانجاز؛ لأن احنا بقى لنا دلوقتى يمكن ثلاث حلقات بندخل فى عملية خفض للميزانيات النقدية مرة بعد الأخرى.

ففى هذه الحدود، يبقى دلوقتى برضه نعبر الحنة دى ونقبل بعض توضيحات فيها مافيش بأس، بس نعرف مدى التوضيحات بتاعتنا على الورق. وأظن الدراسة مفصلة دلوقتى ممكن تنقال أو الأسبوع القادم، إنما يجب إن احنا من دلوقتى برضه يمتد بصرنا الى وضع سياسة للعام القادم، وزى ماقال الدكتور عزيز: إن ميكونش هدفنا مركز على إننا نخفض المستلزمات بقدر ما يكون هدفنا مركز على إننا نزيد من حصيلة الصادرات ونزيد من الانتاج بقدر الإمكان. وطبعا تبقى مشكلة مشتركة ما بين الصناعة والاقتصاد.

القيسونى: هو يافندم، يمكن كانت مشكلة التمويل مدة طويلة بين الصناعة من جهة وبين الاقتصاد والخزانة من جهة أخرى؛ إن المبالغ ليست كافية للصناعة أو لا تأتى فى التوقيت المناسب. وبعدين إحنا حلينا أفكر من سنة ١٩٦٤ أو ٦٣ المسألة بتاعت التمويل الداخلى عن طريق إننا قلنا يعنى: كان فى الميزانية أرباح مفروض إن الصناعة تسلمها للخزانة وبعدين من جهة تانية الخزانة تعطىها التمويل المناسب.

فاتفقنا مع الدكتور عزيز، أن نعطى له الفرق بين الأموال اللى مفروض أنها تعطىها الخزانة والأموال اللى مفروض هو يكون وردها للخزانة؛ يعنى مثلا إذا كانت أرباح ٨٠ مليون جنيه والتمويل ١٢٠ فإحنا نلتزم.. الخزانة تلتزم بال ٤٠ مليون جنيه فرق وتدفعها مثلا على أقساط شهرية. فدى حلت الإشكال، وأفكر من الناحية المالية يعنى مشينا على الموضوع ده عدة سنوات من غير صعوبات.

بعدين اقترحنا إننا نتبع نفس الأسلوب فيما يختص بالنقد الأجنبى، ونشوف إيه قيمة الصادرات اللى مفروض أن الصناعة تصدرها وإيه قيمة المستلزمات اللى محتاجة لها الصناعة، وبعدين إذا كان فيه عجز يبقى تلتزم به وزارة الاقتصاد وتسدده للصناعة أو تضعه تحت يد الصناعة بأقساط شهرية.

سرى للغاية

وهذا الأسلوب حاولنا نطبقه أظن سنة ١٩٦٥ وبعدين يمكن عدلنا عنه. أنا بقول: يمكن الدراسة تشمل العودة الى التفكير فى هذا النظام، وده يعنى مقترح فى المذكرة المعروضة النهارده؛ لأن بالشكل ده نحن نضع الأهداف ونلزم القطاع قطاع الصناعة فى هذه الحالة بتحقيق هذه الأهداف.. يعنى مثلا قطاع الصناعة بيقول حايسدر ٨٠ مليون جنيه وبيحتاج مستلزمات ٩٠ مليون جنيه، فبنفق من أول السنة على الـ ٨٠ وعلى الـ ٩٠ وبعدين يبقى كل اللى يدبره الاقتصاد ١٠ مليون تضعها تحت تصرف الصناعة بمليون جنيه كل شهر.

وبعدين إذا الصناعة عملت عقود إضافية وعملت صادرات إضافية زى الصادرات الموجودة حاليا، فممكن إنها تحصل فى صندوق النقد الأجنبى بتاع الصناعة.. ممكن إنها تحصل على كامل قيمة أعلى النسبة المتفق عليها لقيمة الصادرات الإضافية هذه وتستخدمها فى زيادة العجلة، وبعدين إننا نندفع فى العملية الإيجابية أو فى الاتجاه الإيجابى للتوسع فى الصناعة أو التوسع فى التصدير اللى أنا متأكد كلنا عايزينه.

هى المشكلة اللى أنا شايفها دلوقتى - إذا اتفقنا على صندوق الصناعة أو صندوق النقد الأجنبى للصناعة - يعنى المشكلة اللى أنا شايفها دلوقتى هى مشكلة ٢ مليون جنيه أو ٤ مليون جنيه، يمكن برضه الدراسة التفصيلية للموضوع تبين لنا..

صدقى: والموضوع مش موضوع الأربعة ولا ٢، ده موضوع المبدأ، الكلام اللى الدكتور القيسونى بيقوله والسيد النائب زكريا محى الدين كان كلمنى فيه وأنا وافقت، قلت له: آه.. يعنى إذا كان عندنا إحنا النهارده تطالبونى إن أنا التزم بتصدير معين؛ يبقى الاستيراد محتاج لفرق أد كده بناخده، بس فيه نقطة هنا إن أنا لازم يبقى فى إيدى الأول جزء من النقد الأجنبى اللى أشغله علشان أقدر أصدر؛ يعنى وسيادتك وافقت على إنه فعلا نبقى بنضع تحت تصرف قطاع الصناعة من الاستيراد ما يسمح له الأول إنه يبدأ بالانتاج، وتمشى بقى العملية اللى هى الصندوق.. نحط للصندوق مبلغ وبعدين يبقى حصيلة الواردات تبتدى ترد الى الصندوق.

القيسونى: ماهو ده هيجى من الصادرات السابقة ياعزيز.

سرى للغاية

صدقى: لأ.. ما هو أنا بأراجع الموقف دلوقتى علشان أشوف موقف الصادرات السابقة، لقيت أن الصادرات أقل مما يمكن لقطاع الصناعة أن يحققه.. دى صحيح أنا ذكرتها. بتيجى مشكلة تانية بقى فى نوع النقد، بيتقال دائما: أعطيك نقد حر تعطينى نقد حر أعطيك اتفاقيات تعطينى اتفاقيات، بنحاول نعمل هذا لكن بقول: نبقى عندنا برضه شئ من المرونة فى هذا؛ لأن لو كنت أنا component حر يمثل ١٠٪ حايحقق لى زائد فائض فى حصيله حساب اتفاقيات ٣٠٪، بيبقى بقول: برضه من المصلحة إن احنا نمشى فى هذا مانبقاش جامدين، ونقول: بالرغم إن فيه فائض ٣٠٪ لكن مادام مافيهاش الـ ١٠٪ الحر بيبقى ماننالوش ده ما يوجد فى النهاية.

يعنى يمكن إن أنا فى النقد الحر حاخذ أكثر من اللى أقدر أصدر به والعكس فى الاتفاقيات؛ ده بقى ينظر كله بالموافقة عليه على ضوء الميزان النقدى العام، المهم فى الموضوع يافندم، إن احنا نعطى إمكانيات الإنتاج. أنا اللى بناقشه الحقيقة إن احنا سرنا - ومش السنة دى بقى لنا كذا سنة - على أساس إن فيه مشكلة، الحل بأربط الحنفية بس بأربط الحنفية مش بس على الصرف ده أنا بأربط الحنفية على الإيراد؛ لأن الصرف ده مادام لمستلزمات إنتاج يعنى إنتاج، وهذا الإنتاج هو اللى بالتالى هيجيب لى عائد إما بمنع استيراد أو بتصدير. يعنى أنا بدى أسأل سؤال: إزاي بيبقى عندى مصنع ثلاجات طاقته ١٠٠ ألف ثلاجة وأشغله على ٢٠ ألف ثلاجة؟! يتقال: لأنه دى سلع استهلاكية مش ضرورى تستهلك فى السوق.. عظيم طيب إذا كان قابلة للتصدير!

وإذا كان أنا علشان أشغل الـ ٨٠ ألف ثلاجة الإضافيه هأستورد مثلا بليون وهأصدر بثلاثة بيبقى إزاي أوقف مثل هذه العملية؟! بيبقى عايزة نقطة بداية.. عايزة نقطة بداية؛ ناخذ المليون اللى هى الخامات اللازمة لنا وبعدين مقابلها عقود تصدير، هأصدر بثلاثة مليون. أنا بقول: يافندم عندنا عقود قائمة بسبعين ألف ثلاجة وبقى لها سنتين مبتتفدش.. ليه؟! لأن نيجى نطلب لا.. لا.. لأ.. ده إنتاج سلع هندسية ممنوع! طيب هانزود صادراتنا بايه؟!

إيه الزيادة فى الصادرات الزراعية؟! يعنى التخطيط حتى متشائم إن احنا نقدر نحقق ٢,٥٪، مافيش أمل إلا الصادرات الصناعية، لازم نخش فى عناصر جديدة برضه الغزل مش هنقدر الى الأبد؛ يعنى كل سنة ١٠ مليون جنيه زيادة ٥ مليون جنيه زيادة لها حدود.. حصتنا فى التوزيع الدولى محدودة، لازم أخش فى مجالات، إيه هى المجالات؟ كل مجال جديد عايز استيراد. أنا علشان أصدر مصنوعات جلدية عايز استورد جلد، بلدنا لا تنتج جلد كافي. لازم أنا إذا حصة الاستيراد لخامات الصناعة لما تزيد ما يضرش طالما أنه يقابلها تصدير مقابل أو يزيد عنها. أنا عايز أوجد المرونة فى تنفيذ هذه السياسة.

سرى للغاية

وأنا أتساءل ماهو المخرج الآخر؟! إحنا مشينا على كمش الاستيراد، نخفض الميزانية النقدية
علشان نوازن ومبوازنش. أنا شايف الميزانية المعروضة الكلام اللي إنتقال: المديونية ومش المديونية
زاد عن أى رقم سبق أن عرض قبل كده! مما يدل على أن الحلول السابقة كلها لم تؤدي لنتيجة!
وأنا شايف يافندم كمان فيه عناصر بنتتسى فى المناقشات دي كلها، فى المذكرة اللي قالها
الدكتور القيسونى اللي مقدمها النهارده فيه عنصر منسى.. الاستثمارات اللي احنا حطيناها سرعة
تشغيلها هو ده الحل، يعنى إيه؟

يعنى البداية بتاعت الخطة القادمة، الدكتور القيسونى حاسب استثمارات معينة علشان يوازن
ميزان المدفوعات بشكل معين، طيب أنا عندي استثمارات بالفعل تمت أو فاضل لها حاجة بسيطة
وتبدأ الانتاج، مش لازم أحسب العائد بتاعها ده؟ يعنى لما النهارده يكون مصنع سجاد بتاع مثلا
السويس وفاضل له ٦-٧ شهور سنة باستثمارات ٢-٣ مليون جنيه وأبدأ فى الانتاج، وبعدين بيوفر
لى نصف مليون طن سجاد سنويا قيمتها ١٠ مليون جنيه؛ مش لازم أدخل ده فى الأرقام اللي جاية
فى المذكرة؟! مصنع حلوان، ماكيناته كلها وصلت وبتتركب وممكن فى خلال سنة أو سنة ونصف
يركب؛ لازم انتاجه برضه أحسبه.

فأنا بقول: النقص فى الواردات ده فيه عنصر كبير جدا أكثر حتى من الأرقام اللي هيمكنا
نزيد بها الصادرات؛ لأنه فيه عنصر زى السماد، هنقدر نوفر ١٥-١٦ مليون جنيه لوحده، فى الورق
أرقام ضخمة أخرى وهكذا.. هو ده الحل.

أنتج.. يالما بأستغنى عن استيراد، يالما بأصدر زيادة ونخرج من الزنقة اللي احنا فيها دي.
وهو يافندم يعنى بيتقال: إن القطاعات تيجى على نفسها، وأنا عن نفسى ليه أنا مصانعى ماتاخذش
خامات وماتتغلش يعنى طالما أن دي سياسة الدولة؟! إحنا مالنا إنما أنا بقول: الى أين يؤدي بنا
هذا؟! طيب حانحلها لغاية ٣٠ يونيو والسنة الجاية؟! حاتبقى ألعن!

القيسونى: هو إذا ووفق على مسألة صندوق النقد الأجنبى بتاع الصناعة، واتحط كمبدأ إن قيمة المستلزمات
المستوردة بالنسبة للصادرات الصناعية - السلع الصناعية المصدرة - يعنى العجز بينهم يقل سنة
بعد سنة، يعنى نقدر نمشى فى هذا الإتجاه ونبقى بنجزأ المشكلة. يعنى بدل ما وزارة الاقتصاد تبقى
ملتزمة بأنها تدبر كل سنة مثلا ٨٠ مليون جنيه للمستلزمات المستوردة فى الصناعة، والصناعة تلتزم
بتصدير مثلا ٧٠ مليون جنيه، وبعدين لا ده ببيجي ولا ده ببيجي بالضبط! يبقى الصناعة التزمت
بإنها تصدر بسبعين مليون، والسبعين مليون هتاخدمهم تمويل بهم الواردات بتاعتها، ويبقى كل التزام

سرى للغاية

وزارة الاقتصاد تجاه الصناعة أنها هتدبر ١٠ مليون على أقساط شهرية أو جاييز يعنى فى البداية تدبر مبلغ علشان تمويل الانتاج.

وبالشكل ده لن ندخل فى الحلقة المفرغة بتاعت تخفيض الميزانية وبعدين تخفيض الاستيراد وتخفيض التصدير. ولكن يعنى ممكن نتطلق الصناعة من كل العقود الممكن ترتبط عليها علشان التصدير، وكل حصيلة التصدير تاخذها وتجبب بها مستلزمات انتاج وتتوسع فى التصدير فيها. ولكن تبقى مشكلتها ومسئوليتها وتبقى مسئولية وزارة الاقتصاد يعنى قسمناها يعنى صغرناها.. يعنى كوزارة صناعة إذا كانت متأكدة أنها هتصدر.. تصدر وتجبب حصيلة تستخدمها هي.

محي الدين: يعنى نؤجل الموضوع للجلسة الجاية، ونشوفهم مع بعض ياحسن على أساس إن عزيز هيتقدم بـ alternatives لهذا الموضوع محددة يعنى.

صدقى: أيوه.. أنا بدى بس أعطى رقم علشان يبقى الصورة واضحة لأنه باستمرار كان بيتقال إن قطاع الصناعة كانه عبء، أنا بدى أقول: إن الصادرات فى ٦٧/٦٦ كانت ٦٠,٧٧٣,٠٠٠ جنيه الحصاة فى الميزانية النقدية ده غير بقية قطاع الصناعة، بقية قطاع الصناعة يوصلها الى ٨١ مليون. أنا أعتقد إن الميزانية النقدية المنفذة خلال هذه السنة ماوصلتش ٧٠ مليون وده لم يدخل فيه البترول، وأصبح قطاع الصناعة النهارده بيغذى ميزان المدفوعات ولا يأخذ من ميزان المدفوعات. وهذا يدل على أنه برغم استحداث إضافة الى الانتاج قيمتها ٨٠ مليون جنيه، إن احنا وصلنا الى إن احنا لا نحمل ميزان المدفوعات شئ، وهو ده اللي بيورينا السبيل.

لولا الاستثمارات التى حدثت فى الصناعة ولولا أننا أعطينا إمكانيات للصناعة أنها تنمو مكانش أمكننا إننا نصل الى هذا. السبيل إننا نحل بقى إشكال باقى العجز فى ميزان المدفوعات، إن احنا نسير فى نفس الطريق؛ إن احنا نتيح للانتاج الصناعى أن ينمو بحيث أن الـ ٦٠ مليون تبقى ١٠٠ و ١٢٠ مليون، وإذا زاد بدل الاستيراد مثلا بقى ٧٠ بقى ٨٠ لكن الـ ٦٠ التصدير بقت ١٢٠ يبقى هو ده الاتجاه.. معنى ده إن أنا بس أتتيح إمكانيات إضافية للتشغيل. الانكماش بيؤدى الى إن كمان فيه نقص فى إمكانيات التصدير وبعدين بنقول ننقص الاستهلاك، الى متى هنقدر ننقص الاستهلاك!؟

سرى للغاية

زكى: إحنا ماقلناش ننقص الاستهلاك إحنا بنتكلم فى موضوع محدد يعنى الموضوع العام ده، محدش قال الكلام ده! يعنى فأرجو بإننا نفرق بين موضوعين.. موضوع عام ومفهوم كل الجهات التى قيلت مافيش خلاف فيها، ومافيش داعى أننا نثير موضوع محدش معترض عليه. أنا بقول: مشكلة $1+1=2$ وإحنا مبنمنعش حنفيه.. مبنقرطش حنفيه، دى المياش مش موجودة فى الحنفيه.. مبنترلش مش إحنا بنقرط الحنفيه!

أصوات: (ضحك)

زكى: لا.. يعنى الفلوس مش موجودة الظرف طارئ، وهى المشكلة مش مسألة..

عبد الناصر: لا.. لا.. ياحسن، هو الظرف مش طارئ ولا هو ظرف حرب ولا ميزانية حرب يعنى، العملية دى موجودة من قبل العدوان.

زكى: بس زادت.

عبد الناصر: معلش زادت، لكن هذا الموضوع موجود من قبل العدوان. وأنا قاعد باسمع الكلام اللى بيتقال هنا ده للمرة المائة.. يعنى الكلام اللى بيتقال النهارده أصل سمعته قبل كده، وجاء لى الدكتور القيسونى فى أيام مجلس الرئاسة وتكلم.. مش كده! وجيت اللجنة التنفيذية العليا ولا مش فاهم إيه، حصل الكلام الحقيقة!

والواحد قاعد بيسمع كلام ما باسمعوش لأول مرة.. عملية الميزانية النقدية، وأنا فى رأى إن لما نتكلم من الناحية النقدية إحنا الناحية النقدية أصلها باب مسدود! لما تحطنى فى ناحية نقدية بتحطنى فى طريق مسدود؛ يعنى بنقول لى: آدى آهو كيت وكيت وكيت، لكن هيبقى الموضوع مش بس الموضوع النقدى، الموضوع هو أكبر من كده؛ لأن الموضوع النقدى ليس إلا انعكاس لحالة موجودة وموجودة متراكمة من عدة سنين ورا بعض، وإحنا اللى مسؤولين عن تراكمها فى عدة سنوات.. ده الوضع الحقيقة.

سرى للغاية

لكن لما النهارده بتيجى تقول لى ٥٨ مليون.. $2=1+1$ ما أقدرش أقول لك أنا: لأ..
 $3=1+1$! بتحطنى الحقيقة بتمسكنى فى الموضوع النقدى اللى هو عجز الميزانية وميزان المدفوعات،
لكن فى الحقيقة لما نيجى نحل - وإحنا سنوات كثيرة بنتكلم عن الحل - ولكن اللى كان بيحصل
عكس ما حصل - وأنا هتناقش ده فى مذكرة القيسونى - اللى كان بيحصل عكس ما حصل يعنى
لدرجة أن أنا برضه يعنى قاعد آهو بقول: إيه ياترى هيجى نتيجة هذه الاجتماعات؟! بالعكس إن
العجز كان بيزيد وكل حاجة كانت بتزيد.. بتسوء! ليه؟! هو ده كان انعكاس لأوضاع موجودة.
كذلك لما نتكلم فى الوضع الحالى من الناحية النقدية بس، ببقى مكتفين نفسنا على طول
تقول: إن الحنفية مفيهاش مياه! ولكن هذا العجز فى الميزانية النقدية ليس نتيجة ٥ يونيوه لأ.. أيام
وزارة صدقى الوضع كان بهذا الشكل وأيام وزارة زكريا الوضع كان بهذا الشكل وأيام وزارة على
الوضع كان بهذا الشكل.. مش كده!؟

القيسونى: كان فيه عجز آه مستمر طبعاً.

عبد الناصر: كان فيه عجز مستمر وفيه.. ومذركم مبينة هذا الكلام النهارده، إذأ الموضوع ماهواش نتيجة اليهود،
الموضوع يعنى نتيجة اليهود اللى فى مصر مش اليهود اللى فى اسرائيل.. يعنى الحقيقة نتيجة
أخطاء مننا يعنى إحنا! الموضوع كده بهذا الشكل الحقيقة هو ده أساس الموضوع. لما نيجى نقول
٥٨ مليون جنييه وأدى الميزانية النقدية، الحل الوحيد لما تحطنى فى العملية دى إن أنا أوفر من هنا؛
وأوفر من هنا وده اللى كنا بنعمله برضه باستمرار، لكن أنا فى رأى إن ميزان المدفوعات هو انعكاس
لأوضاع موجودة، وانعكاس لأخطاء موجودة وعمليات مشيت فى سنوات من سنة ٦٠ لغاية النهارده.
يعنى بحيث أن الوضع تراكم ووصل الى الحالة اللى احنا النهارده فيها، واللى بنقول: أنها
deadlock ومافيش فايده بالنسبة لها!

زكى: ما فيش شك إن ده صحيح بس إحنا كنا توازنا قبل الـ٥٨..

عبد الناصر: نعم!؟

سرى للغاية

زكى: يعنى قبل الـ ٥٨ مليون دول، لأن هم جايين من أين الـ ٥٨؟! فى الغالب فيه ٢٤ مليون - ده مكانش موجود أبدا - اللي بتاع الطوارئ.

عبد الناصر: لأ.. إنت ماتوازنتش قبل الـ ٥٨، ده أنا باعتبار إنك زدت الطين بلة قبل ٥٨! أجلت ده وعملت ده وحطيت لنا مصيبة السنة دى ومصيبة السنة اللي فاتت واللى قبلها، أجلتها لنا للسنة الجاية وماحلتش!

زكى: لأ.. ماهو بس أنا بقول: إن الـ ٥٨ مليون بالذات لها فعلا أسباب بسبب الحرب؛ اللي هى البترول لوحدته ببيجي ٣٠ مليون، السماد عامل له بيجي ٤ مليون، وبعدين ٢٤ أو ٢٥ تقريبا بتاع الطوارئ. فى غير الحرب الأرقام دى مش موجودة هتروح الـ ٥٨ لكن ده محلش الإشكال؛ لأن مازال فيه حاجات مؤجلة وهنواجهها.. ده صحيح بس أنا بقول: يعنى الـ ٥٨ مليون دى لوحدتها سبب غير الحاجات التانية اللي هى فى داخل الميزانية اللي لازم تعالج كأساس.. ده صح.

عبد الناصر: طيب نسيب جزء الصناعة ونروح الجزء اللي بعده.

زكى: هو التموين فرق بسيط ومشينا فيه، والانتاج الحربى مليون وهم ماقالوش: آه.. وماقالوش: لأ.. لكن أنا مابشكش إنه حايتعيبهم فى حاجة.

البشرى: هى المذكرة ٢٠٠ ألف فى العملة الحرة؛ ده إحنا وافقنا عليه ٢٠٠ ألف عملة حرة و ٥٠٠ ألف فى اتفاقيات الدفع.

زكى: لأ.. ٥٠٠ و ٥٠٠ تبقى.

البشرى: لا.. ماهى دى ولذلك إحنا ده اللي معطلنا.

زكى: يعنى بدل مليون ٧٠٠ ألف؟

سرى للغاية

البشرى: أيوه.

زكى: لا.. مافيش إشكال يعنى، هو بس كان فيما يختص بالزراعة هو كان فيه فرق أظن الأخ سيد قاله.

مرعى: كان فيه المبيدات الحشرية والسماذ الكيماوى، كويس المبيدات الحشرية السنة اللي فاتت كان معتمد ٨,٢٥٠,٠٠٠ جنيه، إحنا كنا طالبين السنة دى ٧ مليون عملة حرة و ٢٠٠,٠٠٠ اتفاقات يعنى مخفضين فعلا عن السنة اللي فاتت بمليون جنيه.

العطاءات الموجودة حاليا يمكن بتورى شئ من التخفيض، وعلى ذلك إذا كان المبدأ بس يبقى قابل للنقاش بينى وبينك شوية نشوف التخفيض أد إيه ونزود فى..

زكى: هو إحنا اللي مقترحين تخفيض ١,٨٠٠,٠٠٠ ده فيه على الأقل هيبقى ٨٠٠ فرق سعر؛ لأن إحنا حانجيه بسعر رخيص يعنى الفرق هيبقى ماديا حاجة بتاع مليون، عندكم مخزون بتاع ٤ مليون فمافيش..

مرعى: نشوف هنقدر نسويها معاك إزاي، عايز مبلغ بسيط فوق ال..

محي الدين: يعنى الزراعة كلها كام دلوقتي؟

زكى: الزراعة.. التخفيض ٣ مليون.. هو بقى اللي لسه حديد التسليح.. هو ده اللي كان لسه محل كلام؛ لأنه بيقولوا: إنهم عايزينه للطوارئ.

محي الدين: محتاجين طبعا زيادات عن الاحتياجات المدنية، طبعا المطارات عاوزة بعض حاجات.

زكى: هو اللي هايجي عادة إن لو مقدرناش هننقص الـ ٢٤ وطلعوا الـ ١٠، ١٤ مافيش مفر غير أن الميزانيتين هيعوموا فى بعض.. يعنى مش هتوقف العملية ولكن حايبقى فيه تباطؤ فى بعض الاستيراد.

سرى للغاية

القيسونى: هو المذكرة الأولانية اللى قدمناها فى ديسمبر، يمكن انشرحت بطريقة رقمية فى المذكرة الجديدة بتاعت النهارده؛ فيمكن إذا سمح لى السيد الرئيس يعنى أتناول المذكرة الجديدة لأن هى أساسا، وبعدين فيه عندى بعض نقط إضافية يعنى فى المذكرة القديمة ممكن التعبير عنها بالأرقام.

أنا بدى أقول فى بداية الحديث، إننا - ودى نقطة يمكن قلتها فى الجلسة الماضية - إننا لا ندعو الى الإنكماش فى الاستثمار بل بالعكس الهدف الذى نسعى اليه هو زيادة الاستثمارات الى ٣٠٠٠ مليون جنيه؛ اللى هى يعنى تعادل تقريبا عن الاستثمارات بتاع الخطة الأولى والخطة الثانية معا، ولكن اللى بندعوا اليه هو إن جميع المستلزمات تبقى تقريبا فى حدود الإمكانيات المتاحة علشان مايحصلش تضخم داخلى ولا عجز خارجى فى الميزان الحسابى.

المذكرة تستعرض بالأرقام التطورات:

أولا: التطورات التى حدثت فى السنوات الأخيرة، وبيبان منها يعنى فى الجدولين ٣، ٤ التقدم الكبير اللى حصل فى الانتاج وفى الدفع.. يعنى مبيينة قطاع قطاع والزيادة اللى حصلت فيه. بعدين طبعا النجاح فى الانتاج فى القطاعات الانتاجية وقطاعات الخدمات يعنى كان نجاح إذا قورن بما تحقق فى الدول الأخرى يعتبر نجاح كبير فعلا، ولكن حصلت بعض الصعوبات راجعة لبعض العوامل، المذكرة استعرضت بعضها بالأرقام.. يعنى أن الإدخار مازادش، إحنا كنا مستهدفين معدل إدخار ٢٠٪. الإدخار فضل ثابت تقريبا من ١٢ و ١٤٪ من الدخل أو الناتج المحلى. الاستهلاك زاد بشتى صورته، الاستهلاك بتاع الحكومة يعنى مثلا لما نأخذ الباب الأول بناخذ المرتبات زائد إعانة الغلاء من الميزانية العامة والميزانيات الملحقة، ارتفع فى الستة الأولى من ١١١ الى ٢٠٥ بنسبة ٨٤٪.

الإنفاق بتاع القوات المسلحة ارتفع من ٦٨ الى ٢١٠، خفض تكاليف المعيشة ارتفع من ٩ الى ٥١، القروض التى نعطيها للمزارعين ارتفعت من ٣٠ الى ٩٧.. فدى كلها عوامل ساعدت على زيادة الاستهلاك ولم تساعد على الارتفاع بنسبة المدخرات الى الحد اللى كنا نرجوه.

وبعدين العنصر الثانى: اللى هو الانتاج والدخل، يعنى صحيح أنهم حققوا زيادة كبيرة ولكن الزيادة لم تكن معادلة للأهداف اللى كنا وضعناها فى بداية الخطة؛ فيعنى يمكن الأهداف كانت طموحة شوية، ولكن التوازن اللى كان موجود فى الخطة كان مبنى على تحقيق الأهداف دى.. يعنى الصناعة مثلا زادت بـ ١٢٩ مليون جنيه وبنسبة ٥٠٪ ودى نسبة كبيرة قوى، ولكن كانت الأهداف الموضوعية للخطة أكثر من كده.. فيعنى الصناعة حققت ٧٨٪ من الأهداف.

سرى للغاية

العنصر الثالث: اللى هو الكفاية الانتاجية.. الكفاية الانتاجية برضه كان فيه أمل أو ضرورة إنها تزيد فى شتى القطاعات؛ فلم تزد بنسب ملحوظة بل أنها فى قطاع التشييد بالذات انخفضت إنخفاض كبير قوى يعنى من ١٠٠ نزلت حوالى الثلث الى ٦٦٪! وهذا أثر بالتبعية على التكاليف والأسعار وتكاليف الاستثمارات المختلفة. زى مايقول السيد الرئيس: يعنى العوامل دى عوامل حقيقية وانعكست صورتها على الميزان الحسابى وعلى التضخم الداخلى سواء العجز فى الميزان الحسابى أو التضخم اللى حصل.. دى صورته بتعكس عوامل حقيقية.

التضخم الداخلى، يعنى كان من مظاهره زيادة اعتماد الحكومة على الجهاز المصرفى.. يعنى بدل ماتعتمد على الموارد السيادية وعلى الإيرادات الحقيقية والمختلفة، اعتمدت على التمويل بالعجز بنسبة معينة من مصروفاتها، كانت فى ٦٠ - ١٩٦٧ المتوسط السنوى يمكن كان ابتداء ب ٢٧ مليون وبعدين ارتفع فجأة لـ ٩٠ وبعدين لـ ١٩٠، وبعدين ابتداء يتلم شوية فى سنة ٦٥، ٦٦، ١٩٦٧ نزل الى ١١٠ و ١١٥ وبعدين ٧١.

الأشهر الأخيرة فى نوفمبر الماضى يعنى، آخر أرقام متاحة عندنا رجع تانى اعتماد الحكومة على الجهاز المصرفى يزيد شوية، ولكن دى طبعا زيادة مفهومة للظروف اللى احنا فيها. النتيجة برضه لزيادة وسائل الدفع أن نفقة المعيشة والرقم القياسى بتاع نفقة المعيشة وبتاع أسعار الجملة ارتفع فى الفترة دى حوالى ٣٠٪، نتيجة برضه لزيادة الاستهلاك ونقص الإدخار إن الاستهلاك المحلى زاد، فأصبح فى السلع المتاحة للتصدير يعنى مازادتش الزيادة المرجوة أو إن أسعارها كانت أسعار غير تنافسية؛ فالعجز فى الميزان التجارى أخذ يزداد، وطبعا العجز فى الميزان التجارى من الأسباب الأخرى لزيادته عملية التنمية نفسها وارتفاع الواردات الاستثمارية.

ارتفع العجز فى الميزان التجارى من ٥٢ مليون جنيه سنة ٦٠/٦١ الى ١٨٦، أقصى رقم كان فى سنة ٦٣/٦٤ وبعدين نزل فى ٦٦/٦٧ بقى ١٣٩ مليون جنيه.

ميزان الخدمات اللى هو الواردات والصادرات غير المنظورة، يعنى كان مفروض أن يبقى فيه فائض متزايد؛ نتيجة لزيادة الرسوم فى قناة السويس وزيادة السياحة، ولكن سمحنا للمصروفات غير المنظورة أنها تزيد فى نفس الوقت. ولو إن إيراداتنا من الخدمات غير المنظورة زادت زيادة كبيرة إلا أن مصروفاتنا برضه زادت؛ والنتيجة النهائية أن الفائض زاد عن ١٦ مليون الى ٦٠ مليون، ولو إن احنا كنا نأمل فى أنه يزيد بأكثر من كده.

سرى للغاية

دى الصورة بتاعت السنين الأخيرة الماضية، وبعدين إحنا بنقول أهداف المستقبل.. عندنا أولاً السنيتين الانتقالييتين الللى هما السنة الجاية ٦٨/٦٩ و ٧٠/٦٩ يمكن كان الأخ حسن بيتناولهم. بعدين أهداف الخطة بتاع ٧٠/٧٥ الللى هى بنسعى لتحقيق استثمارات ٣٠٠٠ مليون جنيه؛ علشان أساساً توظيف كل العمالة المستجدة خلال الخطة والاستمرار فى عملية الارتفاع والتقدم والتنمية. بعدين من الأهداف برضه بتاعت الخطة، تحقيق التوازن فى الميزان الحسابى والارتفاع بمعدل الإيدار الى ٢٠٪ على الأقل، وتحقيق التوازن فى الميزان الحسابى معناه أننا حانقلب العجز الموجود حالياً - حوالى ٨٠ مليون جنيه - الى توازن، وبعدين نسعى بالتدريج الى تحويله الى فائض فى السنين الأخيرة من الخطة؛ علشان نقدر نسدد الالتزامات المستحقة من السنين السابقة. علشان تحقيق هذه الأهداف، لازم إتخاذ إجراءات معينة أو وضع أهداف تفصيلية محددة فى القطاعات المختلفة نذكر أهمها فى الآتى:

فيه ميزانين رئيسيين، الللى هما ميزان الإيدارات المحلية للتمويل المحلى لمواجهة متطلبات الاستثمار من غير إجراء تضخم إضافى، وفى مجال ميزان المدفوعات علشان أحقق توازن فى ميزان المدفوعات.

فى مجال الإيدار المحلى، إحنا بنقول الاستثمارات الجديدة - الللى هى ٣ آلاف مليون - معناها أننا نرتفع بمعدل الاستثمار أو نجعل معدل الاستثمار حوالى ٢٠٪ من الدخل القومى، وهو إحنا كنا ماشين برضه على ٢٠٪ ولكن يعنى لو إحنا هنقدر نعمل ٣٠٠٠ مليون؛ لأن الدخل طبعا بيزداد سنة بعد أخرى ف ٢٠٪ من الـ ٣٠٠٠ مليون تمكنا لو أدخناها نجيب..

عبد الناصر: هيزداد منين يادكتور؟! يعنى إذا كان مافيش زراعة ومافيش صناعة يبقى الدخل هيزداد إزاي؟!

القيسونى: لأ.. فيه الاستثمارات موجودة، يعنى استثمرنا ١٥٠٠ مليون فى الخطة الأولى وفى السنيتين الأولانين من الخطة الثانية استثمرنا..

عبد الناصر: لأ.. كلامك الجلسة الللى فاتت بتقول: نعمل طرق ونعمل مش فاهم إيه وحاجات بهذا الشكل ومنصلحش أرض! إذا مافيش فى الأرض زيادة فى الدخل بل قد يكون فيه نقص زى الللى حصل السنة الللى فاتت. وبعدين بالنسبة للصناعة، هننقل المصانع ويعنى بنخفض الانتاج، يبقى الدخل هيزداد إزاي؟!

سرى للغاية

القيسونى: وأنا أن ذكرت النوبارية بالذات، يعنى أنا قلت: بدل مانوسع السنة الجديدة فى استصلاح الأراضى، يمكن نستخدم معدات السد العالى فى شق النوبارية وتحويلها الى مجرى ملاحى من الدرجة الأولى؛ لأن أنا باعتبار إن من الأهداف الرئيسية اللى احنا يجب نعمل إليها تخفيض تكاليف النقل وباعتبر إن النقل النهرى يمكن أحسن وسيلة لتخفيض تكاليف النقل خصوصا فى بلد زى عندنا.. عندنا النيل وعندنا المجارى الملاحية والأرض سهلة.

عبد الناصر: يعنى هو اللى أنا برضه باتصوره أولا وأخيرا زيادة الدخل، هو الدخل السلعى وإذا مكانش سلعى بيبقى مافيش حاجة اسمها زيادة دخل! السلعى اللى هو الزراعة والصناعة والبتترول والثروة المعدنية، إذا ده مازادش بيبقى نقول زيادة الدخل على أى أساس!؟

القيسونى: هو مانختلفش فى كده، ولكن أنا بقول: الدخل السلعى وكمان الاستثمارات الخاصة بقطاع التوزيع؛ قطاع التوزيع هو أساسا النقل والمواصلات والتخزين.. يعنى دى لازم لأنها تخفض تكاليف الانتاج، وبتجعلنا فى مركز تنافسى أفضل بالنسبة للخارج أو بتساعدنا على تخفيض الأسعار فى الداخل، وبتساعدنا برضه على تكوين مدخرات إضافية وبتساعدنا على تكوين أرباح إضافية.

وبعدين أنا يمكن كان كلامى فى الجلسة اللى فاتت، بأن فى الفترة اللى احنا فيها.. ماإحنا عندنا موارد معينة من المياه، إذا توسعنا فى الأرض ماإحنا بنأخذ الموارد دى علشان نروى الأراضى الجديدة. فى الفترة اللى احنا فيها اللى إحنا مضيقين على نفسنا شوية فيها، إذا استخدمنا الموارد دى علشان التوسع الرأسى؛ بمعنى إننا نزرع الحاجات اللى بتحتاج لمياه أكثر زى الأرز - إحنا مش هنقدر نستمر فى زراعة ١,٨٠٠,٠٠٠ فدان أرز - إذا توسعنا فى الأراضى الجديدة لازم حانقلل من مساحة الأرز وبعدين هنتوسع فى الأراضى الجديدة.

فأنا بقول: دلوقتى أنا محتاج حصيلة الأرز هذه سواء للتصدير أو سواء للدخل المحلى، فخلينا نوجه المياه دى لزراعة الـ ١,٨٠٠,٠٠٠ فدان، وبعدين إذا صلحنا أرض نصلح برضه لكن منصلحش الـ ١٢٠,٠٠٠ فدان فى السنة يعنى نصلح نسبة أقل من كده، ولكن نستمر فى الزراعة ونستمر فى الصناعة ونستمر فى الكهرباء والسد العالى.

وإطار الخطة المعروضة للسنة القادمة، يعنى مثلا بترتفع من ٢٤٠ - الإطار المبدئى اللى ابتدينا نناقشه مع القطاعات المختلفة - إننا بترتفع من ٢٤٠ السنة دى الى ٣٢٠ - ٣٢٥، فبالنسبة

سرى للغاية

للمدخرات يعنى إحنا عايزين نرتفع من ١٣٪ الى ٢٠٪، يعنى على أساس ٦٧/٦٦ اللى هى كان الناتج المحلى الإجمالى فيها ٢٤٠٠ يعنى عايزين نرتفع لـ ١٦٨ مليون جنيه.

عبد الناصر: إحنا دلوقتى الإدخار ١٣ ولّا ١٨؟

القيسونى: ١٣ لّا.. أنا باتكلم على ٦٧/٦٦ و ٦٦/٦٥، كان حوالى ١٣ فعابزين نرتفع لعشرين يبقى ١٦٨ مليون جنيه.

وبعدين علاوة على الـ ١٦٨، فيه المدخرات الإضافية اللازمة لتسديد أقساط مستحقة على فى الماضى، ولكن أنا بقول: فى دى يمكن منطالِبش الناس بأنهم يكونوا مدخرات إضافية فى الظروف الحالية علشان تمويل الأقساط الماضية، طالما إنى باحصل على تسهيلات ائتمانية علشان تمويل الاستثمارات الجديدة، وإن التسهيلات الائتمانية بتمكننى فى الالتزام الحسابى من إنى أدبر أموال أسدد بها الأقساط؛ فطالما إنى معنديش فائض فى الميزان الحسابى فمافيش معنى إنى أفرض أو أقترح فرض إجراءات إضافية، تسبب متاعب أكثر للناس علشان تكون مدخرات مأقدرش أصدرها.

وبعدين فيه مبلغ إضافى يجب أننا ندبره من المدخرات، علشان تمويل السيولة النقدية اللازمة للمصانع سواء لتخزين قطع الغيار والمعدات والآلات؛ هى قطع الغيار والسلع التامة الصنع وبعض السيولة اللازمة لدفع الأجور.. إلخ.

يعنى إذا فرضنا إن السيولة دى مثلا ٣٠ مليون جنيه فى السنة زائد الـ ١٦٨ المطلوبة تبقى حوالى ٢٠٠ مليون جنيه، وبعدين منعملش حسابنا دلوقتى لتدبير مدخرات إضافية علشان تمويل الأقساط القديمة فيبقى ٢٠٠ مليون جنيه. الإجراءات التى اتخذت فى يوليو الماضى يعنى بنجيب حوالى ١٠٣ مليون جنيه، إذا استبعدنا منها تنازل العمال عن نصيبهم فى الأرباح - باعتبار أن دى مأطنش يعنى إجراء نقدر نستمر فيه - فيبقى ٩٧ مليون جنيه.. يعنى نبقى دبرنا من الـ ٢٠٠ مليون جنيه حوالى ١٠٠ مليون جنيه أو ارتفعنا زى ما بتقول سيادتكم من ١٣٪ الى حوالى ١٧٪.

فإذا روى الاستمرار فى التمويل بالعجز الجزء من ١٠٠ مليون جنيه، فنقترح أن التمويل فى العجز يبقى فى حدود معقولة يعنى يكون فى حدود مثلا ٣٠ مليون جنيه فى السنة، اللى هى بتمثل حوالى ٣٪ من كمية وسائل الدفع المتاحة حاليا؛ لأن وسائل الدفع حاليا حوالى ٩٠٠ مليون جنيه

سرى للغاية

يبقى منها ٣٠ مليون جنيه نقدر نستحملها من غير ما الحساب يتضخم؛ لأنها عبارة عن تسجيل لمدخرات مكتتزة.

يعنى فى واقع الأمر إحنا مش هنقدر نستخدم غير موارد حقيقية، ولكن فيه ناس يعنى بدل الموارد دى ماتدخرها وتحطها فى البنك ونقدر نستخدمها يقوموا بيكتتزوها، فإحنا الـ ٣٠ مليون جنيه نفرض أن ده اكتتاز، بنسيله وبنستخدمه فى تمويل الاقتصاد القومى.

يتفضل عندنا الـ ٧٠ مليون جنيه، دى يجب إذا حبينا أننا نستمر فى الخطة تقتضى استثمارات بثلاثة آلاف جنيه؛ يجب أننا نسعى الى فرض إجراءات إضافية تدبر ٧٠ مليون جنيه، إما بقى عن طريق تخفيضات فى الميزانية باب أول وثانى ورابع مش ثالث.. باب أول وثانى ورابع أو عن طريق فرض رسوم جديدة.. زيادة أسعار.. إلخ.

ولكن يعنى إجراءات فى مجموعها تجيب ٧٠ مليون جنيه فى السنة أو اقتراح إضافى أو يمشى معاهم؛ تشجيع بعض الاستثمارات الخارجية وبعض الاستثمارات العربية، وكذلك تشجيع الاستثمارات الخاصة فى المجالات التى تتفق مع سياسة الدولة.

وده معناه طبعا إننا فى الأبواب الثلاثة بتاعة الميزانية - الباب الأول والثانى والرابع - يعنى بنلتزم بأهداف معينة.

يعنى فى الباب الأول: زى ماكان وارد فى المذكرة اللى قبل كده، أننا يعنى مايزيدش الباب الأول غير بنسبة لا تزيد عن نسبة الزيادة فى الدخل القومى.. يعنى منقدرش ندفع للموظفين نسبة أكبر من نسبة الزيادة فى الدخل ولكن يستحسن إنها تكون نسبة أقل شوية.. وده يمكن محتاج لتنظيم ولتشريع معين.

الباب الثانى: برضه وزارة الخزانة فى السنوات الأخيرة يعنى ضغطت فى الباب الثانى ضغط كبير، وأنا باقتراح إن الضغط ده يستمر، وإذا سمحنا بالزيادة برضه الزيادة تبقى فى حدود إن لم تقل شوية عن الزيادة اللى بتتحقق كل سنة فى الدخل الأهلى.

الباب الرابع: اللى هو أساسا القوات المسلحة وخفض تكاليف المعيشة، أنا باقتراح أننا نحدد أهداف فيما يختص بالبندين دول، والقوات المسلحة يعنى يكون الرقم بتاعها أقتراح ٢١٠ مليون فى سنة الأساس، وبعدين إذا زاد سنويا بعد كده يزيد بنسبة الزيادة فى الدخل الأهلى.

كذلك بقية الباب الرابع: وهو خفض تكاليف المعيشة ومجلس الأمة، يعنى مجلس الأمة يمكن مبيحملناش أعباء كبيرة قوى ولكن خفض تكاليف المعيشة يعنى هو اللى أحيانا كان بيزيد

سرى للغاية

زيادات كبيرة؛ فأنا بارجو كمان إننا ننظر بأن الزيادة فى خفض تكاليف المعيشة تكون متمشية مع الزيادة فى الدخل وماتزيدش عنه.

وبعدين.. النقطة الأخيرة فى زيادة المدخرات اللي بارجو برضه أنها تتال عناية كبيرة منا، اللي هى الكفاية الانتاجية للوحدات الانتاجية المختلفة وتحديد أهداف للكفاية الانتاجية. هو فى كل الكتب أو المذكرات اللي الواحد بيقرأها عن الدول التي سبقتنا فى التنمية سواء فى الشرق أو فى الغرب، يعنى واجد تركيز كبير على الكفاية الانتاجية وإن ده مجال واسع لخفض التكاليف. وبالتالي أدام خفضنا التكاليف نقدر يالما نخفض الأسعار ونفيد المستهلك، يالما نزود أرباح القطاع العام ونمول تمويل اضافى.

فأنا بارجو بإلحاح يعنى إننا ننظر لموضوع الكفاية الانتاجية نظرة ملحة ومستمرة، ونحاول إننا عن طرق رفع الكفاية الانتاجية أننا ندبر تمويل إضافى نقدر نستخدمه استخدام مثالى فى تمويل الاستثمارات الجديدة، ولكن ده عايز بحث وعايز دراسة ومنقدرش نحسبه دلوقتى بالأرقام.

بالنسبة لميزان المدفوعات اللي هو البند الثانى فى العملة، هو ميزان المدفوعات فى سنة ٦٦/٦٦ يعنى إذا صورنا سنة ٦٦/٦٦ على أساس افتراضى - على أساس مش الأرقام الفعلية ولكن الأرقام التي نستبعد منها الذبذبة التي حصلت من ٦٦/٦٦ واللى هى بتتماشى الى حد كبير مع الاتجاهات فى الأربع خمس سنين اللي فاتت - نجد أن فيه عجز ٨٧ مليون جنية. إحنا بنسعى الى تخفيض هذا العجز بالتدريج، ثم تحويله الى فائض سنة ٧٣ و ٧٤ و ٧٥؛ ده هدف كبير ولكن بأعتقد إن ممكن إننا نحققه لو التزمنا ببعض القواعد المعينة، معروضة القواعد للنظر.

فالواردات الاستهلاكية والوسيلة والاستثمارية والواردات غير المنظورة، فى الواردات الاستهلاكية اللي هى أساسا الواردات التموينية ١٢٠ مليون جنية وفيها بعض الأدوية؛ فدى بنقترح إنها ماتزيدش غير ب ٢٪ سنويا أو إذا قلنا إن القمح والدقيق يزيدوا مثلا ب ٣ أو ٤٪.. يعنى نبقى نحاول إننا نأكل الزيادة دى من الحاجات الثانية زى الشاي والبن أو إننا ناكلها من الواردات الأخرى. وبعدين الواردات الوسيطة، بنقترح زيادتها ب ٣٪ سنويا فى ٦٦/٦٦، والواردات الاستثمارية بنقترح برضه إننا نخفض المكون الخارجى للسلع للاستثمار سنة بعد أخرى بنسبة ولو ١٪.

الواردات الخدمية، إحنا سمحنا للواردات الخدمية إنها تزيد برضه فى السنوات الأخيرة زيادة كبيرة؛ خصوصا مصروفات الحكومة فى الخارج. يعنى التمثيل السياسى والعمالى والصحفى والعسكرى، كان حوالى ١٠ مليون جنية، مصاريف البعثات كان ٥ مليون جنية، مصاريف الخبراء الأجانب ١٠ مليون جنية، مدفوعات حكومية غير مبوبة ١٦ مليون جنية.. إلخ، فدى أنا بأعتقد إننا

سرى للغاية

نقدر نخفض رقمها اللي هو دلوقتي حوالى ١٠٠ - ١٠٥ مليون جنيه، الى ٨٠ مليون جنيه ويمكن حتى الى ٧٠ مليون جنيه.

وأعتقد إننا فى ميزانية السنة الحالية، يعنى ماشيين - باستثناء الطوارئ والمتنوعات اللي هي طبعا واخدة زيادة استثنائية السنة دي - يعنى إذا كانت الطوارئ والمتنوعات ماشية فى المعدل المعتاد بتاعها يبقى رقم ٧٠ مليون جنيه أو ٨٠ مليون جنيه يعنى رقم معقول، ويمكن إننا نستمر عليه ونجمده عند هذا الأساس منتجاوزش؛ لأن فرق طبعا بين ٨٠ مليون عن ١٠٠ أو ١٠٥ و ٢٥ مليون جنيه فى السنة، يعنى فى السبع سنين بتعمل ١٧٠ مليون جنيه ١٨٠ مليون جنيه، يعنى ممكن نوجهها للاستثمارات أو للواردات الأخرى.

بالنسبة للصادرات، بنقترح برضه وضع أهداف يعنى إن الصادرات الزراعية بتزيد بمعدل ٢,٥٪ فى المتوسط خلال الفترة، والصادرات الصناعية بتزيد ب ٧٪ فى الأول وبعدين لما ييجى البترول ويزداد انتاجه وصادراته بتزيد ب ١٠٪ فى خلال الخطة.

والصادرات الخدمية، تزيد ب ٥٪ سنويا.. الصادرات الخدمية اللي هي أساسا السياحة وقناة السويس. بنقترح اقتراح بديل بالنسبة للواردات الوسيطة والصادرات الصناعية والبترولية، إننا بدل ما نلترم بالأهداف المذكورة؛ اللي هي مثلا ٣٪ زيادة فى الواردات الوسيطة و ٧٪ و ١٠٪ فى الصادرات البترولية والصادرات الصناعية، إننا نعمل صندوقين - اللي هي النقطة التي قلتها فى بداية الجلسة - يعنى صندوق للصناعة وصندوق للبترول، ونحدد فيه أهداف معينة، وبعدين تبقى وزارة الاقتصاد تأخذ من صندوق البترول الفائض وتعطى لصندوق الصناعة العجز، ونحدد أهداف سنوية بحيث أن نتيجة لعملية التصنيع وعملية التقدم يعنى إذا كان فيه عجز فى صندوق الصناعة ده يجب أنه يقل سنة بعد سنة.

هو دلوقتي كل الواردات الوسيطة، لما نأخذ كل الواردات الوسيطة؛ سواء كانت لازمة للصناعة مباشرة أو للبترول أو الزراعة زى المبيدات والسماذ.. إلخ أو لأى قطاع آخر، فنلاقيها حوالى ١٠٥ مليون، نلاقيها بتزيد عن الصادرات الصناعية والبترولية بحوالى ١٠٥ مليون، فيه عجز فى الواردات الوسيطة اللازمة للاقتصاد القومى كله وبين الصادرات الصناعية والبترولية ١٠٥ مليون.

فأنا بقول: إن يعنى نتيجة لعملية التصنيع وعملية التنمية، لازم نحط هدف أساسى أن الـ ١٠٥ مليون دي يجب أنها تقل.. يعنى مش معقول إننا نمشى فى عملية تنمية والعجز ده يتزايد! فإذا قبلنا هذا الافتراض، والدكتور عزيز كان بيقول برضه فى بداية الجلسة: إن ده يعنى من الممكن

سرى للغاية

تحقيقه بسهولة. ويمكن برضه الأخ محمود يونس، أنا كنت ناقشت معاه مسائل البترول وبنيت أرقام يمكن تقديراتى على أساس المناقشة معاه؛ بنرى إن الأهداف اللى حاطينها سواء للصناعة أو للبترول ليست بعيدة عما ينتظر إنه يتحقق.

نتيجة لهذا، هيبقى العجز فى الميزان الحسابى الخمس سنين بتوع الخطة الثالثة هيتناقص من ٣٧ مليون الى ١٣ مليون، وبعدين بيتحول الى فائض ٣ مليون السنة الرابعة، و ٢٢ مليون السنة الخامسة؛ مجموع الخمس سنوات حايبقى فيه عجز ٥٠ مليون.

بنقترح النظر علشان مواجهته، إما فى تشجيع للاستثمار العربى والأجنبى فى المجالات برضه التى تتفق مع سياسة الدولة أو فى الاتفاق مع المؤسسات الدولية على تمويل بعض العمليات بتاعتنا أو بمزيد من التشجيع للشركات المصرية للعمل فى الخارج. ده بيحل إذا تحقق إذا ركزنا على هذه الأهداف وأمكنا تحقيق الأهداف دى بيحل مشكلة الميزان الحسابى للعمليات الجارية.

يتبقى بعد ذلك العمليات الرأسمالية أو بعبارة أخرى الأقساط المستحقة علينا، الأقساط المستحقة علينا يعنى فى الجدولة التى عملتها وزارة الاقتصاد؛ أول الجدول الموجود عند وزارة الاقتصاد عن الأقساط المستحقة فى السنين القادمة يبين أن فيه سنين يعنى بتستحق ١٣٠ و ١٤٠ مليون جنيه، وبعدين فى السنين الأخيرة بنتناقص المبالغ دى تناقص كبير. هو المطلوب إننا نعمل العكس، يعنى نخلى المستحق فى السنين الأولى منخفض، وبعدين يعنى يزداد بالتدريج كلما ازدادت مقدرتنا على السداد وكلما تحقق عندنا فائض فى الميزان الحسابى. ولكن دى مسألة مهياش مستحيلة، يعنى الدول الثانية سبقتنا فى هذا؛ وعملوا اتفاقيات مع الدائنين على إعادة جدولة الديون وإعادة جدولة الأقساط.

فأنا بقول: إننا لما نتكلم على إعادة جدولة الأقساط، مبنأخدش فى الاعتبار الهدف اللى احنا واضعينه والصورة التى نرجو أن نحققها؛ فإذا كان فى سنة من السنين فى السنة الأولى مثلا ٧٠/٧١ إحنا منتظرين أن هيبقى فيه عجز فى الميزان الحسابى ٣٧ مليون، ولكن هيبقى فيه عندنا تسهيلات إتمانية لتمويل عمليات الاستثمار حوالى ٩٦ مليون جنيه، فاللى هيتفضل عندنا بين ال ٩٦ وال ٣٧ ده اللى بنستخدمه علشان سداد الالتزامات.. يعنى حوالى ٥٧ مليون جنيه أو ٥٨ مليون جنيه بنستخدمها علشان تمويل الالتزامات. وبعدين مقدرتنا بتزداد سنة بعد أخرى، فتبقى ٧٥ فى السنة الثانية وبعدين ٩٠، ١١٠، ١٣٠.

سرى للغاية

هو الالتزامات اللى علينا التزامات من الدول الشرقية والتزامات بالعملة الحرة، الالتزامات مع الدول الشرقية بتحتاج طبعاً الى مفاوضات مباشرة مع الدولة الشرقية، والأمل كبير فى أن الجو السياسى الملائم يساعد على تحقيق الجدولة المطلوبة، وعلى تخفيف عبء الديون فى السنين الأولى، وبعدين يعنى على إننا يبقى نزود الدفع فى السنين الجاية.

بالنسبة للالتزامات بالعملات الحرة، المشكلة كانت أساساً - لما حاولنا إن نعمل العملية دى فى سنة ١٩٦٥ - كانت إن مكانش فيه اتفاق مع صندوق النقد الدولى، وكانت الصعوبة باستمرار أنه ماتعملوا قبلاً اتفاق مع صندوق النقد الدولى. فأنا عارف إن الموضوع مطروح فى الوقت الحالى، وإذا أمكن الوصول الى اتفاق مع صندوق النقد الدولى يمكن إن هو يشتغل كوسيط أو كمساعد فى عملية إعادة الجدولة. ودى عملها برضه لبعض الدول الثانية، بحيث إن برضه الأقساط اللى بالعملات الحرة اللى هى عبئها الأكبر بيقع فى السنتين الثالثة الجايين، ممكن أننا نعيد جدولتها على فترة أطول.

دى الصورة بالنسبة للميزان الحسابى، مبنية على اقتراحات معينة أو مبنية على شروط معينة أو على فروض معينة، إذا تحققت ممكن إننا نحقق هذه الصورة وإذا لم تتحقق نريد نعيد النظر فى الاستثمارات المطلوبة.

الفروض اللى احنا عملناها للصورة دى هى..

أولاً: إمكان إعادة جدولة الديون بالطريقة اللى أنا شرحتها.

وثانياً: إمكان زيادة الصادرات الصناعية بـ ٢,٥٪ سنوياً فى الثمانى سنوات القادمة، فى الـ ٨ سنين أنا بأخذ أساساً ٦٧/٦٦، وفى سنة ٦٧/٦٦ كانت الصادرات الزراعية ١٧٢ مليون جنيه لما بنزودها بمعدل ٢,٥٪ بنصل سنة ٧٥/٧٤ الى حوالى ٢١٠ مليون جنيه. هو اللى حصل إن فى السنة دى زادت صادرات الأرز زيادة كبيرة، فإذا قدرنا نحافظ على هذا المستوى من صادرات الأرز ماإحناش محتاجين فى السنين القادمة إننا نزود ٢,٥٪ سنوياً؛ لأن الأرز بالفعل حاصلته فى هذه السنة ارتفعت أو السنة الثانية لسنة الأساس ارتفعت، فهتبقى نسبة الزيادة المطلوبة من الزراعة يمكن بعد سنة ٦٨/٦٧ أقل من ٢,٥٪، ولكن برضه المتوسط خلال الـ ٨ سنين مطلوب ٢,٥٪. فإذا ماإمكنش تحقيق ٢,٥٪، بعض الآراء تشكك إمكان تحقيق ٢,٥٪ على أساس أن نفس الانتاج الزراعى - يعنى الزيادة فيه - ماهياش كبيرة قوى سنوياً، يمكن ماتشجعش على احتمال زيادة الصادرات الزراعية الى ٢,٥٪، ووضعنا كهدف ١٪. يعنى أنا بقول: إن هذا الهدف ولو أنه بيبين

سرى للغاية

بسيط يعنى الفرق بين ١٪ و ٢,٥٪، إلا أنه تراكم هذا الفرق عاما بعد آخر وتزايدده عاما بعد آخر بسبب عجز تراكمى فى الميزان الحسابى فى الـ ٥ سنين بتوع الخطة.. حوالى ٨٠ مليون جنيه. الصادرات الصناعية والبتروولية: دى برضه الدكتور عزيز أشار إليها إحنا بنحاول بنقترح إننا نرتفع من ٨٦ مليون الى حوالى ١٧٠ مليون.. يعنى مضاعفه الصادرات الصناعية البتروولية على أساس أننا الصادرات البتروولية تزيد ٤٠ مليون جنيه، والصادرات الصناعية التحويلية تزيد ٤٠ مليون - ٤٥ مليون جنيه تقريبا. فالصادرات البتروولية، إذا مشى الانتاج من غير تأخير ومن غير صعوبات يعنى أنا - ويمكن الأخ محمود يونس يشاركنى فى ذلك - يعنى أعتقد إن ممكن تحقيق هذا الهدف بل قد يمكن تجاوزه.

الصادرات الصناعية الثانية، الأخ عزيز صدقى بيرى أنه ممكن تحقيق هذا الهدف. فرض رابع بنيت عليه هذه التقديرات الللى هى الصادرات الخدمية الللى هى قناة السويس والسياحة، إحنا بننميها بـ ٥٪ سنويا من سنة ٦٦ لغاية ١٩٧٥. وطبعا أساس التنمية مبنى على افتراض إن إيرادات رسوم المرور من قناة السويس بتزيد، يعنى بالنسبة للى كان محسوب قبل كده إذا كان يحصل يعنى تغيير نتيجة لبناء الناقلات الضخمة للبتروول يعنى وانخفضت نسبة الزيادة فى الصادرات الخدمية؛ يبقى لازم إعادة النظر فى كده. وأنا باعتقد إن ده بحث برضه الآراء فيه مختلفة ويمكن محتاجه لشيء من الدراسة.

ولكن إذا تحققت هذه الأهداف، إحنا بنعتقد إن هنتحقق الصورة الللى بنرجوها فى الميزان الحسابى المعروف هنا، وينقدر نستثمر ٣٠٠٠ مليون جنيه وينقدر نزود استثمارات الصناعة واستثمارات الزراعة والاستثمارات كلها، وينقدر نحقق الزيادة المطلوبة فى الدخل وفى الانتاج ورفع مستوى المعيشة، ونبتدى نسد فى الديون الللى علينا بالتدريج.

وإذا لم تتحقق هذه الأهداف، يبقى أفتتح إننا ضرورى نعيد النظر فى الخطة؛ على أساس إننا نعمل خطة برضه تتمشى مع المقدرة بتاعتنا سواء المقدرة الداخلية بتاع المدخرات والعجز أو الفائض فى الميزانية العامة، أو المقدرة الخارجة والعجز الكبير أو الصغير فى الميزان الحسابى. دى الصورة باختصار.

وطبعا إحنا ركزنا على ضرورة التوازن؛ لأن يمكن التجربة اللتى مرينا فيها فى الماضى كانت تجربة مشجعه جدا فى إمكانية زيادة الانتاج وزيادة الدخل، ولكن الصعوبات اللتى مرينا فيها نتيجة للتضخم الداخلى أو العجز الخارجى هى الللى بتدعونا الى إننا نلح فى مسألة التوازن بقدر الإمكان

سرى للغاية

داخليا وخارجيا؛ حتى نتفادى هذه الصعوبات ونستطيع إننا نحقق النجاح اللى حققناه وزيادة عنه من غير الصعوبات اللى واجهناها.

دى الصورة الرقمية للتطورات التى حصلت فى الماضى والصورة الرقمية للى احنا بنرجوه فى المستقبل، يمكن فيه بعض نقط إضافية يعنى جت فى المذكرة الأولى اللى هى موضوع الإدارة فى الوحدات الانتاجية المختلفة وتحريرها من المعوقات التى قد تؤثر على الانتاج؛ ودى يعنى إحنا عملية ماشيين فيها يعنى بقالنا كام سنة وعايزين ندعمها ونحددها ونشوف إذا كان فيه أى صعوبات علشان نتلافها، بحيث أن ينطلق الانتاج بدون معوقات سواء فى العلاقة بين الوزارة والمؤسسات أو العلاقة بين المؤسسات والشركات.. الى آخره.

طبعا موضوع تنظيم الأسرة، ده موضوع يعنى بنتكلم عليه برضه من سنة ٥٩، وده يعنى كفيل إذا بذلنا فيه يعنى مزيد من الجهد إن بيخفف برضه بعض المشاكل اللى عندنا.

التعاون الاقتصادى العربى، ده يعنى برضه محتاج لجهد إضافى ولتطمين الناس يعنى إحنا اللى حاصل فى التعاون الاقتصادى العربى، يعنى الاهتمام بالتجارة وبتيسير التجارة أكثر من الاهتمام بالتنمية وبالتكامل وبالتعاون الاقتصادى على نطاق واسع وعلى نطاق الاستثمارات.

وده الاهتمام بالتجارة لوحده مايكفيش؛ لأن الاهتمام بالتجارة إذا مكانش فيه تنسيق فى الاستثمارات ينعكس بعد مدة.. يعنى أما نتفق مع مثلا ليبيا على زيادة صادرات الغزل والنسيج إليها وبعدين تيجى هى تعمل مصانع غزل والنسيج، يعنى مهما كانت فيه اتفاقيات هتحد من استيرادها من الغزل والنسيج مننا، ولكن إذا كان فيه اتفاق على الاستثمارات وعلى التنسيق والتكامل وعلى تنفيذ الاتفاقيات اللى محسوبه على الورق - وهى بتاعت الوحدة الاقتصادية والسوق العربية المشتركة - يبقى بنمشى يعنى خطوات إيجابية فى التنسيق كبير بين البلاد العربية. ومافيش شك أن البلاد العربية عندها إمكانيات كبيرة.. يعنى إحنا عندنا إمكانيات كبيرة وهم عندهم إمكانيات كبيرة، والإمكانيات دى لو كملت بعضها البعض ممكن إنها تساعد الوطن العربى كله.

فى القطاع الخاص، برضه استثمارات القطاع الخاص يعنى إحنا ابتدينا نواصل الإهتمام بالقطاع الخاص ونديله إمكانيات إضافية ونهتم به اهتمام كبير، أعتقد إن القطاع الخاص ممكن إنه يبذل جهد أكبر فى زيادة الانتاج وزيادة الصادرات للدولة.

عبد الناصر: زيادة الانتاج سنة ٦٥/٦٦ كانت كام؟

سرى للغاية

القيسونى: من ٦٥/٦٤ و ٦٦/٦٥، زادت ٣٨٠٠ الى ٤٠٢٠، يعنى ٢٢٠ بحوالى ٥,٥٪.

عبد الناصر: فى السنتين!؟

القيسونى: لأ.. فى سنة. هى السنة اللى بعديها بقى ٦٧/٦٦ كانت الزيادة بسيطة.. يعنى هو فى السنتين مع بعض.

عبد الناصر: أنت كاتب فى المذكرة فى السنتين!

القيسونى: آه.. فى السنتين مع بعض كانت زيادة الانتاج ٨,٧٪ وزيادة الدخل ٦,٦٪.

عبد الناصر: ثمانية وكام؟

القيسونى: ٨,٧٪ زيادة الانتاج.

عبد الناصر: طب سنة ٦٥ والدخل القومى ٦,٦؟

القيسونى: ٦,٦ فى السنتين معا.

عبد الناصر: ٦٦/٦٥ كام فى المائة؟

القيسونى: أقدر أجيب الأرقام بالضبط. [يتصفح بعض الأوراق]

محي الدين: اللى موجودة فى المذكرة مش الجدول، دى بتاعت الانتاج بالنسبة لسنة الأساس ٦، اللى هى ٦٥/٦٤ من ٣٨٠٥ الى ٤٠٢٠ فى الجدول رقم واحد فى المذكرة.

سرى للغاية

القيسونى: أيوه.. بس النسب.

محي الدين: النسب آه.

القيسونى: النسب فى الانتاج يعنى فى ٦٦/٦٥ بالنسبة لسنة الأساس كانت ٥,٧٪، وسنة ٦٧/٦٦ بالنسبة للسنة اللى قبلها كانت ٢,٩٪ - ده فى الانتاج، فى الدخل فى النسبتين المقابلتين كانوا ٥٪ ١,٥٪ - وأنا بس بدى أذكر..

عبد الناصر: الزيادة ١,٥٪؟

القيسونى: أيوه.

عبد الناصر: سنة ٦٧/٦٦.

القيسونى: هي ٦٧/٦٦ أولا يعنى أرقامها مبدئية، يعنى إحنا لسه بنعد التقرير بتاع المتابعة فى وزارة التخطيط، ولكن التأثير الكبير اللى باين فيها مبدئيا إن الزراعة يعنى محققش الأهداف؛ لأن حصل نقص فى معظم المحاصيل. يعنى هي الزراعة فى الدخل.. انخفضت الدخل الزراعى فى سنة ٦٧/٦٦ بدل مايزيد انخفض من ٥٨٩ الى ٥٧٠.

كان عندى المحاصيل محصول محصول، يعنى فى سنة ٦٧/٦٦ القمح نقص من ٩,٧٠٠,٠٠٠ أردب الى ٨,٦٠٠,٠٠٠ الفول نقص من ٢,٤٠٠,٠٠٠ الى ١,٢٠٠,٠٠٠ العدس من ٢٧٠ الى ٢١٢، البصل من ٨,٩٠٠,٠٠٠ الى ٦,٣٠٠,٠٠٠ القطن من ١٠,٤٠٠,٠٠٠ الى ٩,٠٠٠,٠٠٠ الأرز من ١,٨٨٠,٠٠٠ الى ١,٧٧٠,٠٠٠، الزيادة فى الذرة.. الذرة ارتفعت من..

مرعى: الأرز فيه نقص إزاي؟!

القيسونى: الأرز فى سنة ٦٧/٦٦، السنة دي لأ.. السنة دي.. دي أرقام بتاعتكم ياسيد.

سرى للغاية

مرعى: لأ.. أنا بأسأل بس يعنى مش باطعن فى الواقع.

معى الدين: لأ.. أنا كان فى تقديرى السنة اللى فاتت ٤٠٠,٠٠٠.

مرعى: إنتم بتاخذوا بالتصدير ولا..

القيسونى: لأ.. الانتاج، يعنى هو باين من أرقام وزارة الزراعة - مصلحة الاقتصاد الزراعى والإحصاء - إن الانتاج فى ٦٦/٦٥ كان ١,٨٨٧,٠٠٠ نقص لـ ١,٧٧٤,٠٠٠. أنا باتكلم على سنة تخطيطية يعنى آه.. مش سنة محصولية، ولكن فى السنة اللى بعديها الأرز ارتفع الى ٢,٣٥٠,٠٠٠.. ده بتاع سنة ٦٨/٦٧؛ فمعظم الإنخفاض اللى جه فى سنة ١٩٦٧/٦٦ راجع للزراعة أساسا. يعنى هى الصناعة زادت من ٤٤٠ لـ ٤٦٠، الدخل فيها زاد من ٤٤٠ لـ ٤٦٠، والانتاج الصناعى زاد من ١٧٤١ مليون الى ١٨١٧ مليون.

شقىر: التشييد كمان قل!

القيسونى: التشييد.. التشييد قل آه.. التشييد قل من ٩٤ لـ ٨٨ فى الدخل.

عبد الناصر: يعنى سنة ٦٧/٦٦ زيادة فى الدخل القومى ١,٥٪، وطبعا ده مش نتيجة اليهود؛ لأن اليهود كانوا فى يونه يعنى كانوا فى آخر سنة ٦٧/٦٦.

القيسونى: لأ.. طبعا ما أنا بقول: إن النقص الرئيسى يعنى كان فى الزراعة، يعنى هو الانتاج الزراعى نقص من ٨٥٢ لـ ٨٤٢، الدخل نقص بنسبة أكبر من نقص الدخل؛ لأن استخدمنا مستلزمات أكثر بجانب مقاومة الدودة والحشرات والبتاع أكثر مثلا فنقصت الدخل الصافى.

سرى للغاية

هو الاستثمارات طبعا كانت فى سنة ٦٦ - إن كنت سيادتك يعنى بتفكر - فى أن النقص راجع لتخفيض الاستثمارات؛ هى الاستثمارات يعنى كانت مضغوطة يعنى، ولكن يعنى مش مضغوطة قوى برضه، يعنى كانت الاستثمارات فى سنة ٦٦/٦٧ مقدرة بـ ٣٦٤ مليون، فى السنة اللي قبلها كانت ٣٧٩ مليون.

عبد الناصر: هو أنا عايز أتكلم الحقيقة مع د. القيسونى بالذات يعنى، على إيه اللي وصلنا للحالة اللي احنا وصلنا ليها بهذا الشكل بصرف النظر عن القوات المسلحة؟! ودى لأن الحقيقة ما أنا الكلام اللي فى الخطة الجاية ده وهو قاعد بيتكلمه النهارده من سنة ٧٠ لسنة ٧٥، وبيقول: إن احنا هنوازن ميزان المدفوعات ولّا الميزان الحسابى وهنزود كذا بيرجعنى على طول لسنة ٥٩، وإنك كنت مسئول عن الاقتصاد لغاية آخر وزارة زكريا.. يعنى آخر سنة ٦٥.

القيسونى: هو أنا.. يعنى مش..

عبد الناصر: لا.. كنت يعنى نمرة واحد، يعنى أما حسن عباس زكى اتخانق معاك مشى حسن عباس زكى وأنت كنت المسئول نمرة واحد.

القيسونى: مع زندو ومع لبيب شقير.

عبد الناصر: يعنى الحقيقة باعتبار..

القيسونى: أنا ما أبرأش نفسى!

عبد الناصر: أنا يعنى لأ.. هو أنا بقول: إن احنا لازم نعرف الدروس المستفادة من اللي فات؛ عشان الحقيقة نصدق الكلام اللي جاى أو نعتمد على الكلام اللي جاى. إحنا الحقيقة فى سنة ١٩٥٦ كانت أوضاعنا كويسة واتجمدت لنا أموال فى لندن، ابتدينا الخطة ٥٦، لجنة الخطة قالوا: مضاعفة الدخل فى ٢٠ سنة، كان بغدادى فى هذا الوقت ربنا يمسيه بالخير.. قلنا: لأ.. قالوا ١٥ سنة، قلنا:

سرى للغاية

مضاعفة الدخل فى ١٠ سنوات - الكلام اللى أشار إليه حسين الشافعى فى أول جلسة من الجلسات - أنا فى هذا بأدى الحقيقة أمل، ليه؟

لأن هى الدول المتقدمه النهارده تتميتها فى المتوسط ٥% مش كده؟ فإذا كنا إحنا مش هننمى أكثر من ٥% معنى هذا إن الفجوة بينا وبين الدول المتقدمة باستمرار هنتسع؛ وده يحسين السبب فى رفع شعار أو "العمل على مضاعفة الدخل القومى فى ١٠ سنوات". معنى هذا إن احنا هنعلم تنمية فى السنة ٧% أو ٧,٥%، معناها إن احنا هنعلم ٢,٥% فى سبيل الاقتراب من الدول المتقدمة وإلا تزداد الفجوة بيننا وبين الدول المتقدمة.

مين اللى خالنا الحقيقة أخذنا بهذا الكلام؟ يعنى أنا بأذكر برضه وفاكر الجلسة اللى احنا قعدنا فيها، ود. القيسونى قال: إن احنا نستطيع؛ لأن بغدادى قال: إن إذا أردنا ١٠ سنين نبقى نعمل استثمارات كذا - والدكتور القيسونى قال: إن احنا نستطيع أن نوفر هذه الاستثمارات، حصل!؟

القيسونى: أيوه.

عبد الناصر: دى نقطة البداية ثم راجعنا إطار الخطة اللى عمله بغدادى، وكان عامل إطار أد كده، ثم راجعنا الخطة بالنسبة للوزارات كلها.. الخطة كلها خطة الصناعة جت وخطة الزراعة جت وخطة التعليم جت، وعدلنا فيها، وكل الخطط جت. يبقى بعد كده مشينا سنة بسنة، سنة ٦٠/٦١ كان الوضع بقى بينقلب الحقيقة كل سنة الى ميزانية، وأنا فى هذا الوقت الحقيقة وكان فيه حكومة مركزية وحكومة تنفيذية والكلام بهذا الشكل مكانتش بتجلى مشاكل، وإنتم كنتم بتتصرفوا، أنا برضه مش بأبرأ نفسى أنا يعنى طبعا مسئول؛ لأن طبعا أما هنتطرق أنا المسئول الأول اللى فيكم!

إحنا كنا بنيجى نشوف الميزانية وأنتم كنتوا بتعدوا وبتقولوا كيت.. كيت.. كيت.. كيت.. وأنت كنت مسئول عن الاثنين.. كيت.. كيت.. كيت.. كيت.. الى آخره. مش كنت بتيجى الميزانية كنتوا بتكلمونى على الحربية وتقولوا لى: نزل من الحربية، وكنت بأتصل بالمشير الله يرحمه ويحسن إليه وكنت بانزل من الحربية.

سرى للغاية

لكن بييجى هنا بقى نقطتين الحقيقة أساسيتين نتكلم فيهم؛ اللي هو التضخم الداخلى، مين أجبرك على التضخم الداخلى؟ مين قال لك زود العمليات الداخلية؟ إنتم كنتوا بتقعدوا تعملوا الميزانية، وبتقولوا: فيه عجز كذا يبقى عندنا هنمول من المعونة الأمريكية كذا وهنعمل كذا، ونقدر نمول بعجز.. الى آخره، مش ده الكلام اللي كان بيحصل؟! وبعدين الباب الأول، إحنا النهارده بنقول تضخم الباب الأول ووصل الى كذا والى كذا، كيف تضخم هذا الباب الأول؟! نسيب عملية التعيين بتوع الجامعات دى عملية يعنى مكانتش موجودة من سنة ١٩٦٠، وبعدين العجز.. العجز فى الميزان الحسابى والعجز فى ميزان المدفوعات والتوسع فى تسهيلات الموردين والتوسع فى التسهيلات الائتمانية؛ هذه مواضيع كانت بتقرر وبتمشى. طبعا أنا فى هذا الوقت ابتداءً أول شكوى حصلت اللي هى الشكوى الخاصة بوزارة الحربية على زيادة المصروفات والأمانات ولأسمها؟

صوت: العُهد.

عبد الناصر: هى دى أول شكوى أذكر كانت فى مجلس الرياسة ولأ كانت بعد مجلس الرياسة؟

محي الدين: أنا فاكر سنة ٦٥ أنا أثرت هذا.

عبد الناصر: فى سنة ٦٥؟ لأ.. لأ.. قبله.

محي الدين: قبل كده أثيرت؟

عبد الناصر: يا فى اللجنة التنفيذية يا فى مجلس الرياسة.

صوت: بعد مجلس الرياسة.

عبد الناصر: بعد مجلس الرياسة فى اللجنة التنفيذية.

سرى للغاية

صوت: أيوه.

عبد الناصر: فتوسعنا بالنسبة للتضخم الداخلى وبالنسبة للعجز، وأيضا توسعنا فى المصروفات الغير منظورة اللى كانت بره، وإزاي توسعنا؟ ما هو فى ميزانيات كل هذا الكلام كان بيتعمل، وأيضا كنا بناخد قروض مش لعمليات انتاجية أكثرها لعمليات استهلاكية، وتوسعنا بالنسبة لتسهيلات الموردين والتسهيلات كذا، ويعنى معندناش وجينا وصرفنا ذهب.. الى آخر هذا الكلام. ليه وصلنا الى هذا الحال؟! ليه؟!
يعنى أنا بقول: عندنا المشكلتين اللى هما سنة ٦٠ مكناش فيه معونة أمريكية يعنى تذكر، هى ابنتت يعنى بعد سنة ٦٠، يعنى إحنا مكناش بناخد سنة ٥٦ وسنة ٥٧ مكناش بناخد و٥٨ مكناش بناخد وسنة ٥٩ مكناش بناخد معونة أمريكية، وأول سنة إدونا حوالى ٣٠ مليون دولار يمكن.

القيسونى: الحقيقة ابنتت بسيطة وهو فى سنة ٥٤ أخذنا حاجة بسيطة، وبعدين رجعت ووقفت تانى فى سنة ٥٦.

عبد الناصر: لأ.. قصدى عملنا الخطة مكناش معتمدين فى تمويلها، وأما أنت قلت إن ممكن إن احنا نستثمر كذا مكناش معتمدين على المعونة الأمريكية؛ لأن مكناش بناخد معونة أمريكية.
النقطة الثانية: هى الحقيقة الفرق الـ ٦٠ مليون جنيهه اللى وصلوا علينا سنويا فى اليمن، وده موضوع الحقيقة كان خارج عن أيدينا؛ اللى هو زيادة مصروفات القوات المسلحة فى اليمن بما يقرب من ٦٠ مليون جنيهه ابتداء من سنة ٦٣ أو سنة ٦٤.
بنيجى النهارده بنقول: فيه زيادة استهلاك وحصل زيادة فى الباب الأول وزيادة فى تكاليف المعيشة وقروض المزارعين، طب ماوقفناش ليه قروض المزارعين؟ ممسكناش ليه فى زيادة الاستهلاك؟ يعنى الكلام ده لم ينبه اليه أبدا!

سنة ٦١/٦٠ كان مسئول عن الوزارة كمال حسين، ٦٢/٦١ كان موجود كمال حسين، فى سنة ٦٣/٦٢ كان موجود على صبرى، سنة ٦٤/٦٣ كان موجود على صبرى ٦٥/٦٤ كان موجود زكريا.

محي الدين: ٦٦/٦٥.

سرى للغاية

عبد الناصر: يبقي ٦٥/٦٤ كان موجود على صبرى؟ آه.. إنت فى الخطة الثانية ٦٦/٦٥.. أدى الخطة الأولى فمحلش تنبيه من على! وأنا كنت باشوفك فى هذه الأيام وكنت بتجلى وأنا جبتك مرة وسألتك.. هل فيه تضخم أو مافيش تضخم؟! تذكر؟ عندى فى البيت، وقلت لى: نستطيع إن احنا نقول إن مافيش تضخم. وأنا فكرتك بهذا الموضوع فى جلسة سابقة قبل كده؛ لأن كان حصل فى إحدى الجلسات كلام إن فيه تضخم. وأنا نبهت الى القروض اللى بتيجى من بنك التصدير والاستيراد، واللى كانوا موجودين فى مجلس الوزراء بيقولوا وانكلمت على الحاجات اللى بيجيبها مصطفى خليل، وقلت: حاتيجى فى يوم وهنبص نلقى علينا حاجات، ونبهتك الى هذه المواضيع ولكن العمليات دى مشيت كلها!

وفى مجلس الوزراء وكنت بقول: الحاجات اللى بنجيبها النهارده من أمريكا هنجى يوم هنتزق ونبقى ممسوكين من رقبتنا! والحاجات اللى بنجيبها بعملة حرة كذا بالنسبة للتسليح، أنا كنت عارف إن التسليح ده قرض أستطيع إن أنا هأخفضه فى يوم من الأيام، وكان علينا ٤٠٠ مليون جنيه تسليح، وأنا يوم مارحت موسكو نزلت ٤٠٠ مليون الى ٢٠٠ مليون؛ يعنى نزلت قرض التسليح ٥٠٪.

القيسونى: رجعنا استخدمناه تانى.

عبد الناصر: آه.. وهنزله تانى.. هننزل هذا القرض تانى، يعنى نسيب قرض التسليح يعنى على جنب. ليه الحقيقة وصلنا للحالة اللى احنا فيها النهارده؟! يعنى هو ده الحقيقة الموضوع اللى يجب إن احنا نتكلم فيه قبل مانتكلم فى الخطة الجاية؛ لأن أنا النهارده وأنا المذكرة دى جت لى الساعة ٢ قعدت قرينتها على طول، وأول ماقرينتها مشى قدامى شريط من سنة ٥٩ لغاية دلوقتى. وأنا أما تقول إنك هتوازن ميزان المدفوعات وهنزود مش عارف إيه ما أنا مش مصدق أبدا! لأن إذا مشينا بالطريقة اللى مشينا بيها قبل كده مافيش فايده! يعنى الحقيقة على رأى زكريا، ماهو زكريا بيقول مافيش فايده سواء مشينا كده أو كده، ماأعرفش قصده من هذا إيه؟ لكن هو بيقول: مافيش فايده خالص! آه.. يعنى أنا الحقيقة بيهمنى الحقيقة أعرف هذا الموضوع.

سرى للغاية

القيسونى: هو يعنى مافيش شك إن أما الأخ بغدادى كان قدم الاستثمارات على أساس إنها ٩٠٠ مليون جنيه، وبعدين برضه، أما سيادتك يعنى فكرت فى الموضوع، وعلى أساس إننا يجب إننا نلحق بالدول المتقدمة وأنا كنت مقتنع بالرأى، يعنى مباحلمش سيادتك إنك أقنعتنى أنا كنت مقتنع يعنى بهذا الرأى.

عبد الناصر: لا.. أنا ماباتكلمش على المسئولية أنا بدى أشخص حالة.. ليه وصلنا كده الى اللى احنا فيه؟!!

القيسونى: هو إحنا فى الخطة الخمسية الأولى.

الشافعى: هى بتقيد قوى المناقشة يعنى كداية للموضوع.

عبد الناصر: لأ.. لأ.. مش هصدق المذكرة طبعاً دى إلا لما أعرف المذكرة اللى فانت ماأتفدنتش ليه؟! ده عندى فى البيت إطار الخطة أد كده والخطة أد كده والنسبة للمحافظات.. كل ده موجود عندى فى الدولاب فى المكتب، آهو كلام حلو بنسمع ولكن الحالة مش بهذا الشكل.

القيسونى: هو إحنا كنا وضعنا أهداف فى الخطة الأولى، ويمكن ده لبيب يعنى برضه..

عبد الناصر: وحسن كان موجود فى الخطة الأولى.

القيسونى: لأ.. قصى فى المتابعة السنوية بتاعة الخطة الأولى، يعنى كان فيها الأهداف موجودة فى الخطة بتاعتنا.. بتاعت سنة ٥٩، وبعدين المتابعة بتبين إن فيه اختلاف؛ مكناش بنأخذ الإجراءات سنة بعد سنة لجعل التحقيق يتماشى مع الأهداف. يعنى سيادتك ذكرت مثلاً الباب الأول، يعنى الميزانية فى الخطة الأولى كان مفروض إن مصروفات الميزانية الباب الأول والثانى والرابع مايزيدوش غير بنسبة مثلاً ٥ أو ٦٪، الزيادة اللى حصلت فعلاً كانت أكثر من كده بكثير.

عبد الناصر: ليه.. ليه؟!!

سرى للغاية

القيسونى: هو أولا حصل تغير ..

عبد الناصر: إنت كنت بتجلى بالميزانية، لكن أما كنت بتجلى بالميزانية بتقول لى: إن أنا عايز أخفض القوات المسلحة بس! يعنى الخلاف بتقعدوا تتفاوضوا وتعملوا وبعدين الموضوع الأخرانى إنكم مزرجنين مع القوات المسلحة، وتقولوا لى: إن كل حاجة ماشية ماعدا القوات المسلحة، كنت باتكلم وأنزل القوات المسلحة!

القيسونى: وإحنا يمكن كنا بنختلف حتى من قبل اليمن، يعنى تذكر سيادتكم مثلا الاجتماع مع بغدادى فى بيت سيادتكم فى سنة ٦٢ أما عملنا أول اتفاقية مع صندوق النقد الدولى، وبعدين كنا بنحاول إننا نخفض العجز فى الميزانية الى رقم معين، وكانت الميزانية اللى عملها الأخ بغدادى فى ذلك الوقت كانت عايزه عجز أكثر من كده، وبعدين يعنى سيادتكم جمعتنا وكان على صبرى متابع الموضوع، وبعدين برضه بإيدنا وجدنا مخرج للاتفاقية.. يعنى كانت الاتفاقية بتتص على إننا مانزودش الرقم أكثر من رقم معين.

واتفاقية ٦٤ مع صندوق النقد الدولى برضه كانت بتتص على أن العجز مايزيدش عن رقم معين، وتجاوزناه يعنى أفكر حطينا الإلتزامات بتاعت القطاعات بدل ماكانت بتدخل فى الباب الثالث نقلناها فى الباب الرابع ٣٠ - ٤٠ مليون جنيه.

يعنى هو فى الواقع يمكن أنا شخصيا اللى خلانى اتماشى مع التوسع اللى كان حاصل، إن كان عندى أمل إننا نتغلب على الصعوبة دى.. يعنى أنا كان عندى أولا: إن مصروفات القوات المسلحة بتاعة اليمن وغيره يعنى حاجة مؤقتة. وبعدين هنرجع لرقم قريب عن الرقم اللى ابتدينا منه، يعنى إحنا ابتدينا ب ٦٨ مليون جنيه، أما كنا بنطلع ل ٢٠٠ و ٢١٠ و ٢٢٠ يعنى مكانش عندى تفكير إننا هنستمر فى هذا إطلاقا، يمكن ماكنتش أنا الوحيد اللى بيظن كده كنا إحنا كلنا يعنى بنعتقد إن مصروفات اليمن دى مصروفات مؤقتة وإنها أما ابتدت سنة ٦٢ مكانش مفروض إنها حاتستمر لغاية ٦٧؛ فكان فيه شئ من المخاطرة فى صالح الانتاج.

يعنى كان الحل الاقتصادى السليم من سنة ٦٢ وطالع - وأنا بأعترف بكده - إننا إذا كنا توسعنا فى القوات المسلحة كان لازم نخفض حاجة ثانية كنا تقادينا الصعوبات دى، ولكن إحنا كنا فاكرين - أنا شخصيا كنت فاكرا - إن القوات المسلحة الزيادة فيها هتبقى زيادة مؤقتة وبعدين

سرى للغاية

حانرجع نخفضها ونستمر فى الانتاج؛ لأن أنا بأعتقد إن الاستثمارات والتوسع فى الاستثمارات والتوسع فى الانتاج هو أمل البلد ده، وده برضه يعنى كان رأى سيادتك باستمرار.

فدى يمكن الغلطة الكبيرة اللي أنا وقعت فيها شخصيا، إن أنا أعتبرت ان الزيادة فى القوات المسلحة واللى هى زيادة كبيرة كانت هتبقى مؤقتة، وإن ممكن إننا نستمر فى الانتاج من غير خطورة. بعدين كان فيه ظروف اجتماعية وأحيانا ظروف سياسية بتملى علينا اعتبارات معينة بغض النظر عن النواحي الاقتصادية؛ يعنى أما خفضنا ساعات العمل وزودنا الأجور برضه كانت اجتماعات عند سيادتك وكان عزيز وعلى وزكريا.. كنا كلنا موجودين يعنى.

ويعنى كان فيه رأى معارض - أنا يمكن كنت معارض فى العملية دى - وفيه رأى محبذ لها، وبعدين يعنى برضه النواحي الاجتماعية؛ وكان ده بعد التأميم وإنشاء القطاع العام يعنى دفعنا الى قبول الفكرة. حاجات تانية، تخفيض الإيجارات وتخفيض الضرائب على المساكن والحاجات دى والإجراءات اللي جت بعد سبتمبر ١٩٦١.

يعنى دى كلها كانت مثلا إجراءات سياسية، يعنى بغض النظر عن النواحي السياسية.. إلغاء الفوائد على المزارعين وما تبع ذلك من توسع سريع فى القروض. وبعدين من ضعف عملية التحصيل، يعنى هو إحنا قلنا أولا وده فى يونيه سنة ١٩٦١ يعنى قلنا إننا - أو فى يوليو سنة ٦١ - قلنا إننا منحصلش فوائد على المزارعين وبعدين توسعنا فى الإقراض وبعدين محصلناش، وطبعا حصل الإنخفاض الكبير فى محصول القطن بتاع ١٩٦٢/٦١ يعنى جه فى وسط السنة. فإحنا مكناش عاملين حسابنا فى الخطة الأولى إن الميزانية هتزداد المصروفات فيها بهذا الزيادة - يعنى كل الزيادة المتوقعة ٥ أو ٦٪ - حصل زيادة فى حاجات يعنى ١٠٠٪ و ٢٠٠٪، وكان عندنا أمل باستمرار إننا حانتغلب على المشاكل دى وإننا هندخل فى مرحلة نقدر نوازن فيها نفسنا ولكن ماحصلش.. يعنى زاد الاستهلاك زيادة كبيرة والاستهلاك أما زاد يعنى..

عبد الناصر: يعنى الاستهلاك اللي زاد هو الاستهلاك الحكومى أكثر؟

القيسونى: أيوه.

سرى للغاية

عبد الناصر: يعنى الاستهلاك الفردى مانقدر نقول إنه زاد بالشكل اللى كان فى إيدنا يعنى إحنا فى إيدنا، كنا نقدر نعمل كمنترول على زيادة الاستهلاك الحكومى ومن الأول ونوقف المشكلة بدل ماتتاقم.

القيسونى: هو متوسط استهلاك الفرد يمكن مازادش، ولكن نظرا لزيادة السكان يعنى الاستهلاك الفردى الكلى زاد.

عبد الناصر: آه.. يعنى أنا قبل ما آجى يعنى علشان آجى الجلسة بتاعة النهارده، قعدت جبت تقرير صندوق النقد الدولى قريته وتقرير البنك الدولى قريته وتقرير السوفييت قريته تانى علشان أعمل refreshment للعملية، وجبت الإطار بتاع بغدادى قريته، والخطة الأولانية اللى عاملها بغدادى أخذت فكرة عنها. وأنا الحقيقة كنت راقد فى الفترة اللى فاتت دى والواحد قعد شاف العمليات دى كلها، كنت أخذت برد بعد الجلسة اللى كانت قبل العيد وسافرت إسكندرية كان عندى انفلونزا ورحت صلاة الجمعة اليتيمة، واضطريت إن الحقيقة الواحد قعد الفترة دى كلها فجبت الحاجات دى كلها وقعدت شفتها.

بنمسك الصندوق وعلى التنمية بيقول: التنمية ماشية كويس - مش كده؟ - فى تقارير الصندوق! وبعدين برضه بالنسبة للاستهلاك هو بيشير الى الاستهلاك الجماعى مابيشيرش أبدا الى الاستهلاك الفردى. ما هو إحنا اللى بنعمل الاستهلاك الجماعى وإحنا اللى كنا نقدر الحقيقة نربط؛ يعنى إحنا كان عندنا خطة التعليم بيبقى للناس سنة ١٩٧٠ أنا مستعد سنة ٧٠ بارحب. ها؟

صوت: طيب.

عبد الناصر: حاقول لأ.. إلا إذا حد قال لى: لأ.. ده هيسبب خطر! يعنى الموضوع الوحيد اللى أنت كلمتى فيه يادكتور عبد المنعم هو موضوع القوات المسلحة.

القيسونى: ويمكن إتكلمت برضه أحيانا فى الباب الأول يافندم، يعنى أنا كان عندى مشروع تانى لقانون الموظفين.

سرى للغاية

عبد الناصر: لأ.. ما تكلمت في الأول اتكلمت بعدين وما جيتليش! يعنى أولاً أنا كمان مش interested فى قانون الموظفين، وإنك تعلم هذا وأنا لا أفهم فيها للغاية دلوقتى، ولن أفهم فيها أبداً، من أيام القانون ٢١٠ وأنا بقول لكم فى مجلس الوزراء: أنا ما أفهمش فى القانون ٢١٠، قلت هذا الكلام ١٠٠ مرة! وبعدين عملتوا قانون الموظفين، أنا الحقيقة قلت فى يوم: إن احنا بنضيف غلاء المعيشة والعملية دى ونعمل المرتب مرتب واحد.. ده الكلام اللي قلته.

وبعد هذا جالى قانون مجاليش عليه اعتراضات، أنا مش مطلوب منى إن أنا أعرف فى الصناعة وأعرف فى الزراعة وأعرف فى الاقتصاد، وأعرف أطلع أنكلم وأعرف فى السياسة، وأعرف كمان فى القانون ٢١٠! يعنى لازم حد بيحى بنه ويقول فيه كذا أو فيه كذا أو فيه كذا، يعنى حسين الشافعى حافظ نمر القوانين كلها أنا مش حافظ نمره ولا قانون يعنى والعملية دى كلها.

القيسونى: هو يعنى إذا سمحت لى أتكلم فى الناحية الشكلية، أولاً هو الاتصال بالسيد رئيس الجمهورية هل يكون للوزراء ولا؟ الحقيقة يعنى إنت سيادتك كنت فاتح لى صدرك باستمرار وكنت باتصل يعنى كثير، ولكن بعد ما إتكونت وزارة وجه السيد على صبرى أنا يمكن ما حاولت اتصل بسيادتك كثير، وكان فيه تقرير أيامها لواحد خبير - اسمه جولك باين - بيقول إن رئيس الجمهورية تكون اتصالاته محدودة، فأنا كانت اتصالاتى يعنى أساساً برئيس الوزارة.

عبد الناصر: جولك ده مين ده؟!

الشافعى: بتاع معهد الإدارة، بتاع الإدارة ده اتنين جم هنا كانوا عملوا..

محمى الدين: تنظيم يعنى النظام الإدارى فى الدولة وكده؛ يعنى إن ما يعملش عبء على رئيس الجمهورية.

القيسونى: سيادتك تذكر إن يعنى اتصالاتى قلت بعد تكوين الوزارة، يعنى سواء فى وزارة على صبرى أو فى وزارة الأخ زكريا.. يعنى ما كنتش بأحاول أتعب سيادتك بالمسائل..

سرى للغاية

عبد الناصر: ماهو يعنى إيه دلوقتى إذا كنت شايف إن فيه حاجة توصلنا الى كارته زى اللى احنا موجودين فيها النهارده، هتروح فين؟! إنت مسئول! مانتاش مسئول قدام رئيس الوزارة - ماهو الدستور مابيقولش كده - إنت مسئول قدام رئيس الجمهورية، وإحنا أصلا مع وجود رئيس وزارة ورئيس جمهورية إحنا حكومة رئاسية ماأحناش حكومة برلمانية.

القيسونى: هو يمكن ده كان سوء فهم منى ولكن يعنى أنا..

عبد الناصر: لأ.. يعنى وبعدين إنت كنت بتكتب لى.. كنت بتكتب يعنى أما تلاقى حاجة مثلا تكتب، ما أنا يعنى طبعا فى هذا الوقت أنا فاهم إن كل حاجة ماشية مضبوط!

القيسونى: الحقيقة ماابتديتش أكتب غير فى وزارة الأخ زكريا، وكان الأخ شعراوى قال لى يعنى برضه: أبعت له صور وكنت بابعت صور وأفكرت كانت بتوصل لسيادتك برضه.

عبد الناصر: آه.. لكن لم تتبه.. إيه الحالة اللى احنا بنتكلم فيها النهارده.. الوضع اللى غرقان اللى احنا غارزين فيه النهارده، واللى طبعا يعنى مزهق الواحد الحقيقة لإننا ممسوكين من رقبتنا! كان ممكن نتلافاه قبل كده. هو السؤال.. ليه؟! برضه أنا مش بأحاسب يعنى أرجو إنك ماتأخذش إن احنا بنحاسب، ليه إحنا سبنا الأوضاع توصل الى الحالة اللى وصلت فيها!؟

القيسونى: ماهو أنا بقول: يعنى أنا كان عندى أمل باستمرار إننا نعدى الصعوبة دى.

عبد الناصر: ليه توسعنا فى البتاع ده.. اللى هى الموردين والقروض القصيرة الأجل!؟

القيسونى: أنا مش عايز يعنى هو من الصعب يعنى إنى أبرر العملية دى، مش عايز يعنى ألقى اللوم على غيرى ولكن..

سرى للغاية

عبد الناصر: إحنا مش بنلقى لوم.. أرجوك يعنى! إحنا بناخد دروس يعنى بنعرف غلطنا من سنة ٦٠ لغاية النهارده سنة ٦٧ غلطنا فى إيه؟ بحيث إن إنا دلوقتى أما يجيلى ورقة أقدر أخذها الحقيقة بطريقة جدية؛ لأن أنا الكلام اللي جالى سنة ٦٠/٥٩ واللى الواحد كان بيوقف يخطب عليه ويتكلم عليه وزيادة ومضاعفة الدخل القومى فى عشر سنوات؛ ده كان أمل عند الواحد. بنيجى النهارده بأبص بتقول لى: إن الدخل القومى زاد السنة اللي فاتت ١,٥٪ معناها يعنى إن احنا فى حالة سيئة جدا! إيه اللي وصلنا الى هذا؟!

برضه كنا بنقول فى الخطة الأولى: إن احنا هنزود التصدير وهنوازن ميزان المدفوعات والكلام ده، الحال طبعا مافيش علاقة بين الكلام اللي اتقال سنة ٦٠/٥٩ والكلام اللي احنا فيه النهارده إطلاقا! ده موضوع الحقيقة يعنى يستحق الدراسة، علما برضه إحنا سنة ٥٧ جالنا دخل القنال لأول مرة، إحنا يعنى دخل القنال اللي هو ١٠٠ مليون جنيه مكانش عندنا قبل كده. يعنى أنا رأيى هو ده الموضوع، وإلا أما حانتكلم أى كلام وبعدين بنطلع بعد كده حالتنا فى منتهى السوء!

القيسونى: ما هو يعنى برضه يعنى إن..

عبد الناصر: أنا بقول: إن احنا نقول كل حاجة، إحنا لا بنحاسب ولا بنلقى لوم على حد لكن ليه وصلنا كده؟

القيسونى: آه.. يعنى إذا سمحت لى يعنى بدل ما ألف وأدور.

عبد الناصر: لا.. لا.. مانلقش ولا ندور!

القيسونى: نتكلم يعنى بصراحه: برضه أنا بأعتقد إن القوات المسلحة أخذت عبء كبير قوى علينا كان فوق طاقتنا يعنى ومكانش متوقع، يعنى أما نرتفع من ٦٨ مليون، وكنا منتظرين إنها تزيد ب ٦٪ ل ٢١٠ ما هو يعنى مانحسب العبء يعنى من ٦٨ يعنى ٥ × بمثلا ٣٤٠، بينما إحنا يعنى معظم سنين الخطة كنا ماشيين على أساس ٢٠٠ مليون ١٨٠ مليون باستثناء السنة الأولى يعنى ارتفعنا من ٣٤٠ الى مثلا ٩٠٠ مليون جنيه.. كان فيه ٦٠٠ مليون جنيه ٦٠٠ مليون جنيه. فيه وضع كان بالفعل مشلول يعنى مكانش يستحمل يعنى مكانش فيه احتياطي علشان نقدر نوجهه لوجهات تانية طارئة؛ فده زود العبء. والقوات المسلحة، يعنى كانت الجزء الأكبر من إنفاقها كان إنفاق داخلى، ولكن كان

سرى للغاية

لها إنفاق خارجى كبير، برضه مش بس الاتفاقيات ولكن كان لها إنفاق بالعملات الحرة.. يعنى هيئة الطيران، مثلا صرفت كام؟ ٦٠ - ٧٠ مليون جنيه.. يمكن ٩٠ مليون جنيه!

ضيف: ٨٠.

القيسونى: كام؟!

البشرى: ٧٨.

القيسونى: ٧٨ مليون جنيه يعنى عملات حرة.

عبد الناصر: عملات حرة؟!

البشرى: لأ.. لأ.. لأ.. ٧٨ كله، عملات حرة حوالى ٤٠.

القيسونى: ٤٠ مليون جنيه، يعنى حاجات زى دى مش محسوبة. وبعدين يعنى فيه الأرقام هنا اللي أنا ذاكرها يعنى بطريقة دبلوماسية كده، يعنى أما بقول: بالمصرفات غير المبوبة بتاعة الحكومة ١٥ مليون جنيه، إيه المصرفات غير المبوبة دى إيه يعنى؟! يعنى المصرفات اللي مبيعطاش بيان بيها للبنك المركزى؛ فبيدخلها مصرفات غير مبوبة.. مصرفات غير مبوبة إيه يعنى؟ أساسا برضه مصرفات حكومية ويمكن أساسا مخابرات والقوات المسلحة وغيره.

عبد الناصر: المخابرات كل ميزانيتها مليون جنيه!

القيسونى: مش عارف يعنى بتاخذ هيئة الطيران والبتاع.

عبد الناصر: المخابرات كلها ميزانيتها مليون جنيه!

سرى للغاية

القيسونى: ما هم يعنى أحيانا!

عبد الناصر: لأ.. اللى هو المصاريف السرية اللى هى مليون جنيه بتاعة المخابرات، مش معقول دول بيصرفهم كلهم حايفصرف مليون جنيه؟! ٢ مليون اللى هى الإدارة وال.. مش كده؟! مش كده؟!

محي الدين: معرفش والله.

القيسونى: يعنى إذا كنت سيادتك يعنى عايز بحث فى ده ممكن برضه وزارة الاقتصاد تجيب والبنك المركزى يجيب البيانات نفسها بتاعة المصروفات دى.. نجيبها بالتفصيل، يعنى أنا كنت جبتها فى سنة من السنين، برضه عارضت فى سنة من السنين المصروفات غير المبوية دى.

عبد الناصر: يعنى دلوقتى المصروفات غير المنظورة كام؟ أنا قرئت فى تقرير إنها أكثر من ١٠٥، إنت بتقول بقت ١٠٥؟

القيسونى: ١٠٥.. آه.

محي الدين: ماهى لها جدول فى الآخر.

عبد الناصر: لأ.. أنا أصلا وأنا باقرا التقرير، اللى كاتب دى هم البنك الدولى والصندوق، والتقارير الاقتصادية.. ها؟

زكى: نقصوا دلوقت.

عبد الناصر: بقت كام؟

زكى: نقصناها فى التلات سنين اللى فاتوا يعنى هتوصل حوالى ٨٥.

سرى للغاية

الشافعى: وهو عايز يوصلها لـ ٧٠.

القيسونى: الواردات غير المنظورة اللي هى كان يجب تنزل كتير بعد كده.

عبد الناصر: يعنى برضه إحنا بلاش تدخل فى الـ.. أنا قرريت الكلام اللي إنت كاتبه.

القيسونى: فيعنى القوات المسلحة زادت، أنا باعتبار إن ده كان عبء كبير.. يعنى العبء فوق طاقتنا داخليا وخارجيا، الباب الأول زاد وده برضه يعنى كنا بننظر للموضوع من الناحية الاجتماعية من الناحية السياسية.. يعنى من زاوية مختلفة.

فإحنا يمكن غلطتنا فى الباب الثانى يعنى توسعنا فى بعض سنين أكثر من اللازم. وبعدين دلوقتى يعنى بنعالج الخطر ده على أمل يعنى يمكن سنتين ثلاثة بنحد من الباب الثانى.

الباب الثالث، المصروفات بتاعة الباب الثالث يمكن أنا مختلف شوية مع الأخ على أما بيقول: كان حقنا نتوسع فى السنين الأولى أكثر مما توسعنا. يمكن التوسع السريع فى السنين الأولى من غير ماتتوافر الدراسة الكاملة للمشروعات، يمكن سبب ارتفاع فى تكاليف المشروعات أكثر مما كنا نتوقع، وضغط كل المشروعات فى وقت واحد اللي هو كان وقت برضه بيزيد فيه الاستهلاك؛ يعنى أدى الى ارتفاع التكاليف. يعنى إحنا عاملين بحث فى تكاليف التشييد والبناء، بنلاقى إنها أحيانا بتزيد ١٠٠٪ عن بداية الخطة.

فده معناه إن القيمة الحقيقية للاستثمارات اللي بنيناها أقل من الكلام اللي على الورق؛ لأن الأسعار ارتفعت. يعنى الأرض مثلا اللي صلحناها.. صلحناها بسرعة، وكان فيه ضغط كبير يعنى من قبل السد العالى من ٥٨ و ٥٩، إننا نصلح ونستخدم اللي كنا بنسميها المياه الإضافية أو الموارد الإضافية والآبار. وبعدين بعد السد العالى إبتدينا برضه نتوسع فى الموضوع، ولكن من غير مايتعمل حصر التصنيف.

سرى للغاية

وبعدين بعد ما اتعمل الحصر التصنيفى للأرض، وجدنا إنه فيه أراضى من الطبقة الأولى أهملناها بينما بنصلح فى أراضى من الدرجة الرابعة.. يعنى استعجلنا وكان فيه ضغط مستمر وكان فيه أهداف طموحة ويجب إننا نعمل ده ونسرع ونخلص وبتاع؛ لأن إزاي هيبقى السد العالى قائم والأراضى مش متصلة؟!!

عبد الناصر: آه.. كلام معقول والكهرباء بتاعة السد العالى حاتروح فين؟

القيسونى: آه.. بس دى أنا بقول: إذا كنا يمكن إتأخرنا سنة أو سنتين أو إذا كنا بدرنا بعملية الحصر التصنيفى يعنى إذا كنا الجهد اللى بذلناه فى استصلاح الأراضى بذلناه فى السنين الأولى فى استكمال الحصر التصنيفى، وبعدين صلحنا الأراضى على أساس الحصر التصنيفى المماثل، يعنى كنا دلوقتى بنجنى ثمار أكثر من الأراضى دى؛ كنا صلحنا كل الأراضى بتاعة الطبقة الأولى وبعدين الأراضى بتاعة الدرجة الثالثة والرابعة كنا نقاديناها، ولكن فيه أراضى فى الدرجة الثالثة والرابعة ويمكن ابتديناها حتى من قبل الخطة الأولى يعنى فى أيام ٥٧/٥٦، يعنى كان يصح إننا نبتعد عنها. بعدين فى المشروعات الثانية كلها يعنى فى كل المشروعات يعنى كل القطاعات الثانية موجودة معنا هنا. هو يعنى حصل أخطاء كثيرة وحصل ارتفاع فى التكاليف، وحصل توسع شديد؛ فتحنا حاجات كثيرة فى نفس الوقت ماإحناش قادرين نقفلها.. يعنى مشاريع السياحة مثلا كل اللوكاندات اللى بنينها دى، أنا زرت أبو سنبل أخيرا يعنى بانين لوكاندة هناك بقى لها سنتين مقفولة مفيهاش حد، وبعدين لوكاندة تانية فى أسوان ولوكاندة تالتة مش عارف فين.. كلها مقفولة!

وبعدين الصناعة، يعنى فيه مشاريع كبيرة أفادتنا، ولكن فيه مشاريع برضه مثلا مش عارف تجفيف البصل والألبان والحاجات دى، هل دى يعنى إحنا كان ضرورى إننا نتمشى فيها؟! فالخبرة هى يعنى أخطاء وقعنا فيها، ولكن المهم إننا نستفيد من الأخطاء دى ونحاول إننا فى المستقبل نتفادى هذه الأخطاء كلها.

يعنى إحنا توسعنا فى الباب الأول والباب الثانى والباب الرابع توسع أكبر من اللى كان مقدر فى الخطة، وقبلنا هذا التوسع وهذه الخطورة ومشينا فيها. على كل كلنا عارفين إن فيه عجز فى الميزان الحسابى؛ يعنى العجز فى الميزان الحسابى كان ببيان، وكان ببيان العجز فى التمويل ومكناش بنبلغ الصندوق، يمكن أحيانا تقارير الصندوق كانت بتبان more rosy أو غير الواقع؛

سرى للغاية

لأن مكناش بنبلغه كل الحقيقية.. يعنى كان فيه أرقام بنبلغها للصندوق وأرقام حقيقية كنا بنعرضها، وكان الأخ زندو محافظ البنك المركزى وكان بيعرض برضه بطريقة غير مباشرة يمكن الأرقام دى. فالتوسع فى الباب الأول والثانى والرابع، وبعدين السرعة فى تنفيذ بعض الاستثمارات؛ ودى كانت نقطة خلاف باستمرار.. يعنى هل نسرع فى تنفيذ الاستثمارات؟ وهل نسرع فى استخدام التسهيلات الائتمانية المتاحة؟

يعنى هو سيادتكم تذكر فى المناقشات برضه اللي فى اللجنة التنفيذية العليا واللى فى مجلس الوزراء، إن مادام فيه تسهيلات ائتمانية متاحة نستخدمها ونستخدمها بسرعة ونبنى ونعمل؛ يعنى دى السياسة اللي مشينا عليها، إحنا مشيناش على سياسة الضغط فى الأبواب الأول والثانى والرابع طبقا للخطة.

وبعدين حاولنا برضه ننفذ كل الاستثمارات اللي كانت مقدرة رغم الزيادة اللي حصلت فى الأبواب الأخرى، ويمكن إسرعنا فى تنفيذ بعض الاستثمارات من غير الدراسة الكافية! ولذلك أنا بقول: يعنى فى الخطة الجديدة، أنا أول حاجة عملتها أما جيت وزارة التخطيط، قلت: نبتدى من دلوقتى ندرس الخطة بتاعة سنة ٧٠ - يعنى إحنا فى سنة ٦٧/٦٨ ندرس الخطة بتاعة سنة ٧٠ - على أساس إننا يعنى نشوف مع بعض القطاعات المختلفة إيه اللي ممكن إننا نعمله؟ وإيه اللي ممكن إننا نتفاده من الأخطاء؟

وبعدين كان فيه فى بعض الأحيان فلتان! يعنى النقطة اللي أشار إليها عزيز فى جلسة سابقة وأشار إليها البشرى، أن بعض القطاعات بتستورد من الخارج حاجات ممكن انتاجها محليا وبتحملنا نقد أجنبى وبعدين بتزود العجز بتاعنا. يعنى مش عارف إذا كنت سيادتكم بتشوف التلغرافات الخارجية للسفارات، يعنى أنا فى وقت من الأوقات مسكت عملية الصنادل دى، وجدت إن وزير معين اتصل برومانيا والمجر وطلب صنادل - كميات كبيرة - بينما أنا عارف إن المصانع المحلية تقدر تنتج الصنادل، فأنا كنت بعت بييجى عشر تلغرافات لمحمد إبراهيم لما كان سفير فى المجر أرجوه إننا نرجع فى العملية دى وإننا يعنى نوقفها.

ولكن يعنى إزاي الوزير عرف ينفذ ويروح يتفق مباشرة على الصنادل دى؟ دى مش حالة وحيدة يعنى هى حالات كانت بتحصل! يعنى عملية اللوريات بتاعة القوات المسلحة اللي كانت مطلوبة أخيرا، دى كانت برضه هتقلت.. القوات المسلحة كانت هتجيب أياميها من الخارج لولا يعنى أنا كنت مجتمع مع السيد زكريا وبعدين جه الطلب فى الوقت ده، وبعدين الأخ زكريا إتصل بالأخ البشرى فى محاولة أن يوقف العملية دى والقوات المسلحة ضاغطة إنها عايزاها بسرعة، وبعدين

سرى للغاية

الأخ عزيز جه واتكلم فيها كمان يعنى على مهلنا بدل مانجيب فى ٣ أشهر إننا نعملها على ٦ على ٧ أشهر. فهو مافيش التنسيق المطلوب، هو فيه تنسيق رأسى يعنى إحنا بنتصل برئيس الوزارة أو برئيس لجنة الخطة، ولكن ماينتصلش ببعض الاتصال اللازم. يعنى إذا كان وزير الحربية كان يتصل بوزير الانتاج الحربى أو بوزير الصناعة كان جايز يعنى بيان إن فيه حاجات كثيرة ممكن تتعمل هنا، وزير النقل يتصل بوزير الصناعة فيه حاجات كثيرة ممكن تتعمل هنا ولكن مكانش فيه.. كان فيه الفلتان ده! والتنسيق الأفقى بين الوزارات مكانش بالدرجة المطلوبة!

سليمان: هو الواقع المذكرة الحالية وصلتني الساعة ٣، وكنت عايز ملاحظات بالنسبة للمذكرة نفسها.

عبد الناصر: لا.. والله أنا عايز أتكلم فى..

سليمان: نتكلم فيها فى الجلسة اللي جايه.

عبد الناصر: أنا عايز نتكلم، ليه وصلنا الى.. يعنى ما هى الأخطاء وما هى العوامل وماهى المسببات اللي خلتنا الحقيقة كونا نستهدف كذا فبقينا كذا؟ علشان الحقيقية إذا كنا بنعمل خطة تانية يبقى لازم نتلافى هذا الكلام كله. تسمحوا لى دقيقة! [الرئيس يخرج من القاعة]

محي الدين: لسه مانغرزش فى المذكرة دلوقتى ياصدقى.

سليمان: لا.. ماأنا مش هتكلم.

محي الدين: أنت عايز تغرز فى المذكرة.

سليمان: لا.. لا.. لأ.. أبدا.

سرى للغاية

محي الدين: الموضوع ماهوش فى المذكرة الحقيقية.

سليمان: أبدا.

عبد الناصر: أيوه ياسيد.

مرعى: هو إذا سمحت لى سيادتك إذا كنا نستعرض موضوع الخطة، يعنى أنا عاصرت الجزء الأول من الخطة وبيتبين لى بعض العيوب والمآخذ الللى أخذت على الخطة وعلى الطريقة الللى كانت متبعة فيها..

أولاً: الطريقة الللى كنا بنحاسب بيها الاستثمار وطريقة تقييم الخطة أثناء المدة بحساب الاستثمار، كان القطاع الللى هو يستثمر أكثر هو الللى يعتبر أنه قد نفذ الخطة والقطاع الللى بيستثمر أقل يعتبر أنه لم ينفذ الخطة، إعتباراً أن الاستثمار سيحقق العائد منه، وده مش فى كل الأحيان الاستثمار بيحقق العائد الللى كان موجود فى الخطة، وبذلك انصرفت القطاعات أمام هذه المحاسبة الللى كانت بتجرى فى مجلس الوزراء على الاستثمارات فقط.. إنصرفت القطاعات الى استثمار أكبر مبالغ ممكنة وخاصة فى عمليات التشييد.

وأنا أذكر مثل إن احنا كنا واضعين مبلغ معين لعمل وحدات مبنية بتاعة التجميع الزراعى، وبعد أنا ماحطيت ده فى الخطة وجدت إنى أقدر أقوم بعمليات التجميع الزراعى من داخل الدور نفسها.. يعنى بدل مابنى وحدة وحاجة زى كده، وحققنا فعلاً كان مدتها مطلوب نعمل ١٨٠ قرية عملنا الـ ١٨٠ قرية جمع فيها ١٨٠ قرية إنما ماعملناش مباني بتاعة ١٨٠ مبنى.. يعنى وفرنا الاستثمارات.

تقرير الخطة الللى قدم لمجلس الوزراء أن صفر% خطة المجمعات الزراعية، وأنا أثرت فى الجلسة قلت لهم: ده أنا قمت بهذا ١٠٠% والاستثمارات دى متوفرة خدوها فى حنة تانية، قالوا: لأ.. مادام وجدت هذه الاستثمارات كان يجب إنها تشتغل!

من هذه الأمثلة وعديد من الأمثلة الأخرى، إن مثلاً بعض الاستثمارات فى المصانع إذا أقيمت المباني وماكنتش الماكينات جت بيعتبر إن ده حقق الخطة! فى الواقع ده لم يحقق الخطة؛ لأن تحقيق الخطة هو بالعائد النهائى الللى بيبجى لنا من عملية الاستثمار.

سرى للغاية

باطلع من كده إن الطرق الحسابية التي سارت عليها الخطة الخمسية الأولى، طريقة مكانتش مضبوطة لأنها انحرفت نحو الاستثمارات فقط وما انحرقتش نحو العائد من هذه الاستثمارات. الحاجة الثانية اللي كانت ظاهرة بوضوح جدا في الخطة الخمسية الأولانية: إنه أنا بدى أسأل نفسى هل حصل تقييم للخطة الخمسية الأولى؟ ولأ بنستى في نهاية النهاية وعايزين نعرف إيه اللي حصل فيها؟ طب ليه في كل سنة أو في نهاية كل سنة أو في نهاية كل مشروع أو في نهاية كل استثمار أو ابتداء العائد من الاستثمار إذا حصل انحراف في المؤشرات بتاعة هذا العائد.. ليه ده ما انداكرش بحيث إن الخطة تتغير وبتتغير من سنة الى سنة؟ هل حصل هذا؟! لم يحصل هذا! والدليل على ذلك تكرار الخطأ الواحد من سنة الى الثانية الى الثالثة الى الرابعة الى الخامسة!

مثلا الدكتور القيسونى بيشير الى بعض الأراضى فى الاستصلاح، وليه جت من المرتبة الرابعة؟ طبعا فيه إعتبرات عدة هي اللي جابت المرتبة الرابعة، إنما قطعاً إن لو كان بيتقدم في نهاية كل استثمار ما هو العائد من هذا الاستثمار، كان لابد أن يتبين أن قطعة ما من الأرض موجودة مكانش يصح إلتساع فيها؛ على طول بتقف لأن المسألة مش مسألة جملة المساحات، المسألة مسألة استيعاب المياه حا يكون إزاي؟ والعائد الإقتصادى من هذه المياه هيكون إزاي؟ بأخلص من كده بنتيجة نهائية، أنه لم يحصل تقييم جدى للخطة الخمسية الأولى إلا في نهايات الخطة الخمسية الأولى. في التقرير اللي كان عمله الدكتور لبيب شقير في مدة السيد على صبرى، كان بيتصف بجدية بالنسبة لتقييم الخطة الخمسية الأولى، إنما في مدى ظنى إن هذا التقرير يعنى متداولش.. يعنى أعتبر إنه له نواحي سياسية أو يعنى بعض الأنحاء النواحي اللي كانت فيه اللي هي نواحي نقد يعنى احتفظ بيها لهذا السبب.

في تصوورى إنه لا يمكن لنا وإحنا حتى إذا كنا هنعط الخطة الخمسية الجاية وبعضنا عاصر الخطة الخمسية الأولى، إن احنا يمكننا إن احنا نضعها بصفه نهائية ولازم نكون فاهمين النقط دى من الآن.

الثانية: إنه لازم يكون عندنا من سعة الأفق وسعة الإدراك ومن التجربة السابقة، إنه يكون عندنا الصراحة الكافية إن الواحد مننا يبسط الخطة وبيجي يقول: يا إخوانا المؤشر اللي كنت متصوره جاى لى من هذا الشغل ماجاش! أعمل إيه؟ هنا بنتداول بنقدر نحد كثير جدا من تطورات الخطة في السنوات الخمس الأولى. سيادتكم أذكر وإخواننا كلهم بتوع التخطيط قالوا: إن الخطة يجب

سرى للغاية

إنها تكون مرنة فمش ممكن عمل خطة يعنى متماسكة كده ومافيهاش من المرونة، طيب هل كانت الخطة الخمسية الأولى فيها مرونة؟!

أين هي المشروعات اللي اتغيرت اللي ابتدينا فيها وتبينناها؟ وده أصبح قضية القطاع أن يتبنى مشروعاته سواء كانت ناجحة أم فاشلة، والمثل اللي أنا بأضره بتاع الوحدات الزراعية ده قائم، واضطرينا بعد منها أظن الوزارة بنت الوحدات الزراعية. وأنا مدتها قلت: إنه المباني اللي بتحصل فى الريف بصفة عامة يجب أن يعاد فيها النظر فى الاستثمارات، وأتذكر تماما إنه بتوع التخطيط وقتها قالوا: إحنا مش مستعدين إن احنا نعيد النظر فى الخطة كل يوم والثانى! ده هو الواجب أن يعاد النظر فى الخطة كل يوم والثانى إما بنهاية كل مشروع أو بنهاية كل سنة.

النقطة الثالثة اللي أحب أضيفها: إنه مش عاوز آخذ القطاع ككل، ماأجيش آخذ مثلا القطاع الزراعى ككل أو القطاع الصناعى ككل، فيه مشروعات حدث فيها استثمار لم تحقق العائد وفيه المشروعات حصل فيها استثمار حققت عائد أكثر مما هو موجود فى الخطة. أنا خايف إنه يكون ولو بناخد بمظهر القطاع بصفة عامة ونلاقى فيه نسبة مئوية محترمة يبقى ده يجعلنا راضين عن القطاع، الحقيقة هي مش كده!

الحقيقة هي إنه كان ممكن النتائج تكون أحسن لو اتغيرل القطاع داخل نفسه.. يتغيرل القطاع داخل نفسه؛ ما هي الاستثمارات اللي اتخطت فيه؟ هل المشروع ده أدى ولا لا؟ وبعدين يكون عندنا من القوة والصراحة إن احنا نقول: خلاص إذا كان المشروع كمل أو كامل بس أن نبقى فاهمين اقتصادياته إنما لا نمتمد فيه.

يعنى أنا مثلا النهارده كنا بنتكلم بره فى صناعات الأسمدة، وزى ما أشرت فى كلمتى السابقة عن التصنيع الزراعى، طب بعد الفترة اللي فاتت بتاع الخمس سنوات اللي فاتت فى التصنيع، ماأعتقدش فيه اثنين مننا بيختلفوا إن صناعة السماد تأخذ الأولوية الأولى باتساع كبير؛ يعنى ده نوع من التصنيع اللي ثبت بالفكر وبالاحتياجات وبطبيعة التنفيذ أنه مشروع له اقتصادياته الناجحة. مشاريع البترول، طبعا ماحدث بيختلف فيها، التصنيع الزراعى برضه أعتقد إن وزير الصناعة مايبخلفش فيها، إنما فيه مشاريع دخلت فى الخطة الأولى من الناحية الصناعية بيصح على الأقل أنها ماتتكرش.

وعلى ذلك أنا باخلص من المناقشة دى بحاجتين أساسيتين..

أولا: إنه إحنا نكون أكثر جدية فى الخطة الخمسية اللي جاية.

سرى للغاية

ثانياً: إن لازم يتقدم تقييم عن كل مشروع أول ما يخلص المشروع أو إذا الوزير حس الراجل المسئول حس إن فيه إنحراف فى المشروع حتى ولو هو اللى نادى بيه، بيصح ببيجى فى قعده زى دى ويقول: والله يأخواننا المشروع الفولانى اللى أنا طلبت له الاستثمارات دى، أنا شايف المؤشرات بتاعته مش ماشية معايا؛ على أساس إنه يعنى يتعدل أو يتصغر أو .. إلخ.

فإحنا العيب عندنا مايبحصلش تقييم، انصبت عملية مراجعة الخطة كلها على الاستثمارات اللى بيستثمر أحس ببقى هو اللى أشطر، التقييم ماشملش المشروعات المفردة داخل القطاع الواحد. ده تصورى أنا اللى جعل إن بعض حاجات الخطة الأولى تتحرف عن الأهداف بتاعتها.

سليمان: الواقع يعنى إحنا يعنى مرينا فى تجربة طويلة تسترعى النظر إننا نقف عندها، ونحاول إننا نتفق على تشخيص للحل من غير ما ندع مجال للاجتهاد بمناقشة المبادئ الاقتصادية المعترف بيها فى العالم كله. التجربة اللى فانتت يعنى تزيد عن ٧ سنين، وطبعاً الجهود اللى بذلتت جهود ضخمة وكبيرة، وبرضه الأخطاء اللى وقعنا فيها أخطاء كبيرة يجب إننا نحاول إننا نبحث عنها ونصل الى حل بحيث إننا نقدر نتجنبها فى سياستنا المقبلة.

مافيش شك إن مرحلة الخطة الأولى كانت بداية تخطيط، الخبرة بتاعتنا مكانتش كافية فى عملية التخطيط؛ فنقدر نقول: إن وضع الخطة قامت بين القطاعات كل قطاع مستقل عن الآخر، والنتائج اللى حسبتت وتقديرات النتائج كانت فيها بعض المبالغة! وتقديرات الاستثمارات كانت أقل من الحقيقة!

فنقدر نقول: إن كانت عندنا مجموعة من المشروعات اتجمعت ووضعت فى إطار خطة، مكانتش خطة متكاملة متوازنة. التخطيط طبعاً هو الجهاز الفنى لمراجعة هذه التقديرات ماتمكنش فى المراحل الأولى إنه يحلل البيانات اللى وردت له. فده يتطلب مننا فى المراحل اللى جاية إن التخطيط يعنى عناية كاملة بدراسة كل مشروع وحساب النتائج بتاعته حساب أكثر دقة. يلى ذلك ما أشار إليه الأخ سيد مرعى، إن عملية المتابعة كانت بتيجى متأخرة، مكانش بيمكن الاستفادة من نتيجة المتابعة فى تصحيح التقديرات أو التغييرات اللى حصلتت للخطة.

يعنى نقدر نقول: إن الخطة الأولى وضعت بعيداً عن التخطيط وإن التخطيط فى المراحل الأولى كان حتى بعيد عن الصواب! لما انقطعت المعونة الأمريكية وتخرجت الأحوال، كانت المحاولات فى السنين الخامسة والسادسة والسابعة بتستهدف تقييم المشروعات اللى بتتقدم بيها

سرى للغاية

القطاعات ومحاولات التنسيق، لكن مكانش ممكن إنها ترقى الى مستوى التخطيط على أساس موازين السلع.. ودى الحاجة اللي لازم ندخلها.

فى السنوات دى حاولت الحكومة إنها تسيطر على الاستثمارات، تتسق بين القطاعات، تقلل استقلال القطاعات، كل قطاع كان بينطلق وكان فيه ألوان من التكرار بين القطاعات وبعضها؛ ترتب عليه بدون شك تبديد الاستثمارات وتبديد للنقد الأجنبى زى ما أشار الإخوان اليه.

زى ماقال الدكتور القيسونى: إن مكانش فيه عناية برفع الكفاية الانتاجية، ودى عنصر من أهم العناصر اللي الدول أخذت بالتخطيط بتعنى بيها. على سبيل المثال فى الدول الاشتراكية رفع الكفاية الانتاجية لوحده نتيجته زيادة فى الدخل القومى ٤٪ سنويا، بما يعادل نص أو أكثر من نص زيادة فى الفائض نتيجة للاستثمارات الجديدة.

طبعا د. القيسونى أشار الى عناصر كثيرة ترتب عليها زيادة الاستهلاك الحكومى والحكومى بالذات، وده نتيجة طبعا لزيادة الإنفاق على القوات المسلحة زيادة الباب الأول وما أشبه ذلك، إنما يعنى لاشك أننا تحملنا وحملنا أنفسنا بأعباء كبيرة فى وقت مكانش يمكننا إننا نتحمل هذه الأعباء؛ نتج عن هذا الخلل اللي حاصل فى ميزان المدفوعات.

أى زيادة فى الاستثمارات لابد أنها تيجى نتيجة لزيادة فى المدخرات؛ يعنى البلاد اللي بتخطط على أساس ٢٥ أو ٣٠٪ لازم تدخر ٢٥ أو ٣٠٪. المدخرات بمعنى إن ميزانية الخدمات تبقى متوازنة، وبعد كده المدخرات تتحسب على أساس مايمكن استثماره من هذه المدخرات مش المدخرات اللي تتجه الى أبواب أخرى.

بمعنى إن أى زيادة فى الاستثمار لابد أن ينتج عنها مزيد من النقشف مش تزيد من اقتراض داخلى أو خارجى. الخطة أى خطة يجب إنها تفتح الباب لمزيد من القدرة على الاستثمار مستقبلا، وإلا بنمشى فى طريق مسدود. علينا إننا - وأنا زى ماقلت - نستكمل حسابات قومية عن اقتصاديات كل سلعة منتجة محليا وكل محصول زراعى وكل خدمة تقدم ونقيمها تقييم كامل؛ لأن يصح قوى إننا نجد من بين السلع اللي احنا بنتنتجها فى هذا القطاع أو فى غيره بنجد إن فيها يمكن استنزاف لمواردنا الداخلية.

برضه من الأخطاء اللي وقعنا فيها واللى أشار إليها الإخوان، إننا منرتبطش بمشروعات تزيد عن قدرتنا فى التنفيذ أو فى التمويل. وده برضه كان واضح فى خلال الـ ٧ سنين اللي فاتوا، إننا فى وقت واحد ارتبطنا بعدد ضخم من المشروعات مكانش ممكن أبدا تنفيذه؛ ترتب على هذا إن المشروع اللي احتاج تنفيذه سنتين امتد تنفيذه الى خمس سنين! المشروع اللي كان مفروض إنه ينتج فى السنة

سرى للغاية

الثالثة أنتج فى السنة الخامسة! ده ولا شك إنه خطأ كبير؛ لأنه بيترتب عليه طبعاً إنه كثير من المشروعات بتفضل مفتوحة ماتمش تنفيذها ماجابتش عائد.. بيزود التضخم الداخلى.

العلاقة بين الجهات المختلفة، سواء الوزارات أو وحدات الانتاج أو المؤسسات أو الوزارات مبتعتمدش على التشريعات، بل بتعتمد فى الواقع على السلوك الشخصى والاتجاه العام للدولة.. ناس بتفهم بتسمع إن الدولة عايزة كده إعملوا كده، بتسمع إن الوزير عايز كده بيعملوا كده بصرف النظر عن التشريعات!

تأكيد سلطة الإدارة، دى حاجة يعنى ماهياش جديدة دى حاجة مسلم بيها فى البلاد الرأسمالية العريقة فى الرأسمالية وفى البلاد الاشتراكية العريقة فى الاشتراكية.

والمقياس لرفع الكفاية الانتاجية، إننا ندى لأجهزة الإدارة السلطة بحيث إنها تقدر تمارس ونقيم وتحاسب اللي بيشتغلوا معاها، زى ماقلت فى جلسة سابقة: نظام الأجور الحالى يجب تعديله والى أن يتم هذا التعديل ممكن دراسة مرحلة تنظيمية نتفق على إنه ماتزيدش الأجور إلا بنسبة تعادل ما لا يجاوز ثلثين الزيادة فى الانتاج؛ حتى إنه يتكون عندنا رصيد نقدر نعالج بيه العجز فى ميزان المدفوعات الحالى.

وده هو يمكن أسلوب أكثر ممكن السيطرة عليه عن إننا الاستهلاك نفسه منخليهش ينمو أد كده. يعنى هو فيه اقتراح فى المذكرة، خاص بإننا منزودش السلع الاستهلاكية أكثر من ٢٪، تحقيق هذا هيوجد برضه أزمات وطوابير إنما الحنفية هى نظام الأجور.

آخر كلمة أقولها: إن أى تأخير فى اتخاذ سبل الإصلاح، هيتطلب طبعاً تراكم للمشكلة ويتطلب مننا توضيحات أكبر فى المستقبل، وأظن كلنا مسلمين دلوقتى إننا على أبواب تضخم محتمل شديد ونرجو إن ربنا يقدرنا على إننا نتغلب عليه.

عبد الناصر: على أبواب تضخم!؟

سليمان: أيوه.. يعنى تضخم un controlled غير مخطط يعنى، هو فيه تضخم حالياً يعنى طبقاً للزيادة فى الأجور دى بيبتج عنها تضخم، إنما ممكن يعنى نقبل تضخم يمكن السيطرة عليه، إنما التضخم الذى لا يمكن السيطرة عليه ده يبقى خطير!

سرى للغاية

رفعت: فى الواقع يعنى أنا أحب أتكلم بالنسبة للمذكرتين اللى هما موجودين مش بالتفاصيل بقدر ماهى الناحية العامة اللى فيهم، وخصوصا المذكرة الأولانية يمكن وضحت أسباب عن مشاكل وهى فى الواقع ماهياش أسباب بقدر ماهى أعراض لشيء موجود يجب معالجته.

والمذكرة تقريبا بتدى تفسير لأسباب هذه المشاكل وخصوصا فى أولها، على أساس معدلات التنمية كانت طموحة أكثر مما ينبغي، ويمكن فيه إشارة الى أن التمويل الخارجى كان بيمثل نوع من الخطورة أو الخطر على الخطة نفسها، بالرغم إن جاء فى آخر المذكرة أهمية التمويل الخارجى والاستثمارات الأجنبية والعربية.. الى آخره. ولكن المذكرة بتركز على نقطة أساسية أو مفتاح المشاكل كله وهى مشكلة المدفوعات الخارجية.

فى الواقع مشكلة المدفوعات الخارجية، ماهى إلا تعبير عن الأوضاع الاقتصادية الداخلية، وتقديرى من أهم أسباب هذه المشكلة سببين رئيسيين - ودى يمكن بترجعنا الى اللى أشرت اليه سيادتكم فى الفترة اللى فانت من سنة ٦٠ - وترجع..

أولاً: إن احنا يمكن اعتمدنا إن احنا نشترى من الغرب باستمرار فى الوقت اللى الغرب مايشترش منا؛ وبذلك يمكن العجز مع دول الغرب زاد أو كان بيفوق فعلا جملة العجز فى ميزان المدفوعات كله.

النقطة الثانية: يمكن وهى البدء بتصنيع صناعات استهلاكية، وده يمكن أثر يعنى أدى الى عملية تخلف كبيرة؛ لأن عملية تصنيع صناعات استهلاكية فى الواقع كان بيؤدى إن احنا بنحتاج باستمرار الى مواد وسيطة بنستوردها من الخارج باستمرار، وهذه السياسة هى اللى كانت موجودة فى الماضى، ويتقديرى لاتزال حتى وقتنا الحاضر يمكن موجودة بالنسبة للتعامل مع الغرب أو عملية الصناعات الاستهلاكية.

بتيجى مذكرة تتكلم عن التخطيط، وفى الواقع التخطيط يعنى يمكن - زى ماشرحت سيادتكم - إن كان فيه تخلف فى التخطيط أساسا، وبعدين المذكرة بنتكلم ثانى عن الخطة الثانية والخطة الثالثة.

وفى الواقع الواحد يعرف إن كان فيه الخطة الأولى، معرفش إذا كان فيه خطة ثانية ولاّ لأ! لأن الخطة الثانية يمكن لم تنفذ بالكامل أو نفذ منها سنة أو سنتين وبعد كده مشيت العملية زى سيادتكم ماقلت سنة بسنة.

فتقديرى مكانش فيه خطة ثانية إطلاقا بحيث إن احنا نقدر نقول: إن كان فيه خطة لها أهداف أو بتحقق نواحي معينة.

سرى للغاية

فى الواقع إذا كان أساس مشكلة التمويل الخارجى اللى بتوضع هى أساس العملية، ففيه برضه مشكلة إحنا يمكن وقعنا فيها فى الماضى وهى مشكلة التمويل الخارجى؛ لأن لم توضع سياسة فى الواقع للقروض الخارجية وكيف يمكن استخدامها. فعملية التمويل الخارجى أساسا تقديرى أنها ليست بديل للتمويل الداخلى، بل بقدر ماهى بتكون نوع مكمل أو مساعد فى العملية، والمفروض إن حصيلة التمويل الخارجى أو القروض الخارجية تستخدم فى عمليات انتاج فقط وليست فى عمليات استهلاكية؛ ويمكن ده فى تقديرى اللى سبب نوع من المشاكل فى العملية. تقديرى، الى حد ما لم تراعى توافق زمنى بين مواعيد السداد ومواعيد انتاج المشروعات نفسها إلا يمكن فى بعض مشاريع معينة، لكن فيه كثير من المشاريع لم تراعى هذه الناحية. النقطة الثانية: لم يراعى التناسب بين فوائد القرض وشروطه وبين عائد المشروعات نفسها اللى بيستخدم فى تمويلها؛ وده يمكن اللى بيسبب عبء فى عملية القروض الخارجية أو عملية المدفوعات الخارجية.

المذكرة كانت بتشير الى بعض الحلول، من أهمها طبعا موضوع رفع الإيداع الى ٢٠٪، ولو إن ده طبعا إتجاه سليم واتجاه صحيح إلا أنه بيوجد مشكلة مهمة أخرى.. وهى مشكلة التراكم فى الأموال اللازمة للتنمية بعد كده؛ لأن المفروض إذا كنا إحنا بنرفع نسبة الإيداع ٢٠٪ نحدد الـ ٢٠٪ دى حاتيجى منين، ومين اللى حايتملها أكثر. فمشكلة التراكم دى لازمة لعملية التنمية، هى المشكلة الأساسية فى تقديرى ودى يمكن يعنى الواحد حاييجى لها بعد كده.

بعد كده بالإجراءات اللى تمت فى يوليو الماضى، ودى يمكن إجراءات الى حد ما سليمة ولو أنها يمكن ناقصة بعض الشئ. زى ماقلت يمكن فى الجلسة اللى فاتت: إن فيه بعض قطاعات لم تمسها هذه الإجراءات، اللى اتحمل العملية فعلا هم جموع الناس أو الموظفين تقريبا اللى بيأخذوا مرتبات أو محدودى الدخل بصفة عامة؛ على أساس زيادة الأسعار وخفض الأجور؛ طبعا من ضمن الحلول اللى موجودة أيضا هى عملية رفع الأسعار وخفض الأجور ودى طبعا عملية أنا بانظر لها من الناحية السياسية قبل الناحية الاقتصادية، ودى يمكن بتسبب مشاكل أكثر.

فى الوقت اللى بنجد المذكرة بتتكلم فيه عن ربط الأجر بالانتاج.. ربط الأجر بالانتاج فى الواقع هو عكس عملية رفع الأسعار وخفض الأجور؛ لأن طالما إن أنا هزود الانتاج فإذا المرتب هيزيد، فإذا عملية رفع الأسعار وخفض الأجور مافيه شك إنها عملية بتتناقض فيما بينها، إلا أنه من الضرورى فى الواقع إن احنا يجب نلاحظ بالنسبة لعملية الأجور بالذات ٣ نقط مهمة..

سرى للغاية

متوسط الأجور: فى الواقع يجب أن يتحدد على المستوى القومى مركزيا طبعا لتغير الانتاج نفسه بالنسبة للوحدة الانتاجية، فمستوى الأجر يجب أن يتوقف على انتاجية العمل فيه نفسه، من ناحية الأجر الفردى يجب إنه يربط عن طريق الكفاءات وما إليها بالمهارة والانتاج اللى هى الحوافز الفردية من نفسها.

ومن هنا بنجد إن فى الواقع إن عملية رفع الأسعار وتخفيض الأجور، هى فى النهاية عكس اتجاه لربط الأجر بالانتاج؛ ودى يمكن نقطة موجودة فى المذكرة ويجب إن احنا نراعيها أو نعدلها. فى المذكرة أيضا فيه تركيز على نقطة مهمة أو على قطاع مهم وهو القطاع الخاص، فالقطاع الخاص فى الواقع مفيش شك له دور هام فى التنمية، وقد يساعد على تكوين مدخرات تساعد خصوصا فى الفترة اللى جاية، ولكن يجب أن يكون فيه لنا مفهوم أو ماهو المقصود بالقطاع الخاص؟ ففيه مفهومين: مفهوم بيؤمن بالمشروع الخاص أساسا وكفاءته التى تفوق بالضرورة كفاءة القطاع العام. مفهوم آخر يرى أن القطاع الخاص مكمل للقطاع العام فى المجالات التى لم يتطور فيها الانتاج.. وده المفهوم اللى موجود فى الميثاق نفسه.

وعلى هذا الأساس، يبقى ما هو مفهوم تشجيع القطاع الخاص؟ حسب المفهوم الأولانى: إنه هو أكفأ من القطاع العام؛ معنى كده إن احنا حاندعم القطاع الخاص ونمكنه بحيث يستطيع أنه ينمو بلا تخطيط، وبالتالي خصوصا إذا كان القطاع الخاص النهارده ٦٠٪ تقريبا من مجموع القطاعات المختلفة فهنجد إن هيجى وقت القطاع الخاص هو اللى هيسيطر.

المفهوم الآخر: إن احنا بنخطط للقطاع الخاص فى الحدود اللى هو بيكمل فيها القطاع العام؛ وده تقديرى هو المقصود بالعملية بحيث إن القطاع الخاص ما يخشش عشان يسيطر بعد كده على القطاع العام، أو يخش فى نوع من معرفش لأن كان فيه دايمًا اتجاه المنافسة بين القطاع الخاص والقطاع العام.. ماأعرفش مدى يعنى الإتفاق على هذا الإتجاه.

موضوع الاستثمارات الأجنبية، أيضا ماأعرفش الى أى حد يعنى حاجى استثمارات خارجية من الخارج سواء أجنبيه أو عربية؛ لأن احنا نعرف إن حتى من سنة ٥٢ الى سنة ٥٦ مجاش يمكن حوالى ٢ مليون أو ٢,٥ مليون تقريبا، بالرغم من إنه لم يتضح فى ذلك الوقت أى إتجاه اشتراكى موجود عندنا فى البلد؛ فمعرفش إذا كنا النهارده هل هيقبل رأس المال الأجنبى على إنه يستثمر هنا ولا لأ؟ ده موضوع طبعا عايز مناقشة.

سرى للغاية

والاعتماد طبعا على الرأسمالية الأجنبية، فى هذا يعنى أنا تقديرى غير وارد لإن لم تستطيع رؤوس الأموال الأجنبية إنها بتيجى بل رؤوس الأموال العربية؛ لأن باعتبار أنها مجرد فرع لرؤوس الأموال الأجنبية. فالاعتماد على هذه الناحية أو التعويل عليها، أعتقد يعنى إنها عايزة دراسة أكثر ودراسة أوفى ولا يمكن الاعتماد عليها لحل المشكلة اللي احنا بنواجهها.

طبعا موضوع استخدام رأس مال الاتفاقيات اللي تمت مع الشركات البترول الأمريكية، ده وضع خاص ويمكن له شروط معينة وروعى طبعا فيها مصلحة البلد أساسا. وإذا أمكن يعنى مع فرنسا بالذات الوصول الى بعض هذه الشروط يمكن يكون أفضل، ولو إن فيه شك يعنى فى إمكانية إن فرنسا تجيب رؤوس أموال أو تستثمر رؤوس أموال هنا؛ لأن تقريبا معظم رؤوس أموالها تستثمر فى إفريقيا أو فى غرب إفريقيا بالذات، وإذا كانت بتحاول تخش هنا فبتخش بحاجات بسيطة، ويمكن فرنسا يههما النفوذ الثقافى أكثر من الناحية الاقتصادية بالذات.

هو طبعا الموضوع ده بالنسبة لمناجم الكبريت اللي هناك وبتاع، يعنى يمكن مانقدرش ناخذها مقياس بإن فرنسا ممكن تخش، لكن إذا أمكن إن احنا فى الواقع ناخذ شروط مع الفرنسيين زى شروط شركات البترول الأمريكية طبعا ده بيبكون أفضل.

لكن اللي بدى أصل اليه، إن احنا لا نعول كثيرا على رؤوس الأموال الأجنبية ولا رؤوس الأموال العربية حتى ممكن إنها تستثمر عندنا هنا فى الداخل.

بتبقى المشكلة الأساسية فى الواقع أو الحقيقية مشكلة التراكم الضرورية للتنمية، ما فيه شك فى الخطة الأولى أمكن فعلا إن يوجد فيه تراكم، ثم طبعا على حساب الرأسمالية الأجنبية اللي كانت موجودة.. الرأسمالية الكبيرة اللي كانت موجودة والتأمينات.. الى آخره، ودى أمكن إن الخطة الأولى تمشى ولو إن جزء منها كبير استنفذ فى النواحي الاستهلاكية مش فى النواحي الانتاجية. النهارده طبعا إحنا بنواجه مشكلة وهى بتختلف طبعا عن الفترة بتاعة الخطة الأولى؛ وده نتيجة عدم وجود التراكم اللازم لعملية التنمية، ولعدم وجود مصدر واضح فعلا لهذا التراكم.

المصدر الوحيد اللي موجود النهارده داخليا فى عملية التراكم هو تقديرى الرأسمالية المحلية. ودى ممكن بتخطيط لها ودفعها حسب خطة مرسومة حسب ما جاء فى الميثاق أيضا بنسبة علاقتها مع القطاع العام، بنقدر نستطيع فعلا إن احنا نصل الى حل لمشكلة المدخرات اللازمة لعملية التنمية، ولكن بصفة عامة فى المذكرة لم تتضح هذه المشكلة بالذات، وهى مشكلة التراكم وإزاي إن احنا نحاول نحصل على الأموال اللازمة لعملية التنمية من الداخل. وكان كل تركيز المذكرة فى الواقع على عملية التمويل الخارجى وخطورتها، وإزاي نسد العجز أو نتلافى العجز اللي موجود.

سرى للغاية

ولكن يمكن المذكرة عايزة توضيح أكثر، وإزاي أنا أموال العملية داخليا ثم بييجى التمويل الخارجى.. ما هو إلا عملية مساعدة وعملية مكملة للموضوع.

بصفة عامة يعنى المذكرة يمكن يتمس النواحي الاقتصادية بشكل مباشر دون مراعاة لجوانب سياسية مختلفة موجودة.. جوانب سياسية بالنسبة للوضع اللى احنا فيه؛ سواء بالنسبة لوضع العدوان أو استمراره أو اتساع نطاقه بعد كده، بالنسبة لتأثير بعض المواقف السياسية لبعض الدول الغربية حتى زى فرنسا وانجلترا.. الى آخره، وهل ممكن الاستفادة من هذه المواقف من الناحية الاقتصادية؟ ثم برضه عملية التمويل على المعونة العربية أو استثمارات عربية، هنا تقديرى دى برضه نظرة عايزة بحث أكثر وربط الناحية السياسية خصوصا الخارجية بالوضع الاقتصادى اللى احنا موجودين فيه. ده تعليقى يعنى على المذكرة تقريبا وخصوصا المذكرة الأولانية.

شقيير: سيادتكم يافندم بتسأل عن الوضع اللى وصلنا لهذا، والبحث أو التعليق دار حوالين وضع الخطة الخمسية الأولى أو الظروف اللى أحاطت بالخطة الخمسية الأولى، هو فى اعتقادى إن لو بحثنا الأسباب فيه مجموعة أسباب متصلة بالخطة الخمسية الأولى فى حد ذاتها ونأمل إنها متكررش، وفيه مجموعة أسباب يبدو لى مازالت قائمة وتحتاج لعلاج.

لو جينا للخطة الخمسية الأولى، هى وضعت فى سنة ٥٩ أو فى سنة ٥٨ لحد سنة ٥٩ فيه شغل فيها لا شك أن الدراسات اللى عملت بمناسبة كانت دراسات ضعيفة مافيش جدال أنها بنيت على دراسات لم تكن مطلقا دراسات قوية، لكن هو بناء على هذه الدراسات حددت الأهداف اللى وضعت فيها ووضعت أهداف معينة. لكن منذ السنة الثانية للخطة كان واضح أن كثير من الأهداف اللى موجودة فى قلب الخطة كانت أهداف لا بد أن تتغير، وبالفعل ابتداء من السنة الثانية بدء فى تغيير هذه الأهداف، بل وفى إلغاء أو إيقاف مشروعات معينة بالذات.

أنا هأدى بعض الأمثلة هنا من المشروعات التى أوقفت لأن بعد دراستها مثلا ثبت إن اللى موضوع لها مش صحيح..

بالنسبة مثلا للمشروعات بتاع الوادى الجديد، وضعت مشروعات وكان موضوع لها أهداف معينة بانتاج أرض، بدراسة أجريت وقفنا هذه المشروعات لأن ثبت من تقارير من أساتذة هندسة ومن غيره أن كمية المياه اللى موجودة محل بحث ومحل شك كثير جدا؛ وده يمكن راجع لأن كانت عند وضع الخطة ودى كانت أول خطة بنعملها وكان أول دراسات بتتعمل، فالطبيعى فى البداية بتكون كده.

سرى للغاية

أيضاً بالنسبة لبعض المشروعات الأخرى المتصلة بغلة الأراضى، وضع مثلاً إن الأراضى المستصلحة هتدى فى الخطة الخمسية الأولى وكانت داخل فيها ٤٠ مليون جنيه فى آخر سنة من السنين، وده بتقارير جاية من الوزارات وبنانية كلامها على هذا ومرتبطة على كده وهى معذورة؛ كانت أول مرة بتعمل فيها استصلاح أراضى وفكرة الزمن والفترة اللى يجب تدخل مكانتش واضحة أمامنا.

فى بعض المشروعات الصناعية أيضاً، كان المشروع الصناعى مفترض فيه فترة تفرخ معينة اللى بيسموها الاقتصاديين اللى ما بين البدء وبين إعطاء الاستثمار، بتبقى فترة قصيرة بينما فى الواقع التجربة بتثبت إن لازم خبرة ولازم تدريب.. إلخ.

ده كله خلى الخطة أخذت وضعها مستهدفة إن فى آخر سنة بيبقى فيه فائض فى الميزان التجارى مش فيه عجز فى الميزان التجارى؛ وده غلط كبير جداً لأن عمر أى خطة ما اتعملت على أساس إن فى ٥ سنين البلد هيقدر ينمى ويخرج من مرحلة عجز.

طريقة المتابعة اللى توبعت بيها الخطة بتاعتنا، الحقيقة ربما كانت طريقة متابعة استثمارات لكن تغيرت هذه الطريقة تماماً منذ السنة الثانية للخطة، وماقولش هذا يافندم دفاعاً وإنما تجربة عشان نستفيد منها ندرسها الفترة القادمة. والسادة الإخوان الوزراء اللى كانوا موجودين ابتداء من السنة الثانية للخطة، كان التركيز فى هذا الوقت على الانتاج مش على الاستثمار مطلقاً. كمان أيضاً مسألة المرونة.. الى آخره. والتقييم، كان فيه تقارير سنوية وباقدر أقول يافندم: إن مافى مشكلة بتثار النهارده ماهياش مثارة فى تقارير المتابعة السنوية بتاع الخطة.

وأنا بارجو لو الدكتور القيسونى أرسل لسيادتكم هذه التقارير؛ لإن احنا كنا بنبعثها أيضاً لمجلس الرئاسة وكله، وأنا بارجو لو اتسع وقت سيادتكم لكى تلقى نظرة عليها لكى ترى أن جميع المشاكل مكانتش خافية علينا، إنما هى طبيعة مرحلة التحول الاشتراكى - زى ما هأبين - بتفرض جزء من هذه الصعاب ما يمكننا تلافيها لو خدنا دول أخرى زينا وهأدى لسيادتكم أمثلة.

يبقى ضعف الدراسات فى الحقيقة المتصلة بيها ويجب نستفيد من هذا؛ إن كل مشروع جديد بندرجه بيدرس ويدرس دراسة كاملة وقوية.

النقطة الثانية يافندم اللى جت فى الخطة الأولى وباعتقد إنها سبب رئيسى فى الصعوبات اللى بنجدها حالياً: هى المعونة الأمريكية وطريقة تلقينا لها وفلسفتنا منها، إحنا تلقينا المعونة الأمريكية كما لو كانت مورداً دائماً واشتغلنا باستمرار بعقلية إن المعونة الأمريكية مورد دائم، لو مكانتش المعونة الأمريكية موجودة حتى مع حرب اليمن كان تم إيه؟ كنا وقفنا أمام الصعوبات اللى احنا واقفين فيها الآن يمكن من السنة الثالثة للخطة، فكنا على طول - ولسه الوضع متفاقمش - كنا

سرى للغاية

قدرنا على طول نعيد وضعنا تانى، وكانت التجربة بنصح السياسية بتاعتنا وينصلح التخطيط بتاعنا، لكن فى الواقع سواء كان للأمریکان قصد من هذا أو مافيش.. دى نقطة يصح تبحث.

إنما من المؤكد أن المعونة الأمريكية بالطريقة التي أعطيت بها وبالشروط التي أعطيت بها وبالتحليل بتاعها، كانت وسيلة استطعنا عن طريقها التوسع وخاصة إحنا تصرفنا كما لو كان ده مورد دائم؛ فأصبحت بديل عن أشياء أخرى كثيرة، وخلصنا نتوسع فى الاستثمار وفى الانتاج بالصورة اللي توسعنا بيها من غير ما نشعر بضائقة أو بعقبات كثيرة. يوم المعونة الأمريكية ما منعت أو ابتدت تنقص على طول الاقتصاد تحمل الأثر بتاعها.

ده برضه بالنسبة للمستقبل يعطينا درس؛ إن مواردنا تبقى هي الأساس الجوهرى بالنسبة لنموننا، وتبقى الموارد حتى لو أخذنا تسهيلات أو قروض تبقى هذه التسهيلات أو القروض محسوبة ضمن إطار مواردنا؛ على أساس إنها بتكملها كعملية هامشية وليست كعملية رئيسية.

فى الخطة الخمسية الأولى أيضا حدث تغير يافندم كبير فى معدل التبادل الدولى ضدنا؛ حدث تغير لأسباب متصلة بالسوق الدولى ما كانناش إحنا يد فيها. دى خلت موردنا يمكن اللي كان ممكن يخلصنا نستورد ١٠ وحدات من سلعة مبقاش يكفى إلا لاستيراد سبعة أو لاستيراد ستة! وبالتالى خلى العجز فى ميزان المدفوعات يبقى عجز ضخم.

دى فى اعتقادى يعنى مجموعة من الأسباب تميزت بها الخطة الخمسية الأولى، ونأمل إنها ماتجيش فى الخطط اللاحقة بعد ذلك.

فيه أسباب باقية الآن ونحتاج فى الواقع لعلاج وعلاج صحيح.. أول سبب يافندم: هو عدم الالتزام من الأجهزة - ودى نقطة يعنى برضه بنطرحها - الواقع زى ماقلت مرة فى تعليق سابق يافندم: كل جهاز كان بيتصور هو مجموعة قائمة بذاتها، وهذه الروح مازالت قائمة فى أجهزة كثيرة بيظهر أثره على الخطة، فى إيه؟! على الورق الخطة مترابطة المشروع ده بيتعمل مع المشروع ده اللي ده فى قطاع وده فى قطاع، لكن بمجرد ماخرجت من الورق وبقت علاقة مابين وزارتين ومابين مشرفين هنا وهناك، قد يحدث إن ده ماينفذش إلا بعد ده ماينفذ أو ده يسبق المنفذ فى هذا؛ فعلية الالتزام فى الترابط - اللي هي جوهر الخطة فى التنفيذ - كانت بناء على حساسيات كل قطاع وعدم التزام كل قطاع، بيترتب عليها فى النهاية عدم تنفيذ.

سرى للغاية

أمثلة من هذا حدثت مابين قطاع الزراعة والرئ، مابين قطاع الصناعة والنقل، يعنى نستطيع إعطاء أمثلة كثيرة لها جدا، ما هنقدر نخرج من هذه العملية إلا لو جمعنا الالتزامات. بنيجى برضه التزام فى نقطة البيانات، بنصرخ من نقطة إن البيانات اللى بتطلب منا كثيرة فى الواقع هو البيانات الكاملة الصحيحة اللى بتروح لأجهزة التخطيط اللى بتطلب هذه البيانات نقدر إنها بيانات قليلة اللى بتروح كاملة وصحيحة.

جزء كبير من البيانات بيعيبه نقصه وجزء آخر بيعيبه عدم صحته؛ وده بيكتشف فى التخطيط أو بيكتشف فى أجهزة الخزانة أو غيره لما البيانات دى بتضاهى بينها وبين بعضها فى القطاعات. ودى راخرة عملية التزام ويمكن برضه إذا أردنا علاج يافندم نعطى لها اهتمام كبير. سبب غير هذا السبب وما زال قائم وهو أشرنا إليه قبل ذلك، هو أن أجهزة المؤسسات والشركات بتاعة القطاع العام فى الواقع مازالت ضعيفة، وضعف كان طبيعى جدا فى فترة التحول الاشتراكى فى أولها. هذا الضعف ترتب عليه إن بطبيعة الحال كل المشروعات اللى موجودة فى أيديها اللى بيتولد منها بيكون متأثر بقوة بهذا الضعف. ظهر ده فى إيه؟ أى مشروع انتاجى قوى الإدارة بتاعته والتخطيط بتاعه قوى بيدي للانتاجية أهمية كبيرة سواء كان فيه نظام رأسمالى أو نظام اشتراكى، عملية انتاجية العامل بتأخذ وضع هام جدا فى داخل أى مشروع سواء اشتراكى أو رأسمالى؛ ضعف الأجهزة دى خلى فى الحقيقة برضه عملية الانتاجية ماتاخذش الاهتمام الكبير الموجود.. وده اللى ظهر إن الانتاجية بقت فيها مجالات ضعف كثيرة.

وبعدين ضعف روح التعاون بين مشروعات القطاعات المختلفة نفسها كصورة من صور عدم التزامات القطاعات بتاعه ودى موجودة وقائمة.

وبعدين يافندم بالإضافة لهذا يمكن فى الفترة الماضية كلها نقدر نقول: إن ضعف التنظيم السياسى اللى ورا تنفيذ الخطة؛ لأن فى الحقيقة عملية خطة بالضخامة اللى احنا عايزين نعملها دى أو اللى نرجو عملها دى ماهياش عملية مستحيلة، بتحتاج لتنظيم سياسى قوى جدا؛ لأن بالعملية الإدارية فقط ما حايمن إحنا على وجه الإطلاق إن أى خطة - حتى بالأهداف العادية - تنتفذ. حتى يافندم فى انجلترا فى القرن الـ ١٩ كان فيه هدف سياسى ورا العملية اللى بيعملها العامل الصغير، بالنسبة لروسيا ولأى دولة اشتراكية شاعر إنه بيعمل عملية فتح إنسانى جديد. إحنا عندنا كانت دى غاية بشكل عام! ما فيش تنظيم سياسى قوى بيخلى حماس الناس يتحرك فى الاتجاه بتاع الخطة بالتفصيل.

سرى للغاية

هل الأزمة اللي احنا بنفوت بيها أزمة يعنى بتاعتنا لوحدها؟ أنا بقول: جزء كبير من هذه الأزمة راجع برضه لطبيعة التحرك الاشتراكى اللي بيتم، لكن كان ممكن يبقى أقل من كده بكثير لو إن العوامل اللي أشرت اليها دى حدثت تلافيناها فى الفترة الماضية.

ومعتقدش إن العملية إن احنا فى corner ومايمكنش الخروج منه بالعكس فيه إمكانيات للخروج، المشروعات المفتوحة اللي بتدى انتاج باستثمارات بسيطة لو ركزنا عليها هتدى انتاج كبير بيمكن عن طريقه الخروج، ولكن ده يقتضى برضه يافندم التزام من الجميع ويقتضى تحريك سياسى فى جميع المواقع للأشخاص اللي بيشتغلوا بالعملية الإدارية وإلا مافيه حاجة حاتم بالشكل القوى.

بقول: برضه إن احنا مازال - وأنا باتفق مع السيد كمال رفعت فى الفكرة اللي قالها - مازال هناك إمكانيات لتوليد مدخرات من قطاعات موجودة، لما سيادتك تشوف أهميتها فى توليد مدخرات مازالت ضعيفة جدا إذا قيست بأهميتها فى الدخل القومى، كل القطاع الخاص وكل الرأسمالية الوطنية الموجودة ميناخذش منها نسبة من المدخرات للاقتصاد تساوى وزنها.

عبد الناصر: هى بتتقص كل سنة!

شكير: .. بنتنازل إنما هل الحل إنها بتطلق كقطاعات بنقول إنها بيتسع مجالها؟ لا ياإخواننا بقول: الوسيلة لها هى وضع تنظيم إشتراكى فى خدمتها؛ بمعنى تكتيلها فى عمليات تعاونية اختيارية.. الجمعيات التعاونية الإختيارية اللي بنقول تكتلها فيها هى التى سوف تحصل لها على المواد الأولية وهى التى سوف تسوق لها ويتدى كل الدفع اللازم لها؛ وده بيدى قوة لكل واحد منهم وبعدين هتحقق انتاج وتحقق أرباح جزء منهم بيقطع. إنما القول بإن قطاع خاص بنسيبه كده زى ما بيكون هذا لا يحقق استثمارات؛ لأنه مع التحول الاشتراكى من العبث إنه نتصور إن القطاع الخاص هيرجع يعمل لنا استثمارات فى الصناعة أو غيره.

دى الصورة يافندم اللي أعتقد إنها يمكن بتلخص الأسس الكبيرة خالص للموضوع إذا مادخلناش فى تفصيلات.

سرى للغاية

وبالنسبة للخطة الأولى، أنا بارجو الدكتور القيسونى لو عرض تقارير وكلها لمست هذا، وتقارير متابعة سنوية كانت بتتعمل، بل أكثر من هذا تقارير متابعة.. إحنا مشينا سنتين ونص تقارير متابعة كل ثلاثة شهور بنعرض فيها مشكلة كل ثلاثة شهور بثلاثة شهور. مابنفولش تخطيط أبدا كامل ولا حايبقى كامل أبدا وجهاز التخطيط هيتحتاج بصفة مستمرة لتدعيم. والنهاره الدول اللى سابقانا فى التخطيط أربعين سنة أو خمسين سنة بترجع تعيد وبتدعم وبتتظم، وهيفضل جهاز التخطيط محتاج لهذا.

اللى تم كان هو طبيعى جدا مع المرحلة اللى حضرت فيها الخطة الخمسية الأولى، الفترة الجاية هتحتاج لقوة أزيد ولتدريب أزيد ولعلم أزيد فى جهاز التخطيط.

عبد الناصر: نأجل ليوم الأحد.. يوم الأحد الساعة ٦.